

عبدالعاطي ملكاً

اسم العمل :	عبدالعاطي ملكاً
النوع :	مسرّحية
تأليف :	محمد أبو قمر
تصميم الغلاف :	حكيم صالح
إخراج داخلي :	عبدالقادر فايز
الطباعة :	اتيليه تاتش - المحروسة
الناشر :	الدار للنشر والتوزيع
المدير العام :	محمد صلاح مراد
تليفون :	٠١١٢٥٨٠٠٤٦٧
البريد الإلكتروني :	eddar_press@yahoo.com
فيس بوك :	www.facebook.com/eldarpublish
رقم الإيداع :	٢٠١٦/٢٣١٨٥
الترقيم الدولي :	I.S.B.N.: 978-977-702-160-9

عبدالعاطي ملكاً

كوميديا من ثلاث فصول

تأليف

محمد أبو قمر

الدار
للنشر والتوزيع

٢٠١٦

إهداء

إلى روح الجميل محمد أمين
النبيل الذي أعرف أنه هناك ينتظرني
لأحكي له قصة جديدة

الظلمة الجدد !!

مقدمة بقلم الشاعر فريد أبوسعدة

"عبد العاطي ملكاً " مسرحية للكاتب محمد أبو قمر ، تفتح بمشروط جراح ماهر أوراما في العقل الجمعي للمصريين الفقراء ، المصريين الذين ما ينفكون يصعدون على السلم الاجتماعي درجة ويهبطون درجتين ، أو يخطون خطوة للإمام خطوتين للخلف ، أو لا يصعدون ولا يتقدمون ، وإنما يراوحون في مكانهم مثل التعبير العسكري "مهلك سر" !! هؤلاء الذين عضهم الفقر والعوز ، ولا يملكون إلا قوة العمل ، يتوسلون كفيلاً من بلاد النفط ، يبيعون من اجل "فيزته" ما وراءهم وما أمامهم ، ممثلين بحلم كأنه (الوسواس القهري) ، حلم بالعمل المجزى والكافي لتغيير نمط الحياة ، لا تبارح مخيلتهم صورة أشخاص فعلوها ، وصاروا ملاكا ، وذوى حيثية واعتبار ، تبدأ المسرحية بنماذج حيّة وحيوية منهم ، يعانون من خداع (سمسار الفيزه) وتلاعبه بهم وبأحلامهم ، ثم تأتي المعجزة إذ يدخل عبد العاطي ، وهو واحد من أسرى حلم الفيزه ، فرحا مهللا ، ويده بعض التراب من أرضه ، ويعلن أن تحتها بترولاً ، ويدور على الجمع ليشموا بأنفسهم رائحة الجاز !! تبدأ الأورام في التفتح ، ورم الأغنياء في استغلال الفقراء (العمدة الذي يدعى أن له حقا في الأرض ، فإذا كان عبد العاطي قد ورث الأرض عن أبيه ، فهو نفسه من باع لأبيه الأرض ، وبالقطع لم يبيع له ما تحتها من بترول !!) وورم الفقراء في الانتقام من مستغليهم ، ومحترقهم ، الذين حولهم إلى قوة جاهلة عمياء ، لخدمة السادة في الوطن، والسادة في بلاد النفط ، يظهر هذا من أحلام وهلاوس عبد العاطي ، ملك البترول الجديد ،الذي سيبيع مباشرة لأمريكا ، وسيمنح هو

الفيز لمن يريد ، هكذا يقيم في مخيلته مملكة يجعل فيها العمدة وغيره عمالا من عماله ، هكذا تتناسل الأحلام في انتظار أن يأتي مندوب الحكومة ، ليحلل التربة ، تمهيدا لدق حفار النفط ، وتنصيبه ملكا ! ، نعم حتى السعوديين سيعملون عنده هو ، وهو الذي سيمنح الفيز هذه المرة ، إنه الملك، لكن المعجزة التي جاءت لتكشف الجروح المزمنة ، عادت مرة أخرى كلكمةٍ مباغطة على الأنف ، إذ يقرر مندوب الحكومة : أن رائحة الجاز ناتجة عن بقايا متسربة من ماكينة ، وأنه لا بترول هناك ، وأنا إذا كنا صعدنا على السلم درجتين فعلينا أن ننزل ثلاث درجات !!.

يقدم محمد أبو قمر في مسرحيته هذه الرؤية ، وكأنه يقول أن الغنى ليس صدفة ، ولا ينبغي له أن يكون ، و يقدم هذه الرؤية عبر نماذج من لحم ودم الريف المصري ، تكاد لا تحتاج للعرض لكي تراهم في مخيلتك وهم يتشاجرون ، أو يداهنون ، أو يتآمرون ، أو حتى يتقجعون من تهاوى أحلامهم ، وهو يبرع إلى درجة كبيرة في إدارة الصراع ، عبر حوار حي ، حوار كأنه تقشير لحاءات من جذع الشجرة للوصول إلى النسغ الحقيقي للشخصية أو كأنه يعيد تكوين الشخصية وينائها لحاء بعد لحاء !.

(عبد العاطي ملكا) تراجيديا المظلومين وهم يفشلون في الحلم بالانتقام من ظالمهم بأن يكونوا ظلمة !! هذا التهكم المصري الخالص ، الذي صاغ به المؤلف أحلام البسطاء ، وتقدم به في تطوير الأحداث ، هو ما يجعلنا أمام كوميديا سوداء ، حتى أننا نجد أنفسنا متعاطفين مع الظلمة الجدد !!.

شخصيات المسرحية

شخصيات المسرحية هي مجموعة متنوعة من الأشخاص الذين يمثلون التركيبة العامة للمصريين الذين يعيشون في قري مصر بصفة عامة بما يعطي انطبعا عاما عن ذكاء المصريين وطبيبتهم وتلقائيتهم ووعيهم الجمعي المتميز وخفة أرواحهم وامتلائهم الطبيعي بروح الفكاهة وحميمية العلاقة بينهم الأمر الذي يميز طبيعة الصراعات التي تنشأ فيما بينهم بروح خاصة خالية من الانتقام أو الحقد أو الضغينة .

الفصل الأول

تقع أحداث الفصل الأول في مقهى القرية، والمقهى فى مفترق طرق . فى الخلف تبدو المزارع ممتدة، تطل المقهى من اليسار على الطريق المؤدى الى المحطة .

يجلس الزبائن فى شكل مجموعات :

المجموعة الأولى : مجموعة من الشباب فلاحين و متعلمين بينهم رجل يعتقد اتفاقات معهم بشأن تسفيرهم للخارج، أمامه على الطاولة مجموعة من جوازات السفر .

المجموعة الثانية: ثلاثة رجال متقاربون فى العمر(فى الخمسينيات من أعمارهم) يتحدثون فى موضوع يوشك أن يؤدى الى معركة قد تدور فيما بينهم .

المجموعة الثالثة: شابان يبدو عليهما الضيق - يمكن اعتبارهما من الشباب المثقف، أو الرفض، يبدو أن ثقافتها أو بالأحرى رفضها ليس بناء على فلسفات راسخة، وإنما هو أشبه بفهم ذاتي تكون نتيجة الاهتمام البالغ بالاحداث الجارية فى المجتمع .

يلاحظ أيضاً تفرق بعض التى يجلس عليها بعض الزبائن الذين يبدوون وكأنهم فقدوا صلتهم بالعالم، بحيث يشكلون فى تناثرهم وعدم اكترائهم خلفية للأحداث أو ما يسمى بأوضاع القرية أو روحها العامة

يجري الحوار صامتا بين أفراد كل مجموعة على حدة .. ففى المجموعة الاولى يبدو أن ما يجري هو مناقشات حول حجم المبالغ المفروض أن

يدفعها الراغب فى السفر الي الرجل الجالس وسط هذه المجموعة .

أما فى المجموعة الثانية فالأمر رغم كونه يتم بالحركة فقط الا أنه يوشك أن يتحول الى قتال حقيقى ..

أما فى المجموعة الثالثة فهى تراقب ثم تعلق بما يفيد الضيق والسخرية والمرارة .

يستمر هذا الوضع لفترة قصيرة ، ثم فجأة ينفجر الصراع فى المجموعة الأولى وعلى النحو التالي:

شاب : (منتفضاً) انت واخذ منى فلوس بقالك سنة ونص يا خضرى

الخضرى : طيب وأني اعملك ايه يعنى ؟

الشاب : أنى عايز التأشيرة . زمايلي كلتهم سافروا .

الخضرى : جوازك فيه غلط .

الشاب : غلط ليه ، حاططك فيه صورته أمة ؟

الخضرى : لأ المهنة . المهنة يا بجم .

الشاب : المهنة عندك فى البظبورت فلاح ، مهنتى فلاح .

الخضرى : طيب يعملوا ايه بالفلاح يا فالح ؟ الفلاح يعمل ايه فى السعودية يا أبو مخ نور ؟ ماتقول؟

الشاب : يزرع .

الخضري : (بسخرية) يزرع ؟ أياك أنت فاكراً هناك بهائم وزرايب وجلة
زى اللي بتاكلها هنا ؟ يا بجم أفهم ؟ المهنة لازم تكون عامل .
عامل يا اخويا .

شاب آخر : طيب أني البطبورت بتاعي المهنة فيه عامل .

الخضري : إيوه أني عارف .

الشاب : (وكأنه اوقع الخضري في فخ) آمال معملتلش التأشيرة ليه ؟

الخضري : علشان اسمك ، اسمك يا خويا عمل لنا مشكله مع السفير .

الشاب : واسمى مزعل السفير في إيه ؟ اسمي في البطبورت واضح زى
الشمس . عبد النبي إبراهيم النمر .

الخضري : و علشان اسمك الحلو ده يا فالح السفير رفض يملك التأشيرة
(بحدة) لازم تغيره .

الشاب : (يصيح) اغيره ؟ لسه ها اغير اسمي؟ مصيت دمي وختلتي
ابيع القيراطيين اللي حيلتي وبعدين جاي تقولي غير إسمك .
علشان إيه ؟ اه ؟ إن كان علشان النمر اهو الملك هناك إسمه
فهد ، هو يعني كان حد قاله غير اسمك .

الخضري : لأ يانور، مش علشان النمر، علشان عبد النبي، فهمت يا فالح؟

عبد النبي : (وهو في حاله هياج) ايه الكلام ده يا خضري ، انت عايز
تتصب نصبة جديدة ،

(1)

اني عايزفلوسى . هات فلوسي يا نصاب .

شاب آخر : (محاولا تهدئه عبد النبي) يا عبد النبي افهم (يأخذه بعيدا)

الخضري : اني نصاب يا عبد النبي ؟

الشاب الآخر: (وهو يأخذ زميله بعيدا) اني ففهمه يا خضري (الي عبد
النبي) ماهو مفيش عبد النبي يا عبدالنبي بيدخل السعوديه ،
دول هناك ناس مؤمنين يا عبد النبي ، واحنا هنا أهالينا بهاهيم
أبوك حمار .. قصدى مبيفهمش ، عبد النبي ده آسم واحد كافر
،يدخل آزاي السعودية ؟ فهمت؟

الخضري : فهمه يا محروس (الي عبد النبي) أهو محروس ده يسافر .
يدخل السعودية بأسهل ما يمكن ،لأن أسمه محروس ، شوف
(يفتح له جواز سفر) أهو (يقرأ) محرووووس (يكتشف فى
الجواز شيئاً) ايه دى . (الي محروس) ايه دى يا محروس دى
صورة ياوله ،ورينى عينك كده يا محروس (ينظر في عينيه
وبدهشة) يخرب شيطانك ، ده انت احول ياوله ، وفى الصورة
اعمي (بحزم) يامحروس هناك ما بياخدوش واحد آلا أذا كان
صاغ سليم .

(يتحول الحوار الي الطريقة الصامتة ، فيما ينفجر الحوار فى المجموعة الثانية)

عبد الرحيم : اني مش بايع .

مصطفى : خلاص ،اني هأخذ نصيبى من الارض ع السكة .

عبد الرحيم : والله يا مصطفى لو نشفت دماغك لكسرهولك بالفاس .

(يتصاعد النقاش فى هذه المجموعة دون صوت إذ ينتقل المشهد الي المجموعة الثالثة)

فوزي : اهو كلام ، زى كل الكلام اللي كل يوم بيقولوه .

شكري : لأ بيأكدوا . بيقولوا إن الوجه البحري كله عايم علي بحر بترول، وبالذات فى الحزام اللي بيضم الغربية والبحيرة .

فوزي : مش مهم البترول يا شكري . المهم فلوسه ، هنعمل بيها إيه .

شكري : بس إياك الكلام ده يكون بصحيح . وقتها البلد هاتتغير يا فوزي.

فوزي : يعني انت عاجبك اللي بيعملوه فى دول البترول . انت عارف فلوس البترول بيتعمل بيها إيه (تثير إنتباهه أشياء ناحية الطريق المؤدي إلي

(2)

المحطة) مش ده عبد العاطى ابن خضرة .

شكري : (وهو يضحك) ايوه، هو ياسيدي، بيدور علي سفره هو كمان.

(يدخل عبد العاطى)

عبد العاطى : (بصوت عال) سلام عليكم. (يرد الجميع التحية بشكل متتالي) .

الخضري : (بالحاح) إتفضل يا عبد العاطي ، تعالي ، يا جدد تعالي امال (الي الجرسون) هات حاجه لعبد العاطى يا شحات .

عبد العاطى : تشكر يا اخويا ، انى مش عايز اشرب حاجه . انى شربت ياما (بحده) واد يا محروس ، انت يا محروس .

محروس : (وهو جالس) ايوه يا عبد العاطى ، ما تيجي ، انت هتفضل واقف كده ؟

عبد العاطى : (بنفاد صبر) انت هتقوم ولا انشالله عنك ما قمت .

محروس : (وهو يسرع إليه) انت عامل زى الحلوف كده ليه يا وله ، أمك ماتت ؟ (يضحك ثم بود) ايه ي ابد العاطى حصل ايه ؟

عبد العاطى: (وهما منفردين) الخصري ابن النصابه ده الفيزا بتاعته
مضروبة (ينزعج محروس ويهم بإتخاذ موقف ضد الخصري
غير أن عبد العاطي يجذبه بقوة ويجبره على سماعه) بلاش
هبل يا محروس خد فلوسك بصنعة لطافة وانقد بجلدك

محروس : طب انت عرفت منين ؟

عبد العاطى : م الحاجه سنيه ،الولية دى عندها كل الأخبار ، هات
البظبورت بتاعك وروح عليها دوغري ، خش من غير إحم ولا
دستور . انى قتلتها عليك .

محروس : (بلهفة) هي جاييه فيزا ؟

عبد العاطى : (بود) (وهو يضحك) هنسافر سوا يابن الهبله ،الحاجة سنيه
جاييه فيزا بإتتين ، (بفرح شديد)

واحد بواب على قصر الملك وانى اخترتك يابن العورة للشغلانة العني دى .

محروس : (بلهفة) والتانى ؟

عبد العاطى : (وهو يتلفت حوله) بس اوعي تجيب سيرة لأي مخلوق .

محروس : عيب يا عبد العاطي .

(3)

عبد العاطي : (بحذر) بياع بترول يا وله .

محروس : في الكوبانية ؟

عبد العاطي : إنت بتزق كده ليه يابن الأهل انت ، كوبانية إيه ، اني اللي هبقي واقف عالبراميل ، واللى عايز بحسابه .

محروس : بس الزباين كلتهم اجانب يا عبد العاطي .

عبد العاطي : إنشالله يكونوا عفاريت ، اللي يدفع ياخذ .

محروس : واللى ميدفعش ؟

عبد العاطي : بالبلغة ، و آخر النهار آجي اورد للملك ، يعني كل يوم هافوت عليك واني داخل للملك واني طالع من عنده .

محروس : طيب اقعد اشرب ايها حاجة علي ما اجيب الفلوس من ابن النصابة ده .

عبد العاطي : اني سارح ، خذ الجواز بصنعة لطافة و روح عالحاجة على طول و بعد ما تخلص تعالي عالارض ، اني معلق الجاموسة علي الساقية (وهو ينصرف) سلام عليكم ، سلام عليكم ياخضري يا نصاب .

الخضري : طيب يا عبد العاطي ها اقول لأمك ،هاخلص كل ده من خضرة
يا بن خضرة .

(ينصرف عبد العاطي فيما يعلو النقاش فى المجموعة الثانية)

سليمان : يا ناس انتوا اخوات مش كده .

عبد الرحيم : (بحدة) ما انتش شايف يا سليمان . عايزني ابيع له نصيبي
علشان ابنه يعمل قال ايه كازينو ، عايز يعمل كرخانة فى
الارض اللي الراجل الكبير ضع فيها عمره (الي مصطفى) طب
تلاته بالله العظيم ما يحصل يا مصطفى .

مصطفى : (بحدة) هي الارض بتجيب إيه ؟ ما حد يقول له يا عالم ، هو
ماسك فى الفلاحة قوى كده ليه (لأخيه) طيب هيا بتجيب لنا
إيه؟

عبد الرحيم : انشالله عنها ما جابت .

مصطفى : (الي سليمان) انا يا سليمان ما بخدش م الارض دى حاجه .

عبد الرحيم : هو احنا مش بتقسم ربحها بالنص ، ماهو علي يدك يا سليمان
،انى باخد اكتر منه ؟

مصطفى : (بيأس) يدوب لو فاض م الارض حاجه .

(4)

عبد الرحيم : اهو اللي ببجري علينا ببجري علي الناس ، آدى الله وآدى حكمته ، تقول للحكومة لأ؟؟؟!!

مصطفى : لأ.... الحكاية مش كده الحكاية إن انت طمعان ، متهياً لك إن ابني هايجي من السعودية يتجوز بنتك ، تقوم انت تكوش علي الواد وعلي كل حاجة . (بحزم) اني هاعمل للواد كازينو على حقى فى الأرض وع السكة .

عبد الرحيم : (وهو يهيم بضربه) إخرس يا كلب ، الكرخانة دى مش هتعمل على أرض اجدادى ، هافضل أزرعها . وان كان علي بنتي يا نذل . عبد العاطي ابن خضرة كلمني عليها ، واني كنت عاملك قيمة طلعت م الدار هو وامه قفاهم يقمر عيش ، لكن بعد كلامك ده عزيزة لعبد العاطي ، وانت روح اعمل الكرخانة دى فى أيتها خراية .

سليمان : يا جدعان الكلام مش كده ، بالهداوة .

مصطفى : اني هاروح للعمده ، الواد متشعلق في الكازينو ، عايز ينجر البلد وانتو عايزين تفضلوا بهاييم ، انى رايح للعمدة (يندفع خارجاً) .

سليمان : خد يا مصطفى ، يا جدع إ عقل ، هاتتحل تعالى (الي عبد الرحيم) جري ايه يا عبد الرحيم ؟ ، هو يعني صحيح الأرض

بتجيب إيه ، والله احنا ناقصنا فى البلد هنا كازينو .

عبد الرحيم : (بخيبة أمل) أسكت يا سليمان .

(يتناقش عبد الرحيم وسليمان بدون صوت ثم يتضح تدريجيا مايدور فى
المجموعة الثالثة)

أمال بس الناس ها تعمل ايه .

فوزي : ياشكري ، البترول جه المنطقة العربية فى وقت غير مناسب .

شكري : نعمة ونزلت عليهم ،يرفضوها ... يسيبونها من غير استغلال .

فوزي : استغلال اهو انت قلت استغلال .

شكري : ايوه ، استغلال ، يبيعوه ويتمنجهوا بفلوسه .

فوزي : (يقف و بحدة) غلط...المنجهه غلط..مش غلط ويس ، (يهدأ)

المنجهه يا شكرى بفلوس البترول جريمة (يعود الي مكانه) هو

البخار يا شكري مش طاقة زي البترول تمام ؟

شكري : مش فاهم.

(5)

فوزى : لما اوروبا اكتشفت البخار مقلتش نتمنجه...مكنش اول حاجة جت على دماغهم ساعة اكتشافهم للبخار إنهم يبيعوه ، لكن إستغلوه ، إستغلوه صح ،حولوه لقوة ، لروح جديدة ، غيروا بيه كل حاجة ، مابعوش هناك الأرض.لكن زرعوها بطريقة جديدة ، استخدموا البخار كقوة دفع أكبر تدفعهم لقدام ، لفوق...لكن الجماعة بتوعنا (يشير الى الناس و الي اشياء غير منظورة) حولوه لجرح ، كل بير جديد يفتح . يفتح معاه جرح أكبر ، يزود شقة الجرح القديم فى جسم المنطقة ، الثقب اللى فى روح الانسان العربى ببوسع....إحنا بننزف يا شكرى ... بنموت رغم كل الفلوس اللى جاية من النفط ده .

شكرى : مش شايف إن انت محبكها شويتين ؟

فوزى : إحنا كلنا بنبيع رخيص ... بنشتري أردأ بضاعة .

شكرى : والله انا ما عدت فاهم كلامك .

(فجأة تنشب معركة بين محروس و الخضرى)

محروس : (و هو متشبث بخناق الخضرى) هات فلوسي يا نصاب .

الخضرى : ده جزاتي يا اهل يا ابن الأهل .

محروس : هات فلوسي يا ابن الحرامية .

الخضري : يا ناس ..أني اعمل لابن الهبله ه إيه ، بعد ما خلصت الاجراءات كلها طلع أعور أعمل ايه يا عالم .

عبد الرحيم : (متجها نحوهما و بغضب) إيه هو ده يا ولاد الآبالسة
إنت مش هاتبطل أمور النصب ده يا خضري ... إدى للواد
فلوسه .

الخضري : جري ايه يابا عبد الرحيم ... أنى عملتله كل حاجة ، وفى آخر
لحظة الراجل السعودى اكتشف انه أعور ... أعمل إيه أنى
يعني .

عبد الرحيم : ثلاثة بالله العظيم إن ما جبت فلوس الواد الغلبان ده لأكون
مخلص عليك (يطبق فى رقبته)

الخضري : (الذى كاد أن يختنق) طيب..... سيب سيب
(يتركه) هات (الى محروس و بحزم) الفلوس كام يا وله.

محروس : تسماية .

عبد الرحيم : (بحدة) هو انت هتجيب كام تسماية من هناك يابن المهايل
(الى الخضري)

(6)

تسماية مينقصوش مليم يا خضرى .

الخضرى : (و هو يخرج النقود من جيبه) والله العظيم ده ظلم يا عبد
الرحيم (يعد النقود فيما يدخل جميل من ناحية طريق المحطة،
و جميل شاب متألق و إن كان وجه دميما . يتجه ناحية
المجموعة الثالثة)

جميل : سلام عليكم .

(يرد الجميع التحية فيما يجلس الخضرى غاضبا و يتجه عبد الرحيم الى
مقعه)

الخضرى : حار و نار فى جنتك يابن العورة .

عبد الرحيم : عوضك علي الله فى المية جنيه دول يا محروس ،مهو إنتوا
تستاهلوا (الي سليمان) البلد اتجننت يا سليمان .

محروس : (بغيط) المية الجنيه دول هتحيب بيهم كفن لأمك يابن
النصابة.

سليمان : أهو كله بيدور على رزقه يا عبد الرحيم .

عبد الرحيم : هو حد قال حاجة ... بس أهو انت شايف بعد ما بيرجعوا
بيعملوا إيه اللي يقولك كازينو ، واللي يقولك مخروبة ، اللي

محدث قال نوع التربة دى علشان المية ... فكرك يا سليمان
واحد من دول بيرجع يقول يا أرض ... كله بينسي أصله .

(يختفي الحديث بين سليمان وعبد الرحيم بينما يكون جميل قد جلس بجوار فوزى)

فوزى : (يصفق للجرسون) يا شحات ... انت يا شحات .

الشحات : إيوه جاى .

الخضرى : (فى محاولة لتقديم الواجب الى جميل قبل فوزى) إنت يا زفت
يا شحات .يا زفت .

الشحات : ايوه يا نصاب ، عايز إيه ، هاتطلب حاجة على حسابك ، ما
انت قاعد تطفح علي حساب الزباين مالصبح.

الخضرى : شوف الحاج جميل بيه ها يشرب إيه بسرعة وبلاش
لماضة....يا جميل بيه يا حاج إشرّب أيتها حاجة علي حسابي
....إتحرك يا شحات ... إعملك همة .

جميل : شكراً يا خضرى ... بارد يا شحات ... هات بارد و حياتك .

(7)

الشحات : (لنفسه و بامتعاظ شديد) والله ما بارد إلا انت ... حاضر .

جميل : (لفوزى و شكرى) هو إيه الحكاية ... أبوكوا عبد الرحيم ماله ... أنى مقابل عم مصطفى عمال يشوح بدراعاته زي ما يكون اتهيل .

شكري : إتحانقوا يا سيدى الاخوات مسكت فى بعضها .

فوزى : ابن عمك مصطفى متشعلق فى كازينو (بسخرية) عايز ينجر البلد .

جميل : والله فكرة هائلة إيه رأيك يا شكرى أنى فانتتى الفكرة دى.

(يأتى الجرسون بالمشروبات)

الشحات : (و هو يضع المشروب أمام جميل) على حساب النصاب قصدى على حساب الخضرى .

الخضرى : (فى محاولة لاستغلال الواجب الذى قدمه) يا جميل بيه .. يا حاج جميل .. يا حاج .

جميل : أيوة يا خضرى .

الخضري : قولى و النبى .

فوزى : (وهو يضحك) هايزلك بازازة الكاكولا .

الخضري : (وهو يقبل باتجاه جميل) إنت طبعاً بقالك زمان فى السعودية.

جميل : (متباهياً) طبعاً يا خضري .

الخضري : طيب قولى و حياتك ، السعودية ممكن تاخذ واحد أعمي ...
هو مش أعمي خالص ... هو بس بيحذف شمال شوية .

جميل : لاشمال و لايمين يعملوا بيه إيه ؟! اللي عايز يروح
السعودية لازم يكون مفتاح على الآخر يا خضري .

الخضري : اسم الله على مقامك ... طب لو كان يعني أعور ربانى كده
(يشير الى محروس) زي ابن العامية اللي هناك ده .

جميل : (يضحك بسخرية) لازم يكون صاغ سليم صاغ سليم

الخضري : (يتجه ناحية مقعد ، وهو يوثب محروس) سمعت يا أعمي
(يلاحظ تحفز عبد

(8)

النبي فيعود باتجاه جميل) طيب يا حاج واللى اسمه عبد النبي ؟

جميل : اللى اسمه عبد النبي يروح يقشر بصل (يضحك فيما يمتعض فوزى) الاسم ده بالذات لا يمكن (الى عبد النبي) ريح نفسك يا عبد النبيإسم عبد النبي ده ملوش الا موزمبيق وديه موزمبيق يا خضرى .

الخضرى : (و هو غارق في الضحك بينما يشاركه الجرسون في السخرية من عبد النبي) ايوه علشان يشتغل قرد .

الشحات : و بعد ما يرجع يفتح لنا هنا جنينة حيوانات .

عبد النبي : (غاضباً غير أنه يحاول الا يسمع جميل) و إنت يعنى كنت جميل قوى ... و النبي اللى سماك جميل ما بي فهم .. كتك ذيلة وانت شبه الجاموسة (الي الجرسون بحدة) بتضحك على إيه يابن المخبولة .

الشحات : (وهو ينصرف الى عمله) وأنى مالى ... إنشاللهحتى تروح الهند.

جميل : (بعد أن لاحظ عزيزة ابنه عبد الرحيم و هى تمر عبر الطريق الخلفى) مش دى البت عزيزة بنت أبوك عبد الرحيم ؟

شكرى : (وهو يشرب بعنقه) إيوه صحيح ... هي

فوزى : (مقلداً شكرى) إيوه هي ... البت دى بقت زي الفرصة .

جميل : ياهوه شايف يا شكرى شعرها ... البت دى كبرت مرة واحدة .

فوزى : اسكت يا جميل الراجل يسمعك .

جميل : (فجأة) بص الواد عبد العاطي رايح وراها .

(تهتم المجموعة الثالثة بمشهد عزيزة لبعض الوقت الى أن تختفى هي و عبد العاطي عن انظارهم فيما يسير الاثنان مع الطريق حتي يصلوا الى مقدمة المسرح حيث من المفترض الا يراهما أحد)

عزيزة : ينيك يا عبد العاطي (وهي فى حالة ارتباك) أبويا على القهوة.

عبد العاطي : خلاص يا بت أنى وديت البظبورت للحاجة سنية .

عزيزة : (بغضب) تانى ؟

عبد العاطي : شغلانة عنب يا عزيزة .

(9)

عزیزة : إن شاء الله تكون هتشتغل عمده هناك ... أنى قولتلك من زمان سفر
لأ

عبد العاطى : يا بت أنى هابقى الكل فى الكل هناك.

عزیزة : إيه يعنى .

عبد العاطى : يا بت افهمى الملك عايز واحد أمين علشان يبيعه البترول .

عزیزة : وهو مش عارف يبيعه.

عبد العاطى : يظهر والله و أعلم إن الخواجات بيخموهم فى الحساب ...
قاموا قالوا للحاجة سنية تجيب لهم واحد جدع و أمين علشان
يوقف الخواجات عند حدهم ... واللى ياخذ برميل يدفع واللى ما
يدفعش مايشمش ريحة الجاز.

عزیزة : طيب انت عملت مع أبويا إيه كلمته ؟

عبد العاطى : هو انت مش عارفة هو عمل فى إيه أنى و امى شفتى
؟ طلعا من الدار زى ما نكون عملنها على نفسنا .

عزیزة : يعنى ماكلمتوش تانى زى ما قولت امبارح ؟

عبد العاطى : إظمنى يا بت إنى وراه لحد ما يوافق.

عزيزة : طب و حكاية السفر دى .

عبد العاطى : هاخذك معايا ... هازورك النبى يا عزيزة .

عزيزة : أنى مش هسافر .. و بعدين هما مش بيقولوا ان البترول ده هيطلع
النواحى دى ؟

عبد العاطى : ده كلام يا بت انتى بتصدقى ؟ دا كلام .

عزيزة : طب لو طلع الجاز ده هنا ؟ تقعد ما تسافرش ؟

عبد العاطى : طب هو لو طلع ، إحنا نايبنا أيه ، مهى الحكومة هاتاخده
.... وهى اللى هاتبيعه ... هنا يا عزيزة عنيهم زى النسر ...
محدث يقدر يخمهم . هايبيعوه بالقطارة وياخدوا فلوسه ، واحنا
زى ماحنا.

عزيزة : أنى مليش دعوة عقلك فى راسك يا عبد العاطى يا
أنى يا السفر .

(تنصرف و هى غاضبة و تتركه حائراً)

عبد العاطى : عزيزةعزيزة (لنفسه) و انى لسه هاستتى لما يطلع هنا
زفت ، و حتى لو طلع ، كل الناس بتسافر و تجيب فلوس يا
عزيزة ، و أنى الكام قيراط خدوا عفيتى

(10)

و عافية أمى ، والدار زى الخرابة ، كلتهم قاعدين فى المسلح و احنا لسه
عايشين فى الطين (ينصرف منكسرافياً يتضح الحوار فى
المجموعة الثالثة)

فوزى : (الى جميل) أنا حسمت أمرى خلاص ها اشتغل هنا .

جميل : (وهو يضحك) فى الأرض برضه !!؟

فتوزى : وليه لأ ؟!!

جميل : أصل الحكاية دى مابقاش ليها غير معنى واحد .

فوزى : وهو ؟

جميل : الفشل الجمود على أفكار قديمة...قصر النظر وانعدام
الرؤيا الصحيحة الخوف وعدم القدرة على تحمل تبعات
المغامرة ... هنا معدش فى حاجة الواحد يقعد لها يعنى
اللى زيك بيجمد حاله و بيوقف حال البلد وياه ... وفى النهاية
مفيش حاجة بتتعمل .

شكري : طيب إنتوا عملتوا إيه بالمرونة وبعد النظر .. مهو مش معقول
كل البلد تهاجر .

جميتل : جيبنا عملة صعبة ، البلد شكلها اتغير ،شوف صفت مثلاً ،

بلدنا دى ، شوف كام جامع دلوقت فيها ، أدخل البيوت هتلاقى
التليفزيونات والتلاجات والفيديو كمان .

فوزى : (مستنكراً) منطق جميل القياس غلط يا جميل .

شكري : البلد اتغيرت صحيح بس للأسوأ شوف أبوك مصطفى
وابنه عاي.....

جميل : (مقاطعاً) الكازينو فكره حضارية سياحة يا أستاذ
إنت عاجبك شكل القهوة دى ؟

الشحات : (وهو يجمع الأكواب والزجاجات الفارغة) مالها القهوة دى يا
جميل أفندى ، خلاص .. بقت كخه ، ما أنت طول عمرك
بتقعد هنا وقبل ما تسافر كنت بتشرب ولا تدفّش .

الخضري : ما تختشى يا واد يا شحات ، هو ما عدش فيه أدب ولا ايه (الي
جميل) معلش يا حاج ، أصل لما أبن أبوك مصطفى يفتح يفتح
الكازينو الواد ده هایشحت ، هيا يبقي شحات بحق وحقيق .

عبد الرحيم : اتلم يا خضري اتلم يا ابن النصابه .

(11)

فوزي : (الي جميل) المشكلة يا جميل مش فى القهوة المشكلة فى
البنى آدم من جواه إنت وكل اللي سافروا ، إتحسننت
أحوالهم صحيح إرتحتم مادياً ، أنا معاك وده فى حد
ذاته شئ كويس لكن بقى يا حلو فى الشنط بتاعكوا وفى
دمغتكوا جبنتوا حاجه غريبة معاكم ، إتصورتوا غلط إن الحاجة
دى هي الحضارة أو التقدم زي مثلاً الكازينو القرية
السياحية.....

فوزي : الديكورات اللي على أرفع مستوى العلب اللي اغلب اللي
جايبين من بره وجايبنها معاهم ميعرفوش فيها ايه ، ولا حتي
يعرفوا يستخدموها ازاى إنتم جبتم فلوس صحيح لكن
عارف بعتم بيها ايه ؟

جميل : (بحدة وهو يقف غاضباً) إحنا مفرطناش فى أي حاجه
إحنا حبيننا بلدنا أكثر من اللي زيك لو تشوف احنا كنا أد
إيه بنشوق لريحة جاية من هنا ، ولا كلمة تجينا فى جواب ،ولا
حتى غنوة كنا ما بنطقش نسمعها زمان نسمعها قبل ما نساfer

شكري : جري إيه يا جميل فوزي مش قصده يزعلك .

فوزي : المسألة مش زياده شويه فى العواطف هو انت علشان
قعدت تسمع أروح لمين واقول يامين تبقي حبيت البلد أكثر ...

ولا علشان كنت بتحس بشوق للمكان اللي انت اتولدت واتربيت فيه تتبقى أميز مننا؟ يا حاج جميل ده شعور عام بيشارك معاك فيه كل اللي اتغربوا، حتى اللي ططالع من صفت وما راحش لأكثر من المحلة..... المسألة هي انت شايل فى دماغك ايه للمكان ده، إيه يعنى فكرتك عنه، ها تعمل علشان ايه، بتفكر فيه ازاي، طلعت منه ليه وراجع له تانى ليه، انت بنتشوف ناس المكان من أي ناحية، إيمانك بالمستقبل بقي من أي زاوية (بحدة) من زاوية الأنانية ولا من زاوية تفرق بينها مستقبلك بمستقبل الناس.... للأسف انت بتيجي ناسى كل حاجة، كلكم كده متهيا لكم إن الناس هنا وحوش عايزه تاكلكم وعشان كده بتقولوا نتغدى بيهم قبل ما يتعشوا بيكم..... (صمت) صفت اللي علمتك معنى الرجولة جاي النهارده تنزف دمها بالكازينو، تخذعها بالعطور، تدوس على قلبها بمشاريع ملهاش غير وصف واحد (بعصبية) انها مشاريع وحشية... تطلع فوق صدرها ببنائيات مفيش ممن وراها غير خراب للأرض بعد ما تحط فوقها أكوام من الخرسانة علشان تحمى بينها نفسك من الخوف القديم (بهذوء) وتحت البناية تعملك جامع.... جامع صغير زيادة فى الخديعة (يحتد) وكأن الناس الطيبين دول ناقصين جدرانك الخرسا علشان تصلى (يهدا) كان أبويا بيصلى فى وسط الأرض عالطينة..... وشفت جدى وكان جدك معاه وهما بيصلوا ع الطريق... هناك عند الهويس... كان وراهم فلاحين الزمام وكانت الأرض بتجيب خير يغرق الوادى

(12)

جميل : الغيرة والحسد والحقد اللي مالي قلوب اللي زيك هو اللي بيدمر كل حاجة طيبة .

فوزي : الكلام ده مش كلامك محدش قال ان الناس تبطل تدور على رزقها ، محدش قال اننا نقف نعص في ضوافرنا إنت بس مش فاهم

جميل : لأ أنا فاهمك كويس .

عبد الرحيم : ألا احنا مبيطلعش عندنا بترول ليه يا فوزي ؟

فوزي : البترول في صدرك انت يابا عبد الرحيم .

عبد الرحيم : (يبحث في صدره وهو منزعج) في صدري آني ، ينهار اسود ، داني بحسبك عاقل .

جميل : (الي فوزي) انت كل أفكارك غريبة كدهه ولا لأ يا شكري.

شكري : هي الحكاية قلبتوها غم ليه ؟

جميل : انت مش شايف كلامه .

عبد الرحيم : بقي آني في صدري جاز يا فوزي ؟

فوزي : البترول في قلب كل واحد فيكم فوقوا ، دوروا كويس هتلاقوا

بدل البير ألف بير .

الشحات : (وهو يشم نيسه) شم يابا عبد الرحيم ، والله آني شامم ريحه
بنزين والبت مراتي ريحه حنكها تكسفين .

الخضري : لأ ، وامك يا شحات أمك بنتكح أسفلت .

فوزي : حضرتك مش عاجبك .. لك حق ما هو انت من ضمن
المصايب اللي جاتلنا من ورا البترول .

الخضري : آني مصيبة ، والله العضميم انت غيران م الحاج جميل ، وعايذ
الناس كلتها تقعد تقشر بصل جنبك .

عبد الرحيم : بس يا نصاب انت ، جننتوا الجدع ، الله يخرب بيتكوا ، ما هي
حاجة تطير العقل ، كل واحد يجيب قرشين يجي يقولك كرخانة.

جميل : هو المشروع السياحي يبقى كرخانة فهو اللي عايز
ينصف البلد يبيقي كفر .

(13)

فوزي : (هائجاً) هي النضافة كلمة بنقولها وخلص ، النضافة ياسي جميل مش طريق مسفلت خالي من مطب ، وللا هي واجهة بوتيك مليانة باللمبات النيون ولا كازينو ع السكه مليون بالأغرات، ولا هي كل العطور اللي بتفوح من دوم وخنقاني،... بص حواليك ... رغم كل الفلوس اللي رايحة جاية إيه اللي حصل في البلد تقدر تديله قيمة شوف صفت بقي شكلها ازاي دلوقت هي دى صفت اللي كنا بنحلم بيها قبل ما تسافر ؟ .. شوفوا ازاي وشها اتحجر من كتر الاسمنت ، شوف ازاي متغفره وصفره زي ما تكون بتموت الطريق اللي من محطة السكة الحديد لقلب البلد ، اللي كنا زمان نمشييه وكأنا في طريقنا للسما ... كان زي ما يكون سكة آخرها بالضرورة جنبه شوفوا أد إيه عجز وكأنه شاخ مش بس كده (صمت) مبقاش في دماغ حد في البلد غير السفر ، الهرب ، وعلشان كده كل واحد فيهم مستعد يعمل أي حاجة حتى لو باع نفسه مهو فاضل ايه (يمر عليهم واحد تلو الآخر) اللب باع أرضه ، واللي باع نصيبه في دار أبوه ، واللي باع سريره اللي بينام عليه ،... وبعد ما بيجي من السفر لأنه فضل يبيع هناك ، والبيع بقي دم بيجرى في عروقه (صمت) ونروح بعيد ليه ، أدى ابن عمك مصطفى عايز يبيع عمه الأرض ، وانت نفسك (الي جميل) مش بقالك اسبوعين بتجري ورا عبد العاطي علشان يبيعلك الكام قيراط اللي حيلته أنا عارف انت

هتعمل بالأرض ايه وبعد كده يسافر عبد العاطى وييجي
 يبيّع واحد تاني أرضه ، وتفضل كده دوامة ملهاش نهاية لحد ما
 نلاقى الخضرة راحت والبراح اختفي ، لحد ما نلاقى نفسنا فى
 الآخر مخنوقين من كثر المسلح والحيطان وتتدفن الأرض تحت
 بناياتكم المربعة (يهدأ) هى دى النضافة ؟ (يتجه الي عبد
 النبى) عبد النبى ينسي اسمه اللي كان أحسن أختراع لأبوه !!؟
 هى دى النضافة ؟ محروس يهرب من شكله اللي مطبوع
 فى ضمير أمه ومراته وعياله ؟!! .

(ينتبه الجميع على صوت جلبه قوية وزعيق من ناحية المزارع . الصوت
 غير واضح نتيجة اقترانه بزغاريد وصياح أطفال واصوات رجال
 ثم يأخذ فى الوضوح)

الصوت : يا اهل البلد ، (زغاريد) البترول يا اهل البلد ، الجاز فى ارضى
 يا خلق ...

ياخلق ياهو ، والله بترول يا ناس ، بترول يا عالم .

(يظهر عبد العاطى ملوثاً بالطين من رأسه الي قدميه يحمل علي يديه
 الاثنتين كتله هائلة من الطين ، يمضغ من الطين ويبصق
 ويدخل ورائه اطفال ونساء ورجال)

عبد العاطى : بترول يا خلق هو ، البترول طلع لوحده يا جدعان ، فى ملكي
 يابا عبد الرحيم بحر تحت الدرہ يابا سليمان .

(14)

عبد الرحيم : وريني كده يا وله (يشم ثم يلوك قطعة) بترول يا ولاد بترول يا سليمان بترول بحق وحقيق يا بلد .

سليمان : (بعد أن شم ومضغ) هو ريحته جاز صحيح ، بس طعمه جلّه ، أني مش متأكد .

الشحات : مهو جميل أفندى هنا أهو ، واهو بيشتغل هناك فى السعودية ويعرف البترول طعمه أيّه .

عبد العاطي : بترول ياسى جميل ، بترول يا حاج جميل (يقرب الطين من فم جميل) هو مش ده زي اللي عندكم هناك ؟

جميل : (بثقة) هو البترول بيطلع لوحده ؟ ، دا لازم بيعوز أجهزه ومعدات (ويتعال) البترول بيبقى فى باطن الأرض تحت ... تحت خالص دا هناك عندنا فى السعودية بيدوروا عليه من فوق ، بالقمر الصناعي .

عبد العاطي : الأرض طقت من جنبها ، البترول طلع لوحده ، محدش كان هنا بيدور عليه ، طلع لى آني ، طلع فى أرضي ، البترول ده بتاعى يا بلد ، آني صاحبه

سليمان : آنى ارضى لازقه فى ارضك يا عبد العاطي .

عبد العاطى : البير فى وسط ارضى ، فى النص تمام ، يبقى البترول بتاعى
آنى ، إيوة ، لوحدى

سليمان : ياك حش وسطك يا عبد العاطى .

شكرى : يا اخوانا لازم تتأكدوا .

الشحات : إيوة يا عبد العاطى ، إدى للاستاذ شكرى حته يدوقها ، مهو
كان فى الكلية بتاع الحاجات دى ، و ضرورى يعرف بفرق بين
الجلة و البترول .

سليمان : إحنا نروح عالارض ضرورى بير الجاز ده محصل أرضى من
تحت ..الخيار اللى طلع من أرضى السنة دى كله جاز ،
طعمه جاز ، كدة ولا لأ يا عبد الرحيم

انت مش كلت من أرضى ديك النهار و رجعت تفتها فى وشى

عبد الرحيم : كانت مرة صبر

سليمان : إنت حمار كدة ليه يا عبد الرحيم ... كان طعمها جاز يا جدع.

عبد العاطى : (صارخا) البترووا فى أرضى آنى يا أهل البلد ، آنى صاحبه
و بسواد يا محروس.... يا عبد النبى — محدش يسافر
يا واد انت و هو ... آنى عندى بترول يا بلديا نهار مش
فايت يا خضرة ... السعد جه لغاية عندنا يامه ،

(15)

هاناكل مهلبية يا بلد ، هانشرب سوييا ووتر هندی يا ولاد...واد يا محروس..بكره تجینی من الفجر يا وله ... هانبیع الحمار يا محروس
لأ... ها نروح المحلة و نسيه هناك ... البترول بتاعی يا بلد .. أنــــ ...
(يدخل شيخ الخفر ووراء العمده و مصطفى)

شيخ الخفر : وسع يا واد انت و هو .. ايه الهیصة دی يا بلد (یصادفه
بعضهم فی طريقه) ايه يا خويا انت و هو ... وسع كدة
متقفش مبلم .

العمده : إيه ياواد يا عبد المعطي الهوسة اللي انت عاملها دی يا وله
.... و انتم إيه اللي لمكم كده زى الخرفان (ينشغل عبد
المعطي مع شيخ الخفر فی محاولة لاثبات ان ما يحمله
بترول) خلاص ، معدش فی احترام للبلد (الى فوزی) وانت يا
ابو العریف ، كل يوم تعملك سامر عالقهوة (الى الشحات)
طيب يا شحات المخروبة دی هابرشمهالك إنشالله .

الشحات : و آنى ذنبى إيه يا عمدة ، هو آنى همسك السنة الزباين ... كل
حاج....

العمتدة : (مقاطعاً) إخرس (ما زال شيخ الخفر يتذوق الطين) والرجالة
الى فاكركم كبار و فى دمغتهم عقل ، خلاص ؟ (الى عبد
الرحيم) أخوك عايز يعمل لابنه كازينو ، عايز يعمل مستقبل،

تقف في سكتة ؟

عبد الرحيم : (يغضب) مهو لو خد عالسكة ، الأرض هاتبور ، هاتخرب ، طيب أروى من أيتها داهيه لو هو خد حقه عالسكة ، أند

العمدة : (مقاطعا) أنى هاشترى منك نصيبك ، أنى هاخده مخروب .. علشان خاطر ابن أخوك اللى متغرب فى بلاد الناس ده ...إيه قولك بـ ... (فجأة و بصوت عال) مش جلة ، بترول بحق و حقيق يا عمدة ... تلاته بالله العظيم بترو...

العمدة : بتقوا ايه يا شيخ الغفر ، هى العيال لحسوا مخك ولا ايه ؟

عبد العاطي : بترول يا عمدة ... البترول طلع فى ارضى يابا العمده ... ثم (يقرب الطين من وجهه) البترول فى ملكى يا ناس

العمدة : بترول ايه يا جدع انت و هو انتوا اتهبلتوا فى مخكم ؟ ... جرى ايه يا شيخ الغفر ما تركز كدة او مال ... (يقرب عبد العاطي الطين من وجهه أكثر)إف (يبعد يد عبد العاطي بالطين) إيه يابن خضرة ... إنت ريحتك فايحة جاز كدة ليه يا وله ؟

عبد العاطي : أمال آنى بقول ايه من الصبح ؟ .. جاز ابوة ...بترول .. بترول من بتاع السعودية يا عمده .

(16)

العمدة : (بعد أن شم مرة أخرى ليتأكد) ينهار مش فايت ، إيوة يا وله الشرب كله جاز .

مصطفى : (بعدة) زفت إيه ده اللي بنقول عليه يا عمدة...آنى عايز اعمل الكازينو الواد كل يوم بيعت لى جواب .

العمدة : اصبر يا مصطفى (الى شكرى) يا شكرى .. إنت يا شكرى...

شكرى : إيوة يابا العمدة .

العمدة : بنترول ده ولا ايه الحكاية ؟

شكرى : باينها فرجت يا عمدة الحكاية يظهر بصحيح المرة دى .

مصطفى : (مقاطعا) آنى هاعمل الكازينو ولا لأ.

العمدة : يا مصطفى ده دى ... لوالحكاية طلعت بحق البلد كلتها هاتبقى كازينو...بيقولك فرجت ... مش يمكن البنترول تحت البلد كلتها ... اصبر يا مصطفى (منادياً) يا شيخ الغفر .

شيخ الخفر: إيوة يا حضرة العمدة .

العمدة : قوام ورقة و قلم ... ورقة وقلم من ايتها حته ... إنت هاتقف

فاتح بقق كدة يا جدع اترك ورقة وقلم قوام .

(يحضر الشحات مقعداً فيما ينصرف الشيخ)

العمدة : إيوة .. مهو لازم يجى ...أمال احنا اللي هنطلع... ضرورى حد يجى علشان يجبولنا المكن اللي يطلع البترول ده من تحت.

عبد العاطى : نطلعه بالطنبور يا عمدة .

سليمان : والله العظيم نطلعه ونطلع أبوه بالشوايف يا عمدة ...

لا حد يجى ولا توجع دماغك يا عمده ... إيوة هو احنا شوية فى البلد دى ولا إيه .

العمدة : (بانفعال) طنبور إيه وشادوف إيه اللي هاتطلع بيه ... طلعت روحك منك له هي بس غلبه ...يا اهبل انت و هو البترول ده تقيل ، تقيل ياابو مخ طخين ، يطلع ازاي بقه بالطنبور !!؟ (يدخل شيخ الغفر بالورقة و القلم)

شيخ الخفر : الزفت و القلم

العمدة : (بعد أن فوجئ) زفت يا زفت انت ... نهار أبوك طين .

(17)

شيخ الخفر : لا مؤاخذه يا جناب العمدة انى قصدى يعنى ، قصد

العمدة: إنتيل كتك داهيه فى منظرک (يتناول منه الورقة و القلم)

(يجلس العمدة يفكر لفترة) نكتب لمين ؟... مين اللى مختص بحكاية الجاز
يا ولاد يعنى نكتب نقول يا حضرة المحترم مين؟

عبد العاطى : (فجأة بصوت عال) إكتب لامريكا يا عمدة ... إبعث لى
هايشترى .. إيوة أمريكا هى اللى هتيجى .

العمدة : يا واد أنتيل .. ما تصبر على رزقك .. هو إيه ده اللى أمريكا..
إنت عايزنا نبوظ التسلسل الوظيفى .. هى سايبه كده؟ ..مننا
لامريكا لطع ؟

محروس : (مؤنباً) جرى إيه يا عبد العاطى ... إنت عايز الخواجات تيجى
تخمنا فى الحساب ؟ و يضحكوا علينا ؟

مصطفى : نكتب لابنى فى السعودية و هو يجي يتصرف هو بيتغل
هناك فى البترول وعارف كل حاجة .

عبد العاطى : إبنك ده ملوش دعوة بالبترول بتاعى خالص

مصطفى : ليه بقى ده جزاتى يا عبد العاطى ؟ ... ده جزاتى يعنى ؟

عبد العاطي : آنى بَعَت له علشان ياخذنى هناك ، قال إيه يقولى انت متنفّش عنا يا عبد العاطى ..إنت متفهمش فى البترول ... طيب أهو بقى عندى بترول واقدر أَشْغَل عشرة زِيه ، ثم إن ابنك ده بفهم فى البترول ؟

مصطفى : إبنى يعرف كل حاجه فى البترول ، أمال هما ماسكين هناك فيه هناك ليه يا فالح و مش راضيين يخلوه يجى أجازه ؟

جميل : (ببرود) إبنك مايعرفش أى حاجة .. دا حتتة فراش لا راح ولا جه .

العمدة : (فجأة) نكتب للوزير ..لأ.. للرئيس ...إبوة للرئيس ، دا بترول .
إبوة للرئيس...

عبد العاطي : (مقاطعا) لأمريكا

العمدة : الله يخرب بيتك يابن خضرةأمريكا.أمريكا .. هو اللى طالع عليك اسمه أمريكا يا واد انت آنى مقدرش .. الرسميات يا بنى آدم .. لا يمكن .. التسلسل إحنا هنكتب

(18)

للجماعة بتوعنا وبعدين نشوف (يبحث عن أحد وسط القهوة) هو الواد فوزى
 راح فين ؟ ... إختفى؟..الواد ده الوحيد اللي يغرف يكتب كلمتين
 حلوين ...

(يبيرز فوزى من وسط المقهى)

الخضري : (يرى فوزى) إنت مش عاملى كاتب ولسانك طول كدة
 ..(يلاحظ أنه مازال بعيداً عنه) قرب هنا هوه ... أنا عايزك
 تكتب كلمتين كدة للرئيس خبط لزق .

فوزى : بشرط...

العمدة : (منزعجاً) شرط ؟... انت هانتشرط يا فوزى ...

فوزى : لأ يا عمدة الحكاية أصلها مجرد شك وعلش...

عبد العاطي : (بغضب وحدة) ياك شكّه فى حبابى عنيك .. إنت لسه هاتقعد
 تضرب غلبه آمال ده إيه ؟ (بضع الطين فى وجهه) إنت
 منخيرك مسدودة ؟

جميل : دا عايز يتكلم و خلاص .. يمكن يفتى فيها و يقول إنه يعرف
 فى البترول أكثر منى ... الحكاية يا عمدة أن فوزى ده بتاع
 كلام و خلاص .

الخضري : (الى فوزى) إنت يا جدع انت توقف المراكب السائرة ...
صعبان عليك إن البلد يطلع فيها بترول ... الحاج جميل قال
انه بترول يبقى بترول .

العمته : (الى فوزى) إنت عايز تتفلسف و خلاص فى كل حاجة؟
...كل مانقول حاجة نقول لكن...إنما...المفروض...

عبد الرحيم : جرى إيه يا اخونا.....هو الجدع لسه اتكلم ؟

فوزى : سيبهم يابا عبد الرحيم (الى عبد العاطى) بتشتمنى يا عبد
العاطى ...؟ معلىش ...لكن لازم تعرفوا و بعدين انتوا أحرار
...إبوة زما بقول و العمده أكثر واحد هنا عارف الكلاك ده
....إحنا يدوب شميننا ريحة جاز و....

عبد العاطى : ودوقناه كمان (يقرب الطين من فم فوزى) خد يمكن تقتنع .

فوزى : برضه مش لازم الحكاية تبتدى أوسع من اللازممش لازم
نقع فى الغلط يا عبد العاطى ...أنا ... أنا نفسى الكلام ده
يكون صحيح .. أنا اتمنى إنك تبقى أغنى واحد فى البلد دى يا
عبد العاطى ... مش فى البلد ويس اغنى واحد فى العالم كمان
...إنت تستاهل كل خير ..أنى عارفك ..انت ابن اصول واللى
هايعم عليك هايعم على البلد كلتها .. يا ريت يا عبد العاطى
يكون الكلام ده بصحيح ... بس بلاش نستعجل علشان
منضيعش كل حاجة مرة واحدة..الحته الطينه اللى فى إيدك دى

(19)

تشاوى تقلها دهب .. حته الطينه دى اللى نصها جلّه زى ما انت شايف...
عبد العاطى :كلها بترول

فتوزى : (بعده) إيوه .. هى أغلى من برميل بترول .. وعلشان كده
بلاش نضحى بيها قبل ما نتأكد... يا عبد العاطى مش لازم
يجوا يجرفوا أرضك قبل ما يقولوك تحتها إيه بالظبط .. ياخدوا
عينه بس من أرضك ..يايا سليمان عينه بس مش أكثر من
اللازم وانت يايا عبد الرحيم الأرض زى البترول تمام دهب
...علشان نضحى بيها لازم نتأكد ان البترول موجود...ومش
بس كده....لازم نتأكد إنه موجود بالكمية و بالقيمة اللى تعوض
لنا ضياع الارض ..و..

جميل : (مقاطعاً) بالزمة حد فاهم حاجة ؟

فوزى : مش كنت لسة بتقول أنهم فى السعودية ..عندكم..بيدوروا عليه
من فوق ؟

العمدة : هى أرض ابوك ؟... ازم يحفروا .. لازم يطلعوا بطن الأرض
من جوه ... إنت هتزلنا علشان كلمتين قصدناك فيهم ؟إنشالله
عناك ما كتبت .

جميل : هات يايا العمدةإنتوا اللى عملتوا له قيمة.

الخضري : و قال إيه عاملى مثقف .

(يجلس جميل ويأخذ فى الكتابة)

العمدة : اكتب يا حاج جميل ...قولهم ان البلد عاصمة على بحر بترول
....قولهم يجوا يطلعوا كبد الارض و يطلعوه ..

عبد المعطى : يجوا يطلعوا مصارينها .

فوزى : (بحدة)عايز توسع الحكاية يا عمدة.

العمدة : انشكح يا واد انتتلاته بالله العظ....

فتوزى : الفرصة جت لحد عندك ..عايز تعملها هيصة حفرعايز
تدفعهم يجوا يحفروا ، و يبورو الزمام (للجميع) ياأبا سليمان ..
يا عبد المعطى .. المحصول قام ينور ..وانتوا ظروفكوا تعبانة
.. الأرض اذا اتجرفت من غير لزوم، قبل ما نعرف الحكاية
صدق و لا وهم هاتبور (الى العمدة) مش كدة يا عمدة (الى
جميل) مش كدة ...يا حاج .. الأرض تبور .. و بعدين انتو
تيجوا تشتتروا بالرخيص ..مهو انتو اللى معاكوا الفلوس (يخاطب
الجميع) يا ناس .. اذا العينة قالت ان البترول أكيد

(20)

اهلاً وسهلاً.. مستعدين حتى نطلع من بيوتنا .. كلنا نحب الخير للبلد .. مين
 ميحبش الخير لأهله و ناسه بس اذا العينة قالت لأ ، يبقى
 المحصول نحصده سوا فى ميعاده .. الأرض تفضل بعافيتها
 علشان بعد كده نزرع و نقلع ...

شيخ الخفر : إنت هاتفضل تبوأ كدة فى حضرة العمدة ... إنت معدش حد
 مالى عينك يابن ابو حجر ..

ايه اللى نعم ...ايوه .. لأ...ياك لأه فى سيرك .. إنت ما بتزهقش
 من الكلام؟

جميل : (بعد أنهى عملية الكتابة) خلاص يا عمدة ...مش هايكذبوا
 خبر .

العمدة : براوا عليك يا حاج أهو كده الكلام ... خد يا شخ الغفر .. أنى
 بعدين ليا كلام مع أبو لسانين ده ... ودى الورقة دى عالمكتب
 قوام ..خليهم يعملوها تلغراف مستعجل ..قوام.

شيخ الخفر : حالاً يا جناب العمدة (ينصرف) .

عبد المعطي: كتبت لأمریکا يا سى جميل ؟

العمدة : إخرس يا واد انت .. بينا عالارض يا رجاله.. بينا علشان نورى
لأبو حته زايدته فى لسانه دهان الحكاية مش كلام ... هى عايزة
زكاوه ؟ مهى العينة أهه (تعلو الزغاريد و يصيح الأطفال و
ينصرف الجميع

ستار

الفصل الثاني

(21)

"بيت ريفي ، يتناثر في الأثاث باهمال شديد . في الصدر صندوق كبير ، على اليسار زير و بعض الزلع و المقاعد المتفرقة بلا انتظام. في الجانب الأيمن نافذة صغيرة تطل على الشارع وفي الواجهة الى اليمين باب البيت المؤدى الى الحوش ومن ثم الى الشارع"

(بمجرد فتح الستار يأتي صوت عبد العاطي وهو ينادى بأعلى صوته)

عبد العاطي : يامه .. يامه

(يندفع عبد العاطي داخلا من الباب الرئيسي وهو بالكلسون و الصديري ولا يزال ملطخا بالطين)

عبد العاطي : يا وليه انتى فين ؟.. يامه (يدور فى ارجاء البيت باحثا عنها)

خلاص يا خضرة .. هاتبقى .. هاتبقى (يقف مسائلاً نفسه)

هاتبقى إيه ؟؟ (يجد الاجابة) هاتبقى عمدة يا خضرة .. يامه .

خضرة : (تدخل منزعة) إنت مسروع كدة ليه يا وله ؟ (تلاحظ الطين)

إنت وقعت ف الحوال تانى !.كتك ألف وكسة .. هو انت

يوماتى تجينى غرقان كدة ؟

(تحضر الطشت و تضعه فى وسط المسرح وتتجه ناحية
الزير) إمتى بقى تتجوز وتيجى مراتك تشيل هم اللى أنى
شيلاه ؟..ضيعت عاقيتى .

(22)

عبد العاطى : (وهو منشغل بالبحث عن أشياء خلف الصندوق) خلاص يا
خضرة ... هاترتاحى .. مش هاترتاحى و بس (يتجه إليها) دا
انتى هاتبقى ست البلد ..

(يأخذ يديها و يقفز كأنه يرقص و يدور بها فى المسرح)

خضرة : (تضحك) يا واد ملتتى طين .. يا واد مش قادرة ... الله يجازى
شيطانك يا عبد العاطى (يضحك عالياً يثم يتركها و يستمر فى
الرقص فيما تابعه هى بارتياح) إيه اللى جرى يا وله ؟ .. إنت
شوفت عزيزة النهاردة ؟

عبد العاطى : عزيزة إيه يامه .. شوفت القمر (يتجه إليها) إيوة القمر (يأخذ
وجهها بين يديه) ضحك لى يامه ... كانت عينيه زى عنيكى
كدة تمام .. كان بيضحك يامه ضحكة أوسع من فدان الغلة ..
قال لى يا عبد العاطى إنت من النهاردة سيد البلد دى .. إنت
أمير يا ابن خضرة .. إنت الملك .. (يتركها ثم يتوسط المسرح
و يزق بأعلى صوته) أنا الملك .. أنا الملك .. أنا أغنى أغنياء
الأرض

خضرة : يا نهار مش فايت .. إنت الملك .. الواد اتجنن خلاص .

عبد العاطي: لأ يالاه .. أنى لسه عقلى فى راسى.. بس أصل اللى حصل
حاجة تطير العقل فعلاً

خضرة : إيه يا واد اللى حصل... تكونش أكلت حاجة من إيد حد النهاردة؟

عبد العاطي : يالاه اسمعيني .. طب شمى (يقرب يده من أنفها) شمى
إيدى و انتى تعرفى

خضرة : (تبعد يده بقرف) ريحتها جلّة ...إنت كلاتك غرقان فى جلّة ..
زى ما تكون طول النهار نايم تحت الجاموسة .

عبد العاطي : جلّة إيه يا خضرة ... يا ولية ..طيب دوقليك حته..
(يحاول أن يخلص لها قطعة من بين أصابعه)

خضرة : أدوق؟؟!!..لأ..دا انت أكيد حصلك لطف ... أكيد انت أكلت
حاجة من إيد أيتها حد النهاردة .. (تهم بالخروج) الشيخ
عشرى يشوفك وهو يعرف مين اللى أكلك التهوريا دى ... و
إن كانت عزيزة نهار أبوها أسود ...عزيزة دى مش
هتاخذك..إنت مش فاهم؟؟

عبد العاطي : (بحدة) يا ولية انتى اتخلتلى فى مخك ...يا ولية شمى كويس
وسيبك من الهبل اللى انتى فيه ده (يقرب يده من أنفها
بعصبية)

خضرة : (بعد أن شمت فمه بدلاً من يده) ريحتك جاز ..(بانزعاج)إنت شارب جاز يا عبد العاطي؟؟

(23)

عبد العاطي : (يكاد يطير من الفرحه) جاز أهى هى دى الحكاية يا خضرة... (وهو يرقص على إيقاع كلامه) أنى ... يا خضرة... طلع...فى... أرضى...بيرر...بترول...جاز...ذهب.. (يكف عن الرقص) ذهب يا خضرة.

خضرة : (وهى تضحك) طلعك ذهب ؟!!... من تحت الجلة...!!..قالك أنت الملك !!

عبد العاطي : زى ما بقولك كدة .. إطلعى شوفى البلد زايطة إزاي (يقودها الى النافذة) الدنيا مقلوبة ..أأتارى أرضنا كلتها على بيرر .

خضرة : (تقاطعه فى هلع) بيرر ؟!!...يعنى الأرض غارت ؟

عبد العاطي : غارت إيه يا خضرة (لنفسه) أنى عارف أبويا كان متحمل مخك الطين ده إزاي ؟!!..(ثم إليها) مغرتش ولا حاجة .. وأناى بعزق الفاس جه فى حته طريه .. بحط إيدى لقتها بتتشع ..إحترت .. الميه دى جت منين يا عبد العاطي ؟ دت أنى لسه ماروتش .. قلت يمكن الجاموسة عملتها هنا .

خضرة : و يمكن الحمار .

عبد العاطي : يمكن !! جاى بخطى روحى مطبوش على وشى .

خضرة : مهو انت موكوس .

عبد العاطي : (وهو يرقص) بشم لقتها بترول بدوق لقتها بترول ...

باكل لقتها بترول (يكف عن الرقص و يصيح) بترول يا عالم

فى ملك عبد العاطي ابن خضرة (يصمت فجأة و يتذكر شيئاً)

فين البلغة يا ولية ...هاتى البلغة و الجلابية قوام .

خضرة : رايح الأرض بالجلابية؟؟!!

عبد العاطي : (بعد أن وجد فردة البلغة) معدتش أرض ... قولى رايح

الكوبانية ... رايح المؤسسة .. قولى رايح البنك ...معدش حاجة

اسممه أرض يا ست البلد .

خضرة : والله ما أنى فاهمة حاجة ..إنت هاتخبلنى معاك .

عبد العاطي : أنى رايح للحاجة سننية .

خضرة : قول كدة ... الحاجة سننية جبنتك العقد ...أتاريك هنتخبل

عبد العاطي : (بحدة) يا ولية عقد إيه و زفت إيه .. أنى رايح اجيب

البظبورت بتاعى .. و أسافر ليه ؟.. البترول جه لحد عندى ..

أروح له أنى ليه ؟؟ تعرفى ؟

خضرة : (بغضب وهى تبحث له عن البلغة) أنى مش عايزة أعرف حاجة.

(24)

عبد العاطي : لمل يشتغل الجاز معايا (يشير الى ما يدل على النقود) أنى هادى للحاجة سنية دى فيزا تروح تجبلى بيها سعوديين — (يتدارك) لأ .. آننى هابعت الخضرى بالفيزة علشان ينصب عليهم و يبيعهم اللى حيلتهم .. و بعد ما يجيبهم هنا اشغلهم فى القصر بتاعى كلهم خدامين .. إيوة ..مهو آنى هابنى قصر طبعا لازم ابنى قصر ..مهو البترول فى أرضى ..يعنى ملكى (تنصرف الأم دون أن يشعر) يعنى آنى حر فيه ... يبقى هابيعه وأمريكا ..و طبعا هاخذ دورارات كثير ..هافكها جنيهات هاتبقى ياما .. يعنى عابقى غنى عالاخر ..يبقى لازم ابنى قصر ..(صمت) بس ابنيه فين ؟؟.. فى مصر .. لأ.. مصر زحمة ..أبنيه فى إسكندرية..إيوة .عالبحر عدل (لحظة تفكير) إسكندرية بعيدة ..أنى مش طالع من هنا ..هأبنيه فى البلد ..هاشترى دوار العمدة و اعمله قصر (صمت) بس اذا العمدة ماوافقش (بحدة) غصب عنه لازم يوافق .. وكمان لازم يسيب العمدية دى .. مفيش حاجة اسمها عمدة ..هايشغل عندى إيوة هاشتغل عندى .. يشتغل غفير خصوصى .. البلد كلتها تشتغل عندى ..و ليهم على أشغلهم من غير فيزا ولا بظبورت ... (فترة صمت) ها املا قصرى بالخدم و الحشم (صمت) و اتجوز .. إيوة .. عزيزة .. وقتها أبوها مش هاقدر يقولى تلت التلاتة كام .. هو حد يقدر يتكلم مع الملك (يعاوده الهياج) أنا الملك .. هالبسك تاج يا عزيزة (يشير الى مقعد

وهي) و تقعدى هنا .. جنبى .. نتفشخر كدة زى الملوك ..
 ناكل زيهم مانحه و تفاح .. نفطر بخروف .. والغدا جاموسة ..
 إيوة .. (يصيح بأعلى صوته) أنا الملك .. أنا أغنى واحد فى
 البلد .. أنا أغنى واحد فى العالم .. أنا الملك ..

(تخفت الاضاءة تدريجياً وهو يتحدث الى أن تنطفئ تماماً... ثم تغمر
 المسرح بسرعو إضاءة كاملة)

عندئذ يظهر عبد العاطى وعزيرة كملك وملكة

يجلسان بشموخ على الكرسيين المكليين فى صدر
 قاعة الاحتفالات باقصر الملكى ..يدور فى
 المكان حفل صاحب بمناسبة عيد ميلاد الملك ..

فيما يقف العمدة خلف الملك كياور له أو حارس

خصوصى.. و يظهر جميل كخادم يناول أشياء و يأخذ
 أشياء أخرى ..وظهر عبد النبى و محروس كحارسين على
 جانبى مدخل القاعة.

يمكن أن يكون هناك رقص و غناء مناسب .. يتوقف أو الغناء من آن
 لآخر بأشارة من الملك كلما احتاج للهدوء لسماع أحد ضيوفه
 من الملوك أو للتحدث مع أحدهم ، ثم يعود الرقص أو الغناء
 اشاره منه أيضا .. وعموما الحديث بين الملوكوضيوفه لا
 ينقطع طوال الحفل)

(25)

ضيف : (تخفت الموسيقى فيتضح صوت الضيف) بس الانجليز دول
دماغهم ناشفة خالص يا صاحب الجلالة ..

عبد العاطى : إعمل معاهم اتفاقية يا صاحب السعادة ..

الضيف : بس دول طالبين فلوس يامه ..

ضيف آخر : إديهم يا صاحب السعادة ..إنت البترول عندك زى الرز ..
زود الإنتاج و إديهم ..الأنجل..(تعلو الموسيقى فيختفى الحديث
لكنه يظل دائراً دون أن نسمع)

(بعد فترة يخفت صوت الموسيقى مرة أخرى فيتضح ما يدور بين الملك
عبد العاطى و ضيوفه الملوك)

ضيف ثالث: (فجأة الى عبد العاطى) أعمل ايه يا جلالة الملك ..مهى
الصحافة بتاعته مبهدلانى آخر بهدلة ..

عبد العاطى : مهو انت كل مؤتمر يدوب نبدأ الاجتماع تروح رايح في النوم.

الضيف الثالث: كلكم كنتوا نايمين في المؤتمر الأخرانى..إشمعنى انى..أنى
هاقطع العلاقات بالدولة دي..

الضيف الأول :والله العظيم أنى ما نمت..أنى بس كنت سرحان شوية .

عبد العاطي : إنت وهو كنتم نايمين .. وعمالين تشخروا .. وبصراحة كده
 أني كنت مكسوف لكم .. إنت بالذات كنت عمال تطلع ريح
 كأنك واكل فدان سريس .

الضيف الثالث: مهو انت يومها اللي خلنتي آكل بصل ..

(يضحكون وتعلو الموسيقى ويظل الغاء لفترة وحين يخفت يتضح الحوار
 بين الملوك مرة أخرى)

الضيف الثاني: أني هاعمل عيد جلوسى يوم الخميس الجاي .. وبأسمي
 شخصياً .. وبأسم شعبى العظيم بوجه الدعوة الرسمية لكم كلكم
 كده بريطة المعلم ...

الضيف الأول: (الي الضيف الثاني) هوه انت مش عملت عيد الجلوس ده
 الشهر اللي فات ..

الضيف الثاني: مكنش عيد الجلوس ..

الضيف الثالث: أمال كان عيد ايه يا صاحب الجلاله ؟ ..

(26)

عبد العاطى : يمكن كان عيد وقوف جلالته (يضحك الملوك جميعهم)

الضيف الثاني : كان عيد النصر ...إيوه كان عيد النصر .. إنتم نسيتم ولا
ايه ...

عبد العاطى : أني عايز اعرف انتم انتصرتوا على مين ؟

الضيف الثاني : يعنى انت مش عارف ؟!!.. إنتصرنا على روسيا وأمريكا فى
حرب المغول ..

عبد العاطى : (ينتفض منزعجاً مما يؤدي الي تكهرب الحفل وتوقفه) هما
المغول رجعوا

الضيف الثاني : (يطمنه) إحنا خلصنا عليهم واحد واحد .. (الي المغني)
غنوا ..

(يعود الحفل ويجلس عبد العاطى ويستمر الحوار بين الملوك غير أنه
لايسمع ثم يتضح مرة أخرى من خلال الغناء)

عبد العاطى : آني ها زور أمريكا سرّاً يا جماعة .

الضيف الأول : إمتي؟؟

عبد العاطى : يوم التلات اللي جاي بس محدش يجيب سيرة. الزيارة سرية.

الضيف الثالث: (بصوت عال) ها تاخذ جلالة الملاكة معاك .

عبد العاطى : (يضع يده على فم الضيف الثالث حتى لا يكمل) إنت بتزعق كده ليه ...

(يتأكد من أن عزيزة لم تسمع) بقولك الزيارة سرية .

الضيف الثاني : يا حلو انت يا بتاع الزيارات السرية (يضحك الجميع ضحكة ذات مغزى)

عبد العاطى : إيه بأه اللي عملته سموك هناك ؟ .. إشتريت قمر صناعى ؟ .. ولا يمكن اشتريت قنبله ذرية !!

الضيف الثاني : اكتر م القنبلة الذرية .. واكتر م القمر الصناعي ..

الضيف الأول : يبقى اشتريت حق الفيتو .. المفروض حق الفيتو ده ننلم كلتنا ونشتريه .

عبد العاطى : (مشيراً الي الضيف الثاني) صاحب الجلالة راح اشترى بإيراد البترول فندق للولية اللي اسمها كاترينه .

الضيف الثاني :ايوه .. لأنك فضحتنا معاها .. أني صلحت سمعة العرب الى انت بوظتها مع كاترينه .. (للملوك) الولية كانت مستغربة .. كل ما تقابل حد من السفرا

(27)

تقوله عبد العاطي مش ممكن يكون عربى ..

عبد العاطي: كاترينه دى ما بتشبعش .. وأني يومها كان مزاجي مش رايق.

الضيف الثاني : أني خليتها تحلف بحياة كل عربى .. يبقى اللي أني عملته احسن م القنبلة الذرية ولا لأ .

الضيف الثالث : أهو كده الكلام .. والله اللي ارفه إنه مهما كان المزاج عكر .. لازم الواحد يسد .. وبالذات مع كاترينه دى ...

عبد العاطي : آدبنى رايع ياملك انت وهو ... والمباحث السرية هتستمر أسبوع بمزاج رايق وعلى نار هاديه (يضحك الجميع) .

(ينتهى المغني من وصلته وينحنى هو وفرقته تحية للملك الذي يصفق لهم ويؤذن لهم بالإنصراف ثم يستدعي الخادم جميل الذي يعلن من فوره إعلاناً على الحاضرين)

جميل الخادم : والآن مع مليكنا المعظم قبل أن يطفئ شموع ميلاده المجيد...

(يدخل خادمين بتورته الميلاد ويتقدم عبد العاطي ليلقى كلمته وسط تصفيق الجميع)

عبد العاطي : (يقرأ من ورقة ونلاحظ أن شكرى يقف ورائه يلقته)

أيها الشعب العظيم (يصفق الجميع بينما يدفعه شكري من الخلف ليصح
العبارة فيعيد الملك قرائتها) أيها الشعب العظيم (يتكر ماحدث فى المرة
الأولي فينتبه الملك ويقرأ العبارة صحيحة هذه المرة)

أيها الشعب العظيم (يصفق الجميع بحرارة ثم يكمل الملك القراءة على النحو
التالي)

لا سات كيين جعلوص .. فلكاني جعليص فلحوش الفشاحيل (تصفيق حاد)
سيول الولم جناول شفلص بالحليب ..

(يظل عب العاطي يقرأ من الورقة بهذا الشكل ويظل شكري يدفعه بقوة من
الخلف حتى كاد يوقعه .. عندئذ يقذف عبد العاطي الورقة فى وجه شكري
ويرتجل الكلام)

أني ما بحبش الكلام المكتوب ... أني عايز اتكلم من قلبى .. لأن اللي طالع
من القلب بيوصل للقلب على طول (تصفيق حاد)

كل سنه وانتوا طيبين .. والختمه الشريفه أني ما كنت اعرف أني اتولدت
إمتى

(28)

(يدفعه شكري) بس امي (يدفعه بعنف) الملكة خضرة بتلحف انها ولدتنى فى نفس اليوم اللى اتولد فيه الواد محروس الأعور ..

(يصفق الجميع ويدفعه محروس)

على كل حال إحنا فلوسنا كتير .. وأني عايز أفرّح الناس .. طب والختمه الشريفه لازم اعمل لكم عيد للنصر ... (تصفق حاد)

أيها الشعب الكويس .. بعوده الأيام .. (يهتف الجميع بحياة الملك) سياستنا الخارجية آخر حلاوة .. وماشية ععال العال (يدفعه شكري) وسياستنا الداخلية كويسة .. أني حاطط وزير داخلية مفترى .. الوزير ده شايف شغله تمام .. كل يوم يخنق بإيده تلاته اربعه .. حسب مزاجه ..

(تصفق بينما يزجره شكري بعنف)

الجو أمان والحمد لله... إحنا ديمقراطية خالص ... أحسن من أمريكا (تصفق)

أني مبسوط منكم ع الآخر .. وأني عارف إنكم بتحبونى .. (تصفق) مهو اني الملك بتاعكم .. لازم تحبونى .. كل سنه وانتم طيبين .. بعوده الأيام .. والسلام عليكم ورحمة الله .

(يتجه عبد العاطى وسط التصفيق والهتافات بحياته الي حيث توجد تورتة الميلاد ليطفئ الشموع ويحيط به الضيوف ويغنون جميعاً له)

الضيوف : (يتزاحم المصورون الصحفيون حول الملك وضيوفه ويتسابقون فى التقاط الصور لهم وهم يغنون للملك)

سنه حلوه يا جميل .. سنه حلوه يا جميل .. سنه حلوه يا عبد العاطى .. سنه حلوه يا جميل .

(يطفئ الجميع الشموع مع الملك ثم يصفقون له ويقبلونه واحد تلو الآخر)

(ينتهى الحفل ويبدأ المدعوون بالإنصراف .. بينما يودعهم الملك والملكة عند الباب)

ضيـف : (وهو ينصرف) عقبال العيد الألف يا صاحب السعادة .

عبد الرحيم : (نلاحظ أن عبد الرحيم وزير) إتجدعن كده وهات لنا ولى العهد (ينصرف)

سليمان : (هو أيضا وزير) إحنا ها نطبع الخطبة بتاعك دى فى كتاب وها نوزعه فى كل الدنيا(ينصرف)

(29)

(يظل هذا الحال حتى ينصرف الجميع ثم يتبارى المصورون فى أخذ الصور
التذكارية للملك والملكة ثم ينصرفون ويظل الملك والملكة وحدهما)

عبد العاطي : (وهو يأخذ بيد عزيزة ويتجه بها الي المقعدين الملكيين)

إنتي مبسوطه يا عزيزة .. قصدى يا صاحبة الصون والعفاف .

عزيزة : كل سنه وانت طيب يا عبد العاطي .. قصدى يا جلالة الملك .

عبد العاطي : شافيه الدنيا كلتها فرحانه ازاي ؟

عزيزة : فرحانة بالملك الطيب والفارس الشجاع .

عبد العاطي : أني عايزك تطلبى دلوقت أيتها حابه .

عزيزة : هو انت مخليني عايزه حابه .

عبد العاطي : الفلوس كتير يا عزيزة .. ها نوديهها فين ... البترول فى
الأرض والدورارات نازله ترف .

عزيزة : أنا عايزه أخدمك واطير فى السما .

عبد العاطي : (بإنزعاج شديد) فى السما ؟؟ ونسيب البترول لمين ؟؟

عزيزة : عايزه أدملك عمرى يا مولاي .

عبد المعطى : لأ أنا مش عايز .. إنتي تطلبى .. تقولى عايزه أي حاجة ..
إن شا الله قمر صناعى .. إيوه قولى .. قمر صناعى ؟

عزيزة : يعنى لازم ؟

عبد المعطى : ولا بد .

(تتحدث عزيزة فى أذن عبد المعطى)

عبد المعطى : (بسرعة) يا وزير (يأتى الحارس راكضاً)

الحارس (العمدة) : إيوه يا مولاي

عبد المعطى : بقول وزير .. وزير يا بجم .

الحارس (العمدة) : (بتحد) مهو آني مش معقول ها افضل ملطوع كده . كل

من هب ودب بقى وزير إشمعننى آني يعنى ؟؟

(30)

(ينصرف الحارس غاضباً بينما يدخل الخضرى)

عبد العاطي : (يتحدث فى أذن الخضرى) سرّاً يا وزير .

الخضرى : سمعاً وطاعة يا مولاي . (يستدير ويكتب فى ورقة ثم بصوت عال) صابون مدور من أبو ختم .. ليفة سلك .. (ينظر اليهم) مزيل للكشف .

(فجأة يرق جرس التليفون .. ينزعج الجميع فيما يدخل الشحات الذى كان يعدل من وضع المقاعد بعد انتهاء الحفل . يهرول حاملاً الى الملك الذى يكون قد اضطجع على مقعده)

عبد العاطي : (بعظمة) آلو .. (صمت ثم يتخلى عن وضعه) بتقول آه ؟
(صمت) هو إيه ده اللي مفيش (صمت) أني عايز جناح فى الفندق إللي فى نص أمريكا . (صمت) إيوه اللي جنب محل الفراخ كنتاكي (صمت) يعنى إيه محجوز ؟ شوف يا سفير غشيم انت .. إشتري الفندق ده حالاً وريح دماغى . بسرعة يا سفير واديني خبر . (يضع التليفون بقوة كاد الشحات يقع تحت تأثيرها)

قال إيه محجوز (للحارس) السفير ده لازم يتغير .

الحارس (العمده) : (يعنف وتحد بالغ) أني ها اروح بداله . ولا أني ها

افضل ملطوع كده ؟

عبد العاطى : إنت تخرس خالص .. انى مفقوع منك .. إنت

(فجأة يدق التليفون مرة أخرى لكن بقوة هذه المرة أو بنغمة أشبه بصفارة
الأنذار مما يدفع الحارس الي الزعيق)

الحارس : الخط السخن .

(يتبادل الجميع هذه الكلمة ويصرخ عبد العاطى)

عبد العاطى : الترجمان .. (يتبادل الجميع هذه الكلمة أيضاً . يدخل
الترجمان فيما يقدم الشحات تليفوناً ضخماً بلون مخالف الي
عبد العاطى ، يرفع الترجمان سماعة التليفون الآخر .
الترجمان هو نفسه فوزى فى الفصل الأول)

عبد العاطى : ألوووو

المترجم : هالو

(31)

عبد العاطى : يا أهلاً .. يا أهلاً .. يا تلتيمت مرحبا .. والله العظيم انت كلك واجب .. أني عارف إنت عايز تباركلى بمناسبة عيد ميلادى . كل سنه وانت طيب يا سيدى .

(يشير الي فوزى حتى يترجم فى التليفون ما قاله هو)

المترجم : (فى التليفون) ويلكم .

عبد العاطى : (وهو مازال يشير للمترجم) ربح بالراجل يا ترجمان .

المترجم : (ينحنى) أوكيه . (فى التليفون) ويلكم .

عبد العاطى : (فى التليفون) والله ليك وحشة يا كبير . آنى لما بسمع صوتك واكون زعلان بفرح على طول . (يضحك) متبقاش تغيب كده . إنت اكبر كبير فى الدنيا دى (يضحك) هه ؟ بترونا حلو ؟ أنى والله ولو أطول أقلبه شريات والله لأعملها . لكن تقول إيه ؟ أنى عارف إنك بتحب البترول . سلامات كده .. أنى عايز اشوفك .. أنى ع العموم اشتريت الفندق الللى فى الميدان الكبير بتاعكو . الللى جنب بتاع الكنتاكى . (يضحك) حاكم أنى ناوى أقعد حداكو يومين كده . ها زور شارع الهرم بتاعكو . (يضحك) إيوه . والله ياريت اشوفك هناك . إوعى تقول انك ما بتروحش شارع الهرم ده . دا انتوا ملاعين (يضحك) إزيك كده .. بعوده الأيام يا سيدى .. يا تلتيمت مرحبا (يشير الى المترجم)

المترجم : (وهو حائر) ويلكم .

عبد العاطى : (بغضب) آه إيه ويلكا دى .. لهو آني بديك فلوس عشان
تيجى تقول ويلكا (يسمع فى التليفون) إسمع .. اسمع ..
الراجل بيتكلم .

المترجم : (يسمع ثم يرتبك) آي آم سورى . بط بط ويلكم .

عبد العاطى : (اثناء انشغال المترجم بالاستماع) الوداد المترجم ده بياكل
الكلام .. كل ده ويلكا ؟

المترجم : (يسمع بإهتمام) يس .. يس (يتسائل فى التليفون) سنسفيل؟

عبد العاطى : تستاهل أهو لعن سنسفيل أبوك أهو .

المترجم : يس .. أوكيه .. (يضع التليفون بضيق ويبدو على وجهه
الغضب)

عبد العاطى : يا نهار أبوك مطين .. إنت قفلت التليفون فى وش الراجل ؟
يقول علينا أيه ؟؟ بهاييم ؟؟ جايين من ورا الجاموسه ؟؟ الراجل
بيكلمنى يا ترجمان تقوم تقفل السكة ؟ هو

(32)

لسه قال حاجة ؟ (الجميل) اطلب لي أمريكا حالا . (للمترجم) انت تقوله حقك على وتعرفه إن أني ها افصلك على طول .

المترجم : (بتحد) مش هيرد على جالنتك .

عبد العاطي : زعلته .. مش كده؟ (بحزم) خدوه ع السجن .أني عارف .. عايزين تبوظوا العلاقات

المترجم : (وهو فى قبضة الحراس) عمرها ما تبوظ بين اتنين مفيش بينهم أي درجه من التكافؤ .

عبد العاطي : يعنى أيه الكلام ده ؟؟

المترجم : هو بس زعلان من جالنتك شويه ، (بسخرية) وعظمتك زى كل مره .. زى العادة ..

هاتراضيه (الحراس يشددون قبضتهم على المترجم)

عبد العاطي : ويزعل منى ليه ؟ البترول وبياخده ... والفلوس أني عامل معاه جمعية مش ها اقبضها إلا الآخر ..يبقى يزعل منى ليه ؟.

المترجم : بجاجة ..

عبد العاطى : (يصيح) خدوه (يشدد الحراس قبضتهم على المترجم ويجرونه)

المترجم : (وهو يحاول التخلص من الحراس) أيوه .. بجاحه ... بس احنا آخر سفاهه ... (وهو يصرخ بين يدي الحراس) هما البجاحه ... واحنا السفاهه هما ياخدوا البترول وعنيهم على فلوسه ... واحنا بنديهم كل حاجه البضاعه .. وفلوس البضاعه ... (وهم يحاولون جره خارجاً) هما البجاحه واحنا السفاهه .

عبد العاطى : (قبل أن يختفى الحراس بالمترجم) هاتوه .. إستتوا .. (يدخل الحراس بالمترجم مره أخرى فيوجه كلامه للمترجم) إنت فى وسط الكلام قلت سنسفيل

المترجم : أيوه .. جمهوريه سنسفيل .. اللي تبعد عن بلادنا ألف ألف ميل .. واللى حتى مفيش بينها وبيننا أي علاقه من أي نوع .

(33)

عبد العاطي : (لنفسه) ويزعل ليه ؟ تكونش المساعدات اللي دفعناها للرئيس السنسفيلى مش كفايه ؟ (صارخاً) ياوزر الفلوس (يردد الحراس)

الحراس : (على التوالي) وزير الفلوس .. وزير الفلوس (يدخل الخضري)

الخضري : أيوه ياولى النعم .

عبد العاطي : إحنا دفعنا آخر مرة كام للرئيس السنسفيلى ؟

الخضري : (يخرج عريضة يكتب منها) ديشيلون دورر عدأ ونقدأ واسأل كل الوزرا .. أنى عدتهمله فى إيده دورر دورر ويعدين اشتريت له بديشيليون كمان احبال علشان يشنق بيهم المتمردين السنسفيل ولاد السنسفيل هناك .

عبد العاطي : (وهو يؤشر الي ما يعنى شكه فى ذمة الوزير) يعنى ما ..

الخضري : (بسرعة) والله العظيم ولا مليم .

عبد العاطي : (صارخاً) يعنى دفعنا زى ما قال هو بعظمة لسانه .

الخضري : بالمليم ..حتى ما خصمتش عموله (يدرك أنه أخطأ) قصدى قصدى إننا دفعنا لهم إللي هما عايزينه .

عبد العاطي : تبقى إيه الحكايه ؟

المترجم : (وهو ما يزال بين يدي الحراس) تدفع كمان بس المرة دى للاتنين ... الرئيس . الرئيس والمتمردين .

عبد العاطي : طيب وايه الفايدة (لنفسه) والله الراجل ده محيرنى .. هو عايز مين ينتصر على مين ؟ دا بالشكل ده ... لما أدى للطرفين .. الحكومة والمتمردين .. تفضل المسألة (ينفعل) إيوه مش بس كده دا احنا نفضل ندفع .. دى حكاية ملهاش نهاية (يركض ياتجاه التليفون ويهم باداره القرص) أني لازم أتأكد منه .

المترجم : (يضحك بينما يشدد الحراس قبضتهم عليه) وبعد ما صاحب الجلالة يتأكد ؟ إيه اللي تقدر تعمله عظمتك ؟ .. ها تقول مش دافع ؟ .. (يضحك بسخرية) ها تدفع .. ويمكن تدفع أكثر (يضحك بمرارة) مش قنلتك مفيش تكافؤ .. يا صاحب الجلالة إنت محفظته اللي ميعرفش حتى هوا فيها أد إيه (يحاول الحراس إغلاق فمه) إنت الاحتياطي بتاعه اللي من حقه يصرفه فى أي وقت وبالطريقة اللي يحددها هو ... (يضر به الحراس) إنت ورقة اليا نصيب اللي فجأه حققتله ربح هائل مكش فى الحسابان (يثقل عليه الحراس بينما يحاول هو الحديث فى وجه الملك) إنت سهمه

(34)

اللى من حقه يغامر بيه فى أي بورصة أو صالة قمار ... ولو خسره ... لو
خسر كل الفلوس ها يهमे أيه ؟ هى فلوسه ؟ .. لو ضعت انت منه فجأة زي
ما لقاك فجأة .. ها يهमे أيه ؟ .. يا صاحب السمو .. إنت حتى متقدرش
تتصرف فى نفسك إنت ها تدفع .. وطول ما أنت قاعد على الكرسي ده
ها تدفع وها نفضل إحنا ندفع وراك .

عبد المعطى : (وهو يعيد سماعة التليفون الى مكانها محبطاً) خدوه ...
إسجنوه ... إسطلوه .

(يخرج الحراس بالمترجم بينما يصرخ المترجم وهو فى قبضتهم)

المترجم : بجاحه ... سفاهه بجاحه سفاهه .

(يقف عبد المعطى حائراً وفجأه يصفق إيداناً بانصراف الجميع فينصرف الكل
عدا الخضرى وزير الفلوس الذى يقترب منه)

الخضرى : (وهو يقترب من الملك ممسكاً بالورقة والقلم ويهم بالكتابه) كم
ياولى النعم ؟

عبد المعطى : (كأنه يتعذب بدون أن يعطى وجهه للوزير) بس سرّاً .

الخضرى : (ينصرف مسروراً وهو يكتب) اتنين ديشيليون للرئيس السنسفيلى
.. واتنين زيهم للمتمردين السنسفيل ... بس سرّاً (ينصرف)

(يظل الملك وحده وهو فى حالة قلق وتفكير عميقين فيما تدخل أم عبد
العاطى وهي فى زينة حسنه ...تدخل خائفة مترددة .. تقترب
منه فى حنو .. تهم بوضع كفها على كفه ثم تتردد)

الأم : (بإنكسار) ياترى أيه اللي مزعل الملك ؟

عبد العاطى : (يلتفت ويلهفه) أمي ؟ انتى فين يا أمي .

الأم : (ببرود) كويس انك فاكرا ان ليك أم .

عبد العاطى : دا أنا كنت لسه هابعت أجيبك كنت جايلك .

الأم : (بدهشة) تجيلى ؟ .. تجيلى فين ؟....فى جناح حريمك اللي

انت رامينى فيه زى أى جارية من جواريك الكثيرة ؟ ما
كنتش هتجيلى أبداً لأنك نسيت حتى أني لسه عايشة ... أنا
بس جيت لأنى إشتقت أشوفك .

عبد العاطى : (ببأس) حتى انتى زعلانه منى ؟

(35)

الأم : هو حد يقدر يزعل م الملك ؟

عبد العاطى : (بتوسل) مش عارف اعمل يا أمى إيه ؟

الأم : (كأنها تؤنبه) إنت بتعمل كل اللى انت عاوزه .

عبد العاطى : (بعده) بعمل كل اللى يريح الناس .

الأم : (بدهشة لاتخلو من السخرية) اللى يريح الناس !!؟

عبد العاطى : (بحدة) إديتهم من غير حساب (تضحك الأم ضحكة

ساخرة) (يواصل عبد العاطى حديثه وهو محتد) كل واحد

قصر وجنينه وفلوس زى ما هو عايز (تزداد الأم ضحكاً لكن

بمرارة) ناقصهم إيه ليه أحس بالرغبة حتى لما يضحكوا فى

وشى ؟ حولت لهم البلد لجنة ملاهى وجناين

حمامات للسباحة وملاعب مستشفيات وأحسن دكاترة

..... مينا ومطار بدل المعديّة اللى كانت فى أى

لحظة ممكن تقع بيهم كوبرى ومش بس واحد (تعلو ضحكاتها

المريرة أثناء حديث أبنها) إنزلى بنفسك شوفى البلد

روحى الملاحه القديمة والأرض البور والخراية شوفى

مكانهم ايه شوفى النافورة اللى فى وسط البلد (يستمر

ضحكها الاستجاني حلال كل مراحل حديثه) شوفى البرج اللى

أعلى من مادنة الجامع ادخلى البيوت روحى لكل

واحد فى بيته كل حاجة هناك بالزرار معدش حد
منهم فى حاجة لأنه يتعب أو لأنه ينشغل محدش فى البلد
النهاردة محتاج يفكر حتى ولو لدقيقة واحدة .

الأم : (فجأة تتوقف عن الضحك ثم تنظر إليه بقوة وتحد) إنت عملت
فى الناس كل اللي يريحك .

عبد العاطى : (وهو يصيح) كل اللي يحقق طموحهم .

الأم : (تصرخ فى وجهه) أنا معتش فاهمالك كلام اللي يريح
الناس !! اللي يريح الناس !! النافورة !! .. المطار
..! كل اما اكلمك تقولى الكوبرى والحاجات اللي بقت بالزرار
!! إنت ايه ؟ .. جنسك ايه ؟ ها تقضل فى الوحله دى
لامتى ؟ هو أنا مش واحدة م الناس اللي انت بتتكلم عليهم
.... عملت معايا ايه ؟ .. هه ؟ بص كويس هتلاقينى فى
الهدوم اللى لبستها لى غصب عنى ... اللى انت زى ما بنقول
جبتها لى بالطيارة من عندهم هناك ... بص ها تلاقينى زى
الهبله ... زى الحاوى اللي كان بيّجي البلد زمان ... نيمتنى
على سرير زى ما تكون مراتبه محشية شوك وقال ايه ريش نعام
... سجننتي زى كلبه ملهاش صحاب ... حرمتنى من الشمس
والدنيا والناس وفوزي عملك ايه !! هه ؟ مش
فوزي ده اللي كنت زمان تقولي ياريتك علمتينى يامه زى فوزي
.... مش هو اللي بنقول عليه ينفع نبى بس زمن الأنبيا خلاص

.... جاي النهارده تتخلص من فوزي اللي كنت بتحبّه أكثر
حتى منى ومن أبوك طيب وعزيزة ؟ ... إيه

(36)

اللي حصلك ! بقيت زى العجل الهايخ كده ليه ؟! كم واحدة اتجوزتها
عليها إنت بتعمل بيهم ايه ؟ الواحدة شهر وتطلقها ليه هما
برضه دول مش ولاد ناس (تصرخ) ليه ؟ كل ده يا بنى ليه ؟
انت فاكرنى مش عارفة إيه اللي بتعمله من ورا ضهور أهلك وناسك (صمت)
بس هما برضو يستاهلوا ببيجوا لحد عندك وبيقوا زى الفيران هما عارفين
كل حاجه بس بيمشوا وراك زى المعيز مرة تغويهم ومرة تطلع عليهم زى
هم الموت (بغضب وحسم) إنت عيشتك حرام عيشتكوا كلها حرام فى
حرام (تحتد) نافورة إيه يا بن خضرة الأرض فين إنت عملت فى
الناس إيه كل واحد بقى زى الكلب السعران كده ليه كلهم زى ما
يكون ماتوا ليه ملهمش حس ليه ... (تهدأ قليلاً) ملهمش ريحة ولا عاد
للواحد منهم طعم ولا قيمة حتى وشوشهم اتغيرت ... زي ما يكونوا مش
همه اللي كنت بعرفهم زمان (تدور فى المكان) سليمان .. عبد الرحيم ..
مصطفى .. حتى شكرى .. شكرى ابن ____ معتش بعرفه (تبكى بحرقة)
فين أبوك (تدور فى أرجاء المسرح) إنت فين يا زهران .. إنت فين تورينى
زى زمان السكة للأرض ... جتتى سقعت من كتر القعدة ... يا زهران ..
عايزه اشتغل زي زمان معاك .. أني ناحية م الأرض وانت ناحي ونشوف
مين فينا اللي هاعمل أكثر من التاني.....عايزه اطلع وياك من الدار زى كل
مرة قبل طلعة الفجر .. (كأنها تحدث الغائب) فاكر .. كان زى ما يكون

القمر مستتينا في الميعاد .. ككنت قدامى وانا وراك .. والقمر فارش السكة
 قدامنا .. ويفضل معنا لغاية ما نوصل هناك ... ككنت بشم ريحة الأرض قبل
 ما نقرب .. ولما نوصل (تستدير الي ابنها) قبل ما أبوك يحط رجله ع الحد
 يرمي السلام (تحتد) يا ريت كان لك قلب زى قلبه علشان كنت تحس ..
 كانت كل شجرة وكل عود وكل نواره بترد عليه .. كانت الأرض كلها بتغني
 لما تعرف إنه جه ... كان ساعتها الليل بيدينا ضهره وهو مكسوف زى البنات
 ويمشى .. مهو الصبح جه .. الصبح جه .. الصبح جه .. كنت بسمعها
 بودانى من عيدان الفول وهي بتقولها لبعضها .. كان الشجر كله بيقف
 يتفرج على أبوك طالع بالفاس ونازل ... عافية أبوك كان لها ريحة أحسن
 ألف مره من الزناخة اللي ماليه قصر ك .. إنت حتى ملكش ريحة خالص
 (يدخل سليمان ومصطفى وعبد الرحيم وهم فى ملابس فاخرة وقد علت
 كروشهم ، يحمل كل منهم شيئاً فى يده للملك ، يفاجأون بالأم فيسرعون
 باتجاه الملك ويحتمون من نظراتها خلفه فيما تواصل هي حديثها) كلكم
 ملكوش أي ريحة .. وهاتجيلكم منين ... بتعرقوا .. إنتم خلا....

عبد العاطى : (مقاطعاً لها وصائحاً فى وجهها بعد أن أحس ببعض القوة)
 إنتي مش عاجبك أي حاجه ... انتي حتى صعبان عليكى اني
 اعيش شويه فى أمان زي ما أكون مش ابنك .

الأم : زى ما تكون الداية سرقنت ابني الحقيقي وضحكت عليه بيك .

عبد العاطى : (بحدة) إنتى مش أمي .

(37)

الأم : إنت غريب إنت حتى عينيك غريبة .

عبد العاطى : إنتى ملكيش إلا العيشة فى وسط الجوارى والخدم .

الأم : مش جديد عليك .

عبد العاطى : (صائحاً) يا حراس

الأم : (تضحك بكبرياء ثم يدخل حارسين ويحيطون بها دون أن يقتربوا منها ويلاحظ أن الحارسين هما عبد النبى ومحروس) أكبر دليل على خيبتك خايف حتى من أمك .

عبد العاطى : (وهو يصيح) خدوها ... مش عايز اشوف حد (الى سليمان والآخرين) مش عايز اشوف حد خالص (يركض سليمان والآخرين الى الخارج ، فيما يصرخ هو فى الحراس) خدوها (يتردد الحارسان ولا يجرؤ أحد منهما على الاقتراب منها حيث تنظر اليهما متحدية) خدوهاأنا هنا الملك أنا أملك هنا كل حاجه أنا المتصرف الوحيد فى شئون المملكة الجاز بتاعى والناس كلها تمشى تحت أمري .. (تنصرف الأم وخلفها الحارسين يدفعهما صياح الملك ويمنعهما الخوف من الأم ... حين يخرج الجميع يظل الملك وحده يصيح فيما تخفت الاضاءة حوله الى أن تنطفئ تماماً فى حين يظل هو تحت بؤرة ضوء باهته وهو يصيح) أنا أغني

أغنياء الأرض ... البترول ملكى ... البترول فى أرضى
 (تخفت بؤرة الاضاعة المسلطة على الملك جداً فيما يستمر
 هو فى الصباح) أنا الملك ... أنا الملك (يظلم المسرح
 تماماً ثم يضاء فجأة وعبد العاطى فى بيته يرتدى الصدىرى
 والكلسون كما كان قبل أن يغوص فى حلم يقظته بيد أنه
 مايزال يصيح) أنا الملك... أنا الملك .

(نداء من الخارج يختلط بصياح عبد العاطى)

النداء : عبد العاطى ... يا عبد العاطى ... يابتاع الجاز .

عبدالعاطى : (وهو فاقد الاحساس بالمكان ، يركض يميناً ويساراً) أمه ...
 يا أمه همّا خدوها وراحوا على فين (يستمر النداء من الخارج)

النداء : يا عبد العاطى ... يابن خضرة .

(يدخل محروس وعبد النبى بملابسهما الريفية ، يحمل كل منهما جواز
 سفره)

عبد العاطى : (وقد فوجئ بهما) أمي فين ياواد يا محروس ؟

(38)

محروس : (يضحك) خضرة ؟ واني ايش عرفنى .

عبد العاطي : (وهو بين الحلم والحقيقة) هى ... هو ... هو هو انتم
... هى مش لسه طالعه معاكم

عبد النبى : (يضحك متخيلاً ذهاب عقل عبد العاطي) هو .. هى .. يا
نهار اغبر .. هو البترول لحس عقلك يا عبد العاطي .

محروس : احنا ها نعمل بأمك ايه .. دى حتي مفيهاش ريحة النسوان
تكونش راحت ترمى نفسها فى الساقية .

عبد النبى : (وهو يضحك) يمكن اتخطفت .

محروس : ودي اللي يخطفها ينيل بيها إيه !!؟

عبد النبى : يمكن معاها صيغة .

محروس : (بسخرية) والنبى لو معاها بألف جنيه تغور من وشها
العكرالى

محروس : (الى عبد العاطي) إنت ياواد ما بتشمش ريحتها ... أنا عارف
ابوك خلفك منها أزاى !!

عبد النبى : من ورا الباب (يغرق الاثنان فى الضحك)

عبد العاطي : (بحدة بعد ما وعى ما حوله تماماً) بس اتلم يا واد انت وهو ... ياك داهية فى امك منك له .

محروس : قوامك ها تزعل يابن خضرة ؟!

عبد النبى : إيوه يا عم .. البترول فى أرضه .. حد قده .. له حق يتكبر علينا .

عبد العاطي : (يحاول إفهامهما ما حدث) يا عبد النبى مش كده ... يا محروس الحكاية إنني يظهر عقلت شوية .. زي ما يكون كنت بحلم ... (يتذكر) .. ياااه .. دا كان كابوس ثقيل بشكل .

محروس : كابوس !! ... وانت واقف ؟!!

عبد النبى : من أولها كده ؟! ... كابوس ؟!.

عبد العاطي : المهم ... الحكومة خلصت فحت فى الأرض ؟

(39)

محروس : (بفرح) الطين كان ها يولع وهما شايلينه من أرضك يا عبد اعاطى .. كله جاز يا وله ..

عبد النبي : (بنفس حالة الفرح) البلد كلها طلعت وراهم بالطبل والزمر .

محروس : بس الجلّة كانت كتيرة ع العربيات الحمولة زى ما يكون كلتها جلّة ... إنت كنت مسيب بهائم البلد كلتها على أرضك يا عبد العاطى !!!

عبد النبي : مهو ده البترول يا اعمى يا بن الاعمى بس انت أصلك بتحدف شمال .. مهو انت اعور (يغرقان فى الضحك)

محروس : (وهو يضحك) والله الجلّة باينه ع العربية زي الشمس .

عبد النبي : يا واد انت بترول مهو أصل البترول لونه اخضر زى الجلّة تمام .

عبد العاطى : (بثقة) محروس كلامه صح يا عبد النبي .

عبد النبي : (منزعجاً) يعنى إيه ؟

عبد العاطى : (يحاول شرح الموضوع) البترول فى الأصل جلّة...جلّة قديمة من أيام زمان ... زمان خالص .. بس اتخمرت فى الأرض .. مش الاتنين بيولعوا زى بعض .

عبد النبي : (وهو مقتنع) على كده الزريبة بتاعنا بعد كام سنة تنبقى بير
بترول ...

محروس : إيوه صحيح

عبد النبي : خلونا فى المهم إنت ها تعمل معانا إيه ؟

عبد العاطى : فى إيه يا وله ؟

محروس : إحنا أول ناس ها نشتغل معاك يا عبد العاطى .

عبد العاطى : طيب بس ...

عبد النبي : ما بسش ولا حاجة البظبورتات معانا أهه (يشهران
جوازيهما فى وجهه) إعملنا الفيزة من دلوقت

عبد العاطى : (بحدة) فيزة إيه يابن الهيلة انت وهو ...

محروس : (مستكراً) إيوه ... إيوه ... هاتبدى تحمرق يابن خضرة ؟

(40)

عبد النبي : تكونش ناوى تجيب أجنب يا عبد العاطي واحنا لأ ؟

عبد العاطي : يا عبد النبي افهم إفهم يا محروس

محروس : أنى فاهمك كويس .. وعلشان كده إحنا جايبين لك الفلوس والجوازات ..

(تدخل الأم مندفعة وهى تصرخ فيفاجأ الجميع)

الأم : يا خراب بيتك يا خضرة ... يا خراب بيتك يا خضرة (تتجه إلى عبد العاطي وهى ما تزال تصرخ ، ثم تضربه بكفيها وتصرخ فى وجهه)

عبد العاطي : (يجري أمامها منزعجاً) إيه يا وليه .. حري إيه ... إنتى انتهلتى ...!!

محروس : (وهو يمنعها من الوصول الي عبد العاطي) إيه يا خاله خضرة .. الجاموسة ماتت ؟.... ان كانت الجاموسة تروح فى داهية .. إنتى عايزاها فى إيه ؟

الأم : (وهي تصرخ) يا خراب بيتك يا خضرة إنت فين يا زهران ... تعالى شوف الخيبة اللي انى فيها ... (الي عبد العاطي) إنت سايبهم يا سبع البرمبه يجرفوا فى الأرض .. الزرعة باظت

والخراب جالنا مستعجل وانت واقف .

عبد النبي : زرعة ايه يا خالة خضرة ... ما خلاص .. ال

الأم : (تقاطعه وهي تصرخ) خلصت روحك انت وهو ... إيوه ما
انتوا عايزين تخربوها وتقعدوا على تلّها ...

عبد العاطي : يا وليه الأرض فيها جاز ... فيها فلوس ... طرحت ذهب .

محروس : ها تاكلى الشهد يا خاله ... من هنا ورايح لا انتى ها تنزرعى
ولا ها تقلمى ها تبقى أم البيه أم الأمير ... ومين عارف
.. يمكن تبقى ملكه وتتخلصى من الخبل اللي انتى فيه ده .

الأم : (تركض ورائه فى محاولة لضربه) والله مانا سايباك يابن
العورة أنى مخبولة يا اعور يابن العامية ..

عبد النبي : (يمسك بالأم ويحاول ارضائها) الواد بيضحك معاكى ... دا
انتى امنا كلنا ... طيب والله العظيم إنتى ستتنا وست اللي
خلفونا كمان

عبد العاطي : يا امه الأرض فيها جاز ...

الأم : يقوموا يجرفوها !!

محروس : علشان يطلعوه ..

(41)

عبد العاطى : ولما يطلع يامه ها تبقى نغنه .. ها نعيش فى عز يا وليه ..

عبد النبى : إيوه .. ابنك بقى الكل فى الكل .. دا احنا جايين نترجاه
يشغلنا ..

محروس : (بحدة) وانتى امتى فهمتى حاجه (محاولاً ألا تسمعه) دا
انتى ازفت من الجاموسه حبتين (تسمعه الأم فتحاول قذفه
بالنعال وهى تركض وراءه)

عبد العاطى : (بحدة) ما تتنيل يابن العورة ... (الى امه) اهدى كده يا
امه وبعدين أنى هافهمك ...

الأم : (بيأس وهى تبكى) أنى رايحه للعمده .. هو يتصرف ما دام
راجلى راح وابنى بيخرب فى الأرض .. هاروح لكبير البلد ...

عبد النبى : عليكى نور .. تعالى نروح للعمده ... هو بنفسه هافهمك ...
أنا عارف .. إنتي ملكيش إلا

العمدة : (يضع يده على كتفها ويتجها الى الباب ثم لنفسه) حاكم فيها
ناس ما بتجيش إلا بضرب البلغ .. (ثم الي محروس قبل أن
يخرجا من الباب) إوعى تسبيه يا محروس إلا لما يختملك
البظبورات (يقذف بجواز سفره الي محروس ويخرج هو والام)

عبد العاطي : (ينادى عليها ويحاول الخروج لاعادتها فيمنعه محروس)
يامه .. امه .. ياوليه افهميني ..

محروس : (وهو يمنعه من الخروج) سيبك منها .. بكره لما تشوف الفلوس
ها تقول إن الله حق ... خلىنا فى المهم ..

عبد العاطي : (بحدة) إنت عايز ايه يا محروس ؟...

محروس : (يتوسل) عايز اشتغل فى البترول معاك يا عبد العاطي .

عبد العاطي : (بنفس الحدة) هاشغلك فى الزفت ... ارتحت .

محروس : اختم لى البظبورت ...

عبد العاطي : يخرب بيت أبوك . . إنت حمار يا وله ... هو انى لسه عملت
ختم !

محروس : (يحاول إقناع عبد العاطي) والله العظيم أنى بشوف كويس يا
عبد العاطي ..

أنى اعور صحيح بس عيني زى النص .. بالك يا عبد العاطي .. البيت
مراتى كت مديها بريزه تجيب بيها غسل .. حاكم انت عارف
انى يوم الخميس مقدس عندى

(42)

لازم أكل فيه عسل (يضاحك عبد المعطي) إيوة .. وفي نص الليل .. إيوا
الله .. في نص الليل افتكرت انى مكلتش عسل .. رحت شاخط فيها .. آنى
مكلتش عسل يا بت .. فين البريزه .. طلعي البريزه أحسن أضريك بالفاس ..
اتضح ان البريزه وقعت منها فى الزريبه .. ومع إن عنيتها أوسع من عين
الجاموسه معرفتش تلاقيها .. و حياتك رحت داخل الزريبه فى نص الليل ..
و الدنيا كحل .. و مع كده روحت ضاربك عينى العوره دى فى قلب الزريبه
.. شفت البريزه .. فى نص الليل جبتلك البريزه من

عبد المعطي : قصدك ايه عايز تمسك انت فلوس البترول يعنى ...

محروس : مش ما آمنى على فلوسك يا عبد المعطي ...

عبد المعطي : بس بقول يعنى الـ.....

محروس : بلاش دى إسمع أنى و عبد النبى نحرسك ... إيوه

.... إنت هاتبقى محتاج للى يحرسك ... هاببقى معاك فلوس

يامه .. (تبرق عينا عبد المعطي) فلوس يامه ... احنا

نحرسلك الفلوس دى .. الفلوس هاتبقى يا مه ... بالكوم ..

عبد المعطي : (يستغرق فى التفكير فيما تلمع عيناه و يفقد الاحساس

بوجود محروس)

إيوه .. فلوس يا مه .. فلوس كتير .. بتاعى أنى لوحدى .. مهم الجاز فى أرضى .. حتى الحكومة مقدرش تتكلم .. و تتكلم ليه .. الأرض أرضى .. و اللى يطلع منها بتاعى أنا لوحدى .. والحكومة اذا كانت محتاجة البترول و عايزه تاخده لازم تدفع لى فلوس يا مه .. إيوه .. اللى بيحصل فى الرز و القطن أنى مش موافق عليه .. ده اسمه استعباط .. أنى مش مختوم على قفايا علشان تجى الحكومة تاخد البترول بملايم .. رزق وربنا ساقهولى .. لى أنى .. (**بعدة**) تقوم الحكومة تاكل حقنى .. (**صمت**) بس .. احنا كلتنا يا واد يا عبد المعطى ملك الحكومة الحكومة ممكن تاخد البترول غصب عن اللى خلفوك يا عبد المعطى (**بعدة**) لكن قبل مايخدوا نقطة واحدة لازم يشتروا منى الأرض بفلوس كتيرة .. إيوه .. بألف .. ألف إيه ... بألف ألف مليون (**يصح**) مليون عاى الأقل بدشيليون ... البترول بيكسب كتير .. بالحكومة تدفع يا أبيع لأمرىكا .. إيوه أبيع لأمرىكا .. (**صمت** و **تفكير**) أمرىكا مرة واحدة يا عبد المعطى ... (**بعدة**) ما هى حاجة تجنن .. طيب يـ

طيب يعملونى مدير عالبتترول (**صمت**) مدير إيه (**يتوجه الى محروس الذى يقف مدهوشا**) مدير إيه ده يا محروس اللي عايزين يضحكوا عليه بيها .. البترول بتاعى .. أنى هابقى منكى لأمرىكا كده على طول لاحكومة ولا زفت .. أنى هابقى الحكومة .. إيوه .. أنى هالبس تاج يا محروس .. أنى هابقى الملك يا وله .. أنتم حراسى .. هاتقفوا هنا عالباب .. و العمدة البغل ده يقف هنا .. مفيش حاجة اسمها

(43)

عمدة من يوم و رايج .. و الخضرى هاعمله وزير .. الشغلانة دى ملهاش
 غير النصاب ده .. خلاص .. الخضرى وزير .. كلتكم هاتشتغلوا عندى ..
 إيوه هاتشتغلوا عندى .. أنا بتاع البترول .. (يعلو صوته جداً بحيث يرتعد
 محروس من الخوف) أنا بتاع البترول ... أنا أغنى واحد فى العالم .. أنا
 عندى بترول يا ناس .. أنا الملك .. أنا الملك .. أنا الملك ...

(اظلام)

الفصل الثالث

(44)

دوار العمدة .. أريكة و بعض المقاعد ... يدخل العمدة وبجانبه مصطفى يحدثه وخلفهما سليمان منتبها فيما يوحى بأن ثمة اتفاق بين العمدة وسليمان منتبها فيما يوحى بأن ثمة اتفاق بين العمدة وسليمان على شئ لا يعلمه مصطفى .

العمدة : (وهو يجلس على الأريكة فى المنتصف) اقعد يا مصطفى ...
ماتحملش هم ..

مصطفى : بس يا عمدة الكلام اللي انت بتق

العمدة : (مقاطعاً) لابس ولا يحزنون ... إنت ها تعمل مشكلة على إيه
(ثم الي سليمان الذى مازال واقفاً بجواره) ما تقعد يا سليمان
امال ...

مصطفى : طيب الواد لما يبجى أقوله إيه !! .. أنى اديتة علم بحكاية
عبد العاطى دى ... ضرورى ها يصفى كل أعماله وتانه جاى
... وضرورى هيسأل فين الكازينو

سليمان : (بحدة) إنت بتعيد وتزيد فى الكلام ليه يا مصطفى ... هو
يعنى ابنك ده كان خبير !! دا حنة زبال فى كوبانية

مصطفى : (وهو يصيح) انت بتقول ايه يا سليمان !!! والله العظيم عبد
العاطى ما ها يعرف يعمل حاجه من غيره ... ابنى زمانه

يعرف كل حابه فى البترول ..

سليمان : (ينتفض واقفاً ويتحد) طيب والله الع...

العمدة : جري ايه يا سليمان ... ما تخلونا فى الحكاية أمال ..

سليمان : (يهدأ) أنى قصدى أقول ... إيوه يا مصطفى .. أنى عايز
أقول إن جناب العمدة قصده مصلحتك

مصطفى : هو اني قلت حابه مهو انت الل....

العمدة : (مقاطعاً إذ رأى الفرصة قد سنحت) طيب يا مصطفى طب
قولى ابنك ده بعت لك فلوس أد ايه وانا أريحك .

سليمان : أهو كده الكلام ... يسلم فمك يا عمدة ... كده ... ع
المكشوف.

(45)

مصطفى : (بعد تردد) إنتاشر ألف ...

العمدة : (يضحك بسخرية) تبقى الحكاية مش كازينو ... ولا إيه يا سليمان ؟. (الي مصطفى) هو أصل ابنك ده أهبل ... أنى عارفه .. مش هو برضه اللي كان بيمشى طول النهار فى البلد حافى وحاطط البلغة تحت باطه ؟

(يستمر العمدة فى الضحك ويشاركه سليمان)

سليمان : (وهو يضحك) وساعة ما ييجى ينام راسه وألف بلغه لازم يلبسها وهو نايم (يواصلان الضحك) إيوه يا عمدة .. بالك ؟ ... سيده أبو امه .. نسيب مصطفى كان كده ... شفت عمل ايه يوم فرح مصطفى (يغرقان فى الضحك)

مصطفى : (بحدة) ما تخشع يا سليمان ... الراجل مات ومتجوزش عليه
(الا الرحمة)

العمدة : الله يرحمه ... فضحنا يوم فرحك يا مصطفى مع الاغراب ...

سليمان : الف رحمه تنزل عليه ... كان راجل دهل ... (الي العمدة فجأه) هو ده يا عمدة اللي كان مخليه الله يرحمه شايل البلغة تحت باطه .. وابن مصطفى شربها منه بس بهبل ..

مصطفى : (بحدة وغضب) إيه هو ده يا سليمان اللي ابني شربه م الراجل.

سليمان : الخوف ... (الي العمدة) بالك يا عمدة ... كان الله يرحمه
مشارك أبو الخضرى على جاموسه .

العمدة : وابو الخضرى كان شيخ النصابين .

سليمان : قام المرحوم خاف ع الختم أحسن أبو الخضرى يسرقه ويلهف
منه نص الجاموسه .. بالك يا عمدة ...

العمدة : (وهو يضحك) عمل إيه

مصطفى : (بحدة) جري إيه يا سليمان إيه الحكاية يا عمدة

سليمان : نزل المركز ... وراح رايح مركب نص نعل جديد للبلغة (يغرق
العمدة فى الضحك) وبعدين قام رايح عامل الختم على البلغة
.. ع النص نعل !!

العمدة : (وهو غارق فى الضحك) ويوم فرح مصطفى يقول خاتم بالبلغة
ع القسيمة .. فاكرا يا مصطفى الشيخ عمل إيه ساعتها ..

سليمان : راح واخذ ديله فى سنانة وقال يا فكيك ..

(46)

مصطفى : يا جماعة كفاية ... خلونا فى المهم أمال ..

سليمان : (بعد أن هدأ) إيوه ... خلونا فى المهم ...

العمدة : انت قلت كام يا مصطفى ؟

مصطفى : انتاشر ألف ...

العمدة : يبقى ابنك يقصد قهوة زى بتاع الشحات بس مبلطة ومهونة

... هما الانتاشر ألف ملطوش دول يعملوا ايه !! .. لا انت ولا

ابنك عارفين حاجة .

مصطفى : والله العظيم قال كازينو .. والجواب أهه (يخرج خطاباً من

جيبه)

سليمان : (بنفاذ صبر) إنت دماغك ناشفة كده ليه يا جدع .. ما تفهم م

الراجل ..

العمدة : أنى هاوفرلك الانتاشر ألف دول .. الكازينو أنى هاعمله علشان

خاطر ابنك من غير ما يغرم مليم .

مصطفى : (يفرح) والنبي ؟ ... ممن معاك ؟..

سليمان : لازم تحط ايدك فى ايد العمده ... وان كان على اخوك عبد

الرحيم ملكش دعوه بيه

العمدة : (وهو ينهض موحياً بعدم اكترائه) الشاي يا ولاد (ينظر الي الى داخل غرفة فى الدوار ثم من هناك الي مصطفى) إيوه من معايا .. ما تقوله يا سليمان .. هو أنى مش قايلك على كل حاجة ... الشاي يا ولاد ...

مصطفى : أنى مش فاهم حاجة ..

سليمان : (باهتمام) العمدة عايز مصلحتك يا مصطفى ...

العمدة : (يعود الي مكانه ويضغط أكثر على مصطفى) عبد العاطى البترول فى أرضه .. والمسألة مش إنه هيبقى صاحب بترول ويس ..

مصطفى : آمال هيبقى أيه كمان

العمدة : ها يبقى كبير ... والكبير محدش من الصغيرين يعرف يحط عينه فى عينيه ..

(47)

سليمان : (بحدة) والله العظيم الحكاية دى فيها ملعوب .. البترول اللي فى أرض عبد العاطى من أرضى أنى ... وابن الواطية ده أرضه واطية وأنى أرضى عاليه ... علشان حظى الاسود ... المفروض يا عمدة عابد العاطى يقسم بالنص معايا ...

مصطفى : هو احنا لسه عرفنا الحكاية بترول ولا زفت __ ما يمكن ما يطلعش بترول ..

العمدة : طيب واذا طلع بترول .. نفضل زى ما احنا .. نخط نحك ادينا على خدنا ونقعد ... نستتنا لما عبد العاطى يبلعنا ويحطنا فى عبه . مصطفى : يعنى فكرك نعمل ايه ؟

العمدة : (مستغلاً الفرصة) هو ده مربط الفرس .. نبقى كبار .. إيد على ايد نقوم نعرف نسقف (منادياً) الشاى يا ولاد .. (الى الاثنين كمن يفضى بسر) هو البترول ده مين اللي هيشتره من عبد العاطى ؟

سليمان : الأمريكان .

العمدة : مش الأمريكان ويس .. الطليان والانجليز والالمان .. وكل الناس الحلوة دى ..

مصطفى : إيوه صحيح .. الواد ابني متصور فى السعودية مع ناس أشكال واللوان .. (يخرج صورة من جيبه وريها للعمدة) شوف .. شوف الواد واقف فى وسطهم ازاي .

العمدة : (ينظر فى الصورة) أهم هما دول اللي هایتعاملوا مع عبد العاطى ... البلد ها تتملى .. ها تبقى هيصه ..

سليمان : (وهو ينظر فى الصورة) دا أكثرتهم نسوان .. بص (يقرب الصورة من وجه العمدة) شوف النسوان يا عمدة ... كتهم فره الغفر بتوعنا ..

العمدة : طيب الناس الحلوة دى .. اللى من كل شكل ولون دى ... اللي معاهم فلوس من الخضرة اللي تلوح دى .. هاتقعد فين ... ها تنام فين ... ها تاكل ايه وتشرب ايه .

سليمان : أنا هابيت النسوان عندى .. وان كان على أكلهم ما تحملش هم ..

العمدة : جرى ايه يا سليمان .. هايباتوا فين .. فى الزريبة .. ولا ع الفر .. ماتتكل عدل يا سليمان (يأخذه جانباً) هو ده الاتفاق ؟ ما تصحى أمال يا سليمان .

سليمان : (مسمعاً مصطفى) أنى قصدى يعنى الناس المهلبية دى لازم تقعد قاعده نضيفه تاكل لقمه حلوه ... تنام نومه مستريحه ومستوره ..

مصطفى : إيوه طبعاً.. علشان النسوان ... نسوانهم كتير يا سليمان وان....

(48)

سليمان : (مقاطعاً) هو فى حد منهم بيروح فى حته من غير مراته ...
ولعلمك يا مصطفى .. بيسيويوا نسوانهم تروحفى أيتها داهية
لوحدها ... نسوانهم يا جدع هى اللي بتعمل كل حاجه ... بالك
يا عمدة العيال اللي بيّجوا من بره بيقولوا ايه ؟

العمدة : (باهتمام) بيقولوا ايه .

(بهمس سليمان فى أذن العمدة ثم يذوب الاثنان فى ضحكة عالية .. ثم
يعيد سليمان الهمس فى أذن العمدة فيما يحاول مصطفى
سماع ما يقال ويحشر نفسه بينهما .. ثم يضحك الثلاثة)

مصطفى : (مؤمناً على حديث سليمان) إيوه إيوه .. (ينظر فى صورة
ابنه وعلى شفتيه ابتسامة ساذجة)

سليمان : أهو زمان ابنك الاهبل ده غرقان لشوشته مع ولاد الأبالة دول.

العمدة : (فجأة وبجدية) الخلاصة أن أني ها عمل لوكاندة كبيرة .. فندق
.. خمستاشر دور ... ع الفدان ونص .. ع السكة .. الدور
التحتانى كله كازينو.. علشان خاطر ابنك يا مصطفى ..

سليمان : ابنك هو مدير الكازينو ... مدير النضافة كلتها فى الكازينو ..
مش كده يا عمدة ؟

مصطفى : (بعد أن فوجئ) هو انت لك أرض ع السكة .. (وهو مرتاب)
تقصد ال.....

العمدة : (مقاطعاً) وفر للوله فلوسه ..

سليمان : وها تاخد فلوس زى ما تقول ... أكثر شوية من عبد الرحيم ..
مش كده يا عمدة .

العمدة : ألف زيادة ... أنى مليش بركة الا مصطفى .

مصطفى : (حائراً) عبد الرحيم !!! ألف !! فدان ونص !!

(فى أثناء حيرة مصطفى يتناهى من الخارج صوت عبد الرحيم وهو مقبل)

عبد الرحيم : يا اهل الله ياللى هنا .. يا عمدة ...

(ينتبه مصطفى على صوت أخيه فيتحفر وهو ممتلاً غيظاً)

العمدة : شوفوا مين يا ولاد اللى بيزعق ده ..

عبد الرحيم : (وهو يدخل مندفعاً بصحبة جميل) خبر ايه يا عمدة ... ايه
الحكاية عبد العاطي قلقان والحكومة زى ما تكون كفت ع
الخبر مجور ..

(49)

(يهجم مصطفى على عبد الرحيم ويحاول ضربه فيما يحاول سيمان وجميل
فض المعركة)

مصطفى : كنت ماسك فى الأرض بسنانك .. دلوقتى بتبيع سهل ... والله
يا بن الكلب مانى سايبك

عبد الرحيم : أنى ابن كلب يا بن البرطوشة ؟ ... إيوه بعت .. أنى حر .. أبيع
للى يعجبنى ..

سليمان : ياجدعان انتوا اخوات مش كده (يحاول منعهما من الوصول
الى بعضهما)

مصطفى : البيع ده باطل ... البيع ده باطل يا عمدة باطل

سليمان : بالعربى كده أخوك باع حقه للعمدة .. والحق ده شايع فى
الأرض ... يعنى متقدرش تعمل حاجة ع السكة الا بموافقة
العمدة ..

العمدة : أنى جيتلك دوغرى يا مصطفى ... عايز تبيع يا تلتमित مرحبا
.. مش عايز ..

مصطفى : (كان ماسك فى الأرض بسنانه) ... إيوه .. علشان عرفت ان
لوله مش عايز ياخذ بنتك تقوم تنتقم منه ؟ ... ده يصح يا

ناس؟.. ما تقول ياسى جميل ... هوا الجواز بالعافية ؟

عبد الرحيم : أنى بنتى تتجوز ابنك الالهبل ده !!

جميل : العمدة ها يعمل فندق كبير يابا مصطفى ... ها ينصف البلد ..

مصطفى : والكاзино كان يوسخها ؟... ما انت كنت مبسوط م الكازينو.

جميل : بس الفندق ها يخلى البلد زى أمريكا .

عبد الرحيم : أنى بعت وخلص .. وبعدين أنى مش فاضى لرزالتك دى ..

بجهز لفرح البت .. وإن كنت عايز تحضى أدى انت عارف

طريق الدار .. وان ما كنتش داهية تاخذك .

مصطفى : (وهو يهم بالهجوم على عبد الرحيم) مهو انت بعت الأرض

للغريب .. مش بعيد عليك تبعننى انى كمان .

سليمان : (وهو يأخذ مصطفى من ذراعه) تعالى يا مصطفى .. ها قولك

بس .. تعالى (يفلح أخيراً ويتحنى بمصطفى جانباً ثم الي عبد

الرحيم) مصطفى ها يحضر يا عبد الرحيم كلتنا ها نحضر .

(50)

العمدة : أمال عبد العاطى فين يا عبد الرحيم .. النتيجة ميعادها النهاردة .. ويمكن مندوب الحكومة يوصل حالاً .. مش المفروض برضه عبد العاطى يقابله .

جميل : عبد العاطى عند الأرض .. الناس كلتها هناك ..

عبد الرحيم : (بعدة) الجدع قلقان يا عمدة .. وله حق .. الحكومة زي ما يكون حاطة ايدها فى مائة ساعة .

جميل : مش بيعملوا تحاليل يابا عبد الرحيم ...

العمدة : التلغراف اللي وصل بيقول ان المندوب جاى النهارده .. بس أنى كنت عايز عبد العاطى قبل ما يجى المندوب .. ايوه .. لازم يجى علشان نشوف ها نعمل ايه ..

عبد الرحيم : فى الفرع .

العمدة : فى الشركة يا عبد الرحيم .. أمال ايه .. هى سايبه .

عبد الرحيم : خبر ايه يا عمدة .. أنى قلت حاجه تزعلك !

العمدة : (بغضب) ايوه .. مهو انت ها تجوزه بنتك فا لازم تدافع عنه (ويحسم) البترول ده مش بتاع عبد العاطى ..

عبد الرحيم : لأ بأه .. دا انت معبى وقلبك مليون .. تكونش عايز تجوزه
بنتك يا عمدة أنى ما عنديش بنات للجواز ... بس الحق حق .

عبد الرحيم : وايه هو الحق يا عمدة ؟

(ينضم سليمان ومصطفى اليهم بعد أن أنهيا حديثهم)

العمدة : انت عارفه . (الي سليمان) مش كده ولا ايه يا راجل يا طيب ؟

سليمان : كده يا عمدة ... العمدة بيتكلم مضبوط يا عبد الرحيم .

عبد الرحيم : (بحدة) والله العظيم يا سليمان انت اللي يعرفك ما يقلعك من
رجليه .. خلاص اشتغلت مطباتى للعمدة .. ايه هوا اللي صح
يا سليمان ؟

العمدة : هو اللي يشهد بالحق كفر .. البترول ده مش بتاع عبد المعطي .

عبد الرحيم : ايوه كده ... تبقى الاشاعة اللي ماليه البلد طالعه من دوارك ..
(بحزم) لأ يا عمده .. شوفلك لعبة غير دى .. خضرة أم عبد
المعطي زمانها جايه ومعها عقد الأرض

(51)

زهران أبو عبد العاطي الله يرحمه شاري من ابوك .. (الى سليمان) وابوك
شاهد على العقد .. ها تتكر شهادة ابوك يا سليمان !!؟

خضرة : العقد أهو يا ناس .. زهران شاري بحر ماله .. طول عمره كان
بيزرع الأرض دى .. مات وهو بيسقيها والكل شاهد .. الأرض
دى خدت عمره وخدت عافيتى .. جاى دلوقت يا عمدة تقول
انها بتاعك .

العمدة : أنى ماقلنش ان ابويا ماباعش .. ايوه أبويا باع .. بس افرضى يا
خضرة ان انى بعنلك الدوار ده وبع....

خضرة : الدوار خليهولك احنا مش بتوع دواوير .

العمدة : أنى بقول افرضى ... وبعدين بعد ما اشتريتى الدوار لقيتى فيه
زروية مليانه ذهب .. تبقى الزروية بتاع مين .

عبد الرحيم : تبقى الزروية باع صاحبها .

سليمان : وصاحبها يبقى أبو العمدة .. والعمدة هو الوارث الوحيد لأبوه ..

عبد الرحيم : (يصيح بغضب) لأ يا سليمان .. لأ يا عمدة .. لأ يا ناس .. لو
كان أبوك عايزك تورث الزروية ماكانش خباها منك .. الزروية
تبقى بتاع صاحبها .. باسمه .. نشوف هو كان عايز يعمل

بدهبها إليه نعمله ..

خضرة : أبوك كان عارف انك ظالم وعلشان كده باع الأرض لزهران قبل ما يموت .. كان عارف انك مش بتاع فلاحه .. كان بيقول الأرض للى يزرعها .. وعلشان كده باع لزهران .. وياريته كان باع الزمام كله لاهل البلد قبل ما يموت .. لكن مالحقش .. الأرض اللي سايبها لك ابوك بورتها .. وجاى دلوقت عايز الأرض اللي احنا عايشين عليها ..

عبد الرحيم : وهو يعنى ايوك هو اللي حط الجاز فى الأرض .

خضرة : (تصيح) احنا مش عايزين جاز ولا هباب .

(يدخل عبد العاطي وخلفه مجموعة من الشباب بينهم محروس والشحات وكل منهم يحاول اوصول اليه لاعطائه جواز السفر فيما يحاول شيخ الخفر فى منعهم من الوصول الي عبد العاطي)

شيخ الخفر : ابعد يا واد انت وهو كتكم مصيبة .. انتم هاتلاحقوا الراجل فى كل حته يروحها (يتثبت محروس فى جلباب عبد العاطي)

(53)

محروس : البظبورت بتاعى أهو ياسى عبد العاطى ... والنبي يا خاله
خضره تخليه يشغلنى معاكم ... والله العظيم أنى بسوف فى
الضلمة يابا عبد الرحيم ..

الشحطات : أنى يا ناس القهوه ماعدتش بتجيب همها .

خضرة : انكش يابن الهبله انت وهو ... معندناش جاز .. احنا هانزرع
أرضنا (ثم الي العمدة) والذهب اللي حطهولك أبوك فى الأرض
ده احنا مش عايزينه .. احنا هانعيش على دراعنا .. الزروية
اللى هتخليك ععايز تاكلنا دى خليها مدفونة ...

عبد العاطى : كلام ايه ده يا امه ... البترو....

العمدة : (مقاطعاً وبحدة) البترول ده بتاعى ... بتاع عيلتى واجدادى ..

عبد العاطى : (مندهباً وبحدة) بتقول ايه يا عمدة .. يا ناس .. يا أهل البلد
الرايح يقول للجاي ... العمدة عايز ينهنا .. عايز يورثنا واحنا
على وش الدنيا ...

سليمان : جرى ايه يا عبد العاطى ... المسألة بالأصول .

عبد الرحيم : أنى عايز افهم انت جنسك ايه يا جدع انت .. انت مع مين
بالظبط .. هو مش انت برضه اللي حلفت ألف يمين ان العمدة

بيشتري منى الارض علشان يخلى مصطفى يعمل الكازينو ع
السكة ... مش انت برضه اللي مليت دماغى وانى مابعتش الا
بناءً على كلامك ... دلوقت بس فهمت العمدة دفع اكثر من
اللي انى قلت عليه فى الأرض ليه .. (يتوده الي مصطفى
اخيه) عايز يجردنا م الارض واحد ورا التانى .. عايزنا نرجع
ترحيله زى زمان .. زى ما كانوا مستعبدين أهالينا فى الايام
السوده (الي العمدة) لعبة جديدة بتلعبوها .. عايزنا خدامين ..
مش فلاحين .. عايزين تقضوا على الحاجه الوحيدة اللي بنعرف
نعملها .

مصطفى : جاى دلوقت نتكلم .. ما انت بعت وخلص .. كنت فاكرك انك
بتحطنى فى مزناً علشان معرفش اعمل للوله مصلحته .. لكن
العمدة كتر ألف خيره ...

سليمان : ايوه .. هايَعْمَلْهُ الكازينو .. ومش هايغرمه مليم ..

عبد الرحيم : (يضحك بمرارة وسخرية ايضاً) اللعبة باينه يا مصطفى زى
الشمس .. أزرع أرضك يا خويا وكفاية خسارة ..

عبد العاطي : (بحدة) أنى مالى ومال الكلام ده .. أنى مابعتش أرضى ومش
هابيع البترول اللي فيها ده بتاعى .. بتاعى أنى لوحدى ..

(54)

العمدة : أنى مقلتكش بيع ... انت خايف كده ليه !!! الأرض ملكك ... والبترول بتاعك .. بس هاتطلع البترول ده ازاي !! .. ها تحط المواتير والمكن اللي ها تطلع بيهم فين حته ؟ ... هاتحط البراميل فى أرض مين ؟ ... العربيات اللي بتشيل الجاز دى هاتعدى من أيتها مصيبة ؟ .. هاتخرم فى أرض مين ؟ ... ماتقول ؟

سليمان : ابوه صحيح ... دا أنى ارضى لازقه فى أرضك لطع ..

العمدة : وأرضى محوطة الزمام .

جميل : وأرض عيلتنا فى السكة .

العمدة : يعى كل واحد فينا يقدر يقف فى سكتك .. يحوشك ... كل واحد فينا يقدر يحولك بير الجاز ده لبكورت يعفن فيه البترول ومايقالوش أيتها قيمة ..

(يؤخذ عبد العاطي ويشعر أنه فى مأزق حقيقى فيفكر بعمق)

خضرة : (بعد ان رأت حيرة ابنها) نزرع الأرض يا عبد العاطي .. لا بترول ولا زفت .. ايدى على ايدك ياخويا هانطلع م الأرض دى دهب .

عبد العاطي : (وقد اهتدى الى حل) هادى لكل واحد فيكم مائة جنيه عالفدان .

سليمان : (معتزلاً) آه .. بتقول آه ياخويا .. سمعنى كده ..

جميل : احنا هاناخذ بالدولار ..

العمدة : مائة جنيه ايه اللي بتقول عليهم يا عبد العاطى .. احنا
بنشحت

سليمان : دا انت هتكسب يامه ... دا ابن اخويا فى أبو ظبى بيقول ان
ابو ظبى ده بيكسب ديشيليون دور فى اليوم .

عبد العاطى : كل واحد خمسين دورر .

جميل : يعنى تمن برمىل ونص .ز البير ده هايطلع على الأقل مليون
برمىل فى اليوم .

عبد الرحيم : هو بير أبوك يا جدع انت .. انت هاتقر من دلوقتى .

خضرة : طالع لأمه .. عليها عين تهد جبل .. ما انت بتكسب من
السعودية شئ وشويات .. قالك حاجه .

عبد العاطى : (بنفاد صبر) أمال كل واحد عايز كام ع الفدان .

خضرة : (تصيح فى وجه ابنها) احنا هانجيب منين يا اهل انت .. هو
الزفت ده هايجيلك كام مدعوق ؟..

عبد العاطى : (ياخذ أمه جانباً) ياولية ماتخافيش .. البترول بيكسب كتير ..

مهما دفعنا لهم الفلوس مش ها تخلص .. هي فلوس السعودية
بتخلص .. عمرها ماها تخلص .. وكل ده من البترول ..

خضرة : طيب افرض الحكومة قالت انه مش بترول .. افرض يعنى
العينه اللي خادوها طلعت جله حمضانه .. مهى الجله لما
بتحمض ريحتها بتبقى هيّ والجاز واحد ..

عبد العاطى : (بحدة) يا ولية تفى من بقك .. الأرض ايحة جاز .. وانى
مش عارف الحكومة لغاية دلوقت ساكتة ليه .. (الى العمدة)
هى الحكاية ايه .. بيعملوا ايه لغاية دلوقتى ... مناخيرهم
مسدودة .. الأعمى يبص فى أرضى يقول فيها بترول ... وله
يا محروس ان....

محروس : (بسرعة) غرقانة بترول .. عايمة بترول .. الجازيقول أنى أهه
.. أنى هاشتغل معاك يا عبد العاطى ... مش كده ؟

الشحات : أنى من ساعة ما رحنت ناحية هناك مرأتى مش طايفة ريحتى
.. كل شوية نقولى ريحتك جاز .. أنى شامم ريحة الجاز من
هنا .

عبد الرحيم : أمال ايه الحكاية .. شهر لغاية دلوقتى ولا حس ولا خبر ..

الشحات : مش كانوا المفروض برضه يجيبوا بلدنا فى التلفزيون يابا عبد
الرحيم

محروس : (بجدية منافقة لعبد العاطي) ولا حتى يجيبوا عبد العاطي وخاله
خضرة مش الفضل ليهم برضه

مصطفى : (يضحك هو والشحات) انت عايز تقضحنا يا محروس ..

الشحات : ايوه .. يصوروها وهي بتقرص جله ..

عبد العاطي : يعنى لو كان البترول ده طلع فى مصر مش كان زمانهم
واجعين دماغنا .. مهو احنا مالناش قيمه عندهم .. على مهلهم
.. هما غرمانين إيه .

محروس : بس ايام القطن تلاقهم زى الهبوش .

مصطفى : القطن بس .. هما بيسيبوا حاجه .

عبد الرحيم : (يصيح) الحكومة صعبان عليها ان حالنا ينصلح ..

عبد العاطي : الحكاية دى فيها ملعوب .. أنى لازم اتصرف .

الشحات : إيوه يا عبد العاطي .. احنا لازم نتصرف .. نساfer مصر كلتنا
.. نعمل هيصة هناك .. احنا مش لازم نسكت ..

محروس : انت عايزهم يضرىونا .. احنا نعمل اضراب واحنا هنا .. نصوم
عن الأكل نفضل صايمين

لغاية ما الحكومة بذات نفسها تيجى تشوف احنا عايزين ايه ..

العمدة : انت عايز تعملنا مصيبة يابن الأعور .. ما انشاله عنك ما
 كنت .. **(الي عبد العاطي)** جرى لك ايه يا عبد العاطي .. دا
 بترول والحكومة لازم هاتيحي .. وقيل ما تيجي لازم نكون
 مستعدين .. متفقين .. والا هي اللي هتصرف في كل حاجة .

عبد العاطي : تقصد ايه يا عمدة ؟

سليمان : انت نسيت الكلام ولا ايه ؟

العمدة : الشركة .. الشركة يا عبد العاطي .. الحكومة لازم تيجي تلاقى
 ناس عندها استعداد تقوم بالمهمة .. ناس تقدر تصرف ع
 المكن اللي ها نطلع به ..

(يدخل شكري راكضاً ويبيده ورقة صغيرة)

شكري : يا عبد العاطي .. دوختني عليك .. خلاص يا خاله خضرة ..
 فرجت .

عبد العاطي : ايه يا شكري .. خلاص ايه ؟

شكري : (الذي شد انتباه الجميع) خلاص يابن خالتي .. الحكومة جاية .

العمدة : عرفت منين يا شكري .. قالوا ايه ؟ .. العينه طلعت ايه ؟ ..

شكري : مافيهاش أى شك بابا العمدة .. المندوب هايقولك بنفسه .. (يريه
 الورقة) التلغراف أهه .. تلغراف لك من المحافظة .. **(الي عبد**

العاطى) موظف المكتب عايز الحلاوة

عبد العاطى : (وقد بدأ يشعر بحقيقة الأمر) يعنى خلاص .. خلا..

عبد الرحيم : (بسرعة) مهو البترول باين قدام عينينا ... غيرض هما اللي لازم يعموا حكاية ..

العمدة : ورينى التلغراف ده يا شكرى .. ولا أقولك .. اقراه .

شكرى : (يقرأ) بخصوص البترول الذى ظهر فى قريتكم .. يصلكم اليوم مندوبنا ل..

العمدة : (مقاطعاً) افتح المضيفة يا شيخ الغفر .. قول للعيال يوضبوا غدا .. ادبحوا خروف .. النهاردة عيد يا ولاد .

عبد العاطى : أنى هادبح الجاموسة ..

خضرة : (بانزعاج شديد) تدبح الجاموسة اللي حيلتنا !!.... انت اتجننت ياوله !

عبد العاطى : يا وليه خلاص .. احنا عايزين الجاموسه فى ايه ؟ .. كل أهل البلد معزومين فى داري النهاردة .. من النهاردة كل الأكل لحمة .. لحمة من هنا ورايح يا أهل البلد ..

العمدة : اوعى تتهزز قدام المندوب يا عبد العاطى .

عبد العاطي : المندوب ده مش عايزينه .. احنا خلاص يا عمدة ..
هانعمل الشركة .

جميل : هانسميها شركة بترولكم ..

عبد العاطي : اكتب أسامى الناس اللي هاشتغل معانا يا جميل .. حط لكل
واحد ألف جنيه .. (مستدركاً) ألف ونص .. ألف ونص فى
الشهر لكل واحد .

(يندفع الجميع باتجاه جميل ، كل منهم يحاول الوصول إليه قبل الآخر ،
والجميع يشهرون جواز سفرهم ، فيما يدخل عبد النبى وهو ممسك بخناق
الخضرى ويجره عنوة باتجاه العمدة)

عبد النبى : (وهو يصيح) أنى عايز فلوسى .. مش هاغير اسمى .. أنى
هاشتغل هنا ..

الخضرى : (مستجداً بالعمدة) أنى خلصت كل اجراءاته .. لازم يغير
اسمه علشان يسافر ..

عبد العاطي : زمن النصب بتاعك انتهى يا خضرى .. محدش من البلد
هايروح يتبهدل فى بلاد الناس .. كلتهم هاشغلهم معايا .

الخضرى : أحبيب منين ياسى عبد العاطى .. فلوسه صرفتها على أوراقه ..

عبد الرحيم : (وهو يطبق على رقبة الخضرى) ثلاثه بالله العظيم ان ما ادितه

فلوسه لاخلص عليك ..

العمدة : اذا ماطلعتش فلوس الواد ده أنى هاخرب بيتك ابوك النهاردة .

عبد العاطى : أنى هاشغلك شغلانه كويسه يا خضري بس رجّع لعبد النبى
فلوسه .

الخضري : بس ماتكونش شغلانه متعبه .

عبد العاطى : لأ .. شغلانه مرتاحه .. هاديلك فيزا تروح تجيب بيها
سعوديين ..

الخضري : (فرحاً) والنبى (يخرج النقود من جيبه) خد يا عبد النبى (الى
عبد العاطى) أنى هاجيبلك كل السعودية هنا .

عبد النبى : اللى اسمه عبد النبى مايدخلش هنا .. واللى اسمه فهد كمان .

محروس : واللى عينه فيها أى حاجه .. لازم تدقق فيهم يا خضرى زي ما
كنت بتعمل معانا ..

مصطفى : هما بيعرفوا حاجه .. دا الواد ابنى بيقول فى الجوابات انهم
عايزين ياكلوا ويشربوا ويس ..

سليمان : هو احنا ناقصين يا عبد العاطى .. البلد هنا زى النمل .

عبد الرحيم : (بعدة) احنا ناقصين تتابلة .. جرى ايه يا عبد العاطي ..!

عبد العاطي : احنا عايزين خدامين .. الخضرى يروح ينصب عليهم واحنا هنا نشغلهم خدامين .. زى ماكانوا بيعملوا مع اللي يروح لهم من هنا .. مش كده ولا لا يا جميل .

الشحات : بس اوعى تجيب أجنب وتسيينا يا عبد العاطي .

العمدة : الأجنب هايجوا لوحدهم .. آمال مين اللي هيشترى البترول .

سليمان : بكرة الخبر يروح لهم .. هاتلاقهم هنا زي الهبوش .. الجماعة دول بيموتوا فى الجاز .. (الي العمدة) بس احنا هانتعامل معاهم ازاي يا عمدة ..

مصطفى : ابني هو اللي هيتعامل معاهم .. دول كلهم حبابيه هناك .

عبد العاطي : احنا عايزين ترجمان .. ابنك مايعرفش يترجم .

الشحات : سى فوزى لبلب يابا العمدة .. بيضرب باللسان .

العمدة : صحيح يا ولاد .. هو فوزى فين .. محدش شافه من يوم ما شخط فيه ع القهوة .

عبد النبي : أني شايفه هو والشيخ عشرين جايين على هنا .

العمدة : اطلع يا واد يا محروس خليه يجي قوام .

خضرة : يعنى خلاص معدش حد هايروح يشتغل فى السعودية ..

عبد العاطى : خلاص يامه .. كنا بنروح السعودية علشان البترول هناك ..
دلوقتى الذهب فى أرضنا يا خضرة .

سليمان : احنا اتفتحت لنا طاقة القدر يا ام عبد العاطى .. بكره تشوفى بلدنا
دى .. المعفنة دى هابقى شكلها ايه ..

الخضرى : كل البيوت اللى بالطين دى هانتشال .

عبد العاطى : القديمة والجديدة .. أنى هاعمل البلد دى من أول وجديد .. أنى
هاجيب البواجير تكسح كل الوساخة دى ..

عبد الرحيم : والله براوة عليك يا عبد العاطى .. ابن أصل بصحيح .. احنا
نعمل البلد من أول وجديد ..

عبد العاطى : طل البلد هتبقى قصور ..

مصطفى : ابوه .. وندهن القصور كلها بالابيض .. بس زبيدة متععدش
بالطعمية والبدنجان بتاعها ده قدام

القصر بتاعى ..

سليمان : طعمية ايه يا مصطفى .. انت ما بتسمعش عن اللى بياكلوه فى
السعودية .. الأيام السوده دى هاتروح بكل اللى فيها .. لحمه يا
مصطفى .. علىّ النعمة ما اكل غير اللحمه ..

العمدة : احنا بلدنا هانتغير خالص يا ولاد ..

عبد النبي : تبقى المركز يابا العمدة .. المحافظة تبقى هنا ..

عبد العاطي : كل حاجه هاتبقى هنا .. المحافظة والبوسته والسيما .. احنا هانبقى هنا البندر .. معدش حد بعد النهاردة يعايرنا باننا فلاحين .. حتى الجوازات هانعملها هنا .. كل حاجه هاتبقى هنا.

مصطفى : هو المفروض كده .. دا احنا بلدنا شكلها يغم .. والبترول زباينه كلتهم أجنب .. لازم البلد تنتصف علشان الناس دى ..

الشحات : بس الأجانب هاتيحي ازالى والاكس بتاع مصر مابيقفش فى بلدنا .. المفروض الاكس ده يقف هنا .. ده بيعدى يور ولا كأن فى ناس هنا ..

العمدة : ضرورى الحكومة هاتعمل خط من هنا لمصر .. أمل ايه ..
آني هاقول للمندوب بتاع الحكومة الكلام ده .

عبد الرحيم : اكس ايه يا عمدة .. هما الأمريكان فكرك هيقفوا يستتوا القطر .. لا وحياتك ان مكنش هنا مطار ماهم جايين .

جميل : ده كلام مضبوط يا عمدة .. الأجانب يحبوا السرعة .. السعودية مفيهاش قطر .. كله طيارات ..

الخصري : ايوه يا عبد المعاطى علشان اروح اجيبلك السعوديين من هناك
لهدنا على طول .

عبد النبى : والله العظيم لا انت عامل المطار ده يا عبد المعاطى (يدخل
فوزى بصحبة محروس فلا يكاد يشعر به أحد ويفاجأ هو بما
يجرى) أنى مستعد أشغلك المطار ده .. الواد مسعد ابن خالتي
بيشتغل فى المطار بتاع أبو ظبى .. وكان عايز ياخذنى هناك
.. تعرف يا عبد المعاطى الواد مسعد بيقول انها شغلانه سهله
خالص ..

خضره : طيب الحاجات دى كلها هاتعلوها فين حتة .. د الأرض كلفتها
مزروعة .

عبد المعاطى : ياولييه أرض ايه .. زراعة ايه يامه .. احنا هانعوز الزراعة فى
ايه ..

خضرة : يكفيك قيراط .. أهو القيراط التانى نزرعه شويه خضار .. ولا
انت عايزنا نشترى الخضار كمان ..

ممصطفى : الزمام كله مش هايكفى يا ام عبد المعاطى .. قيراط ايه اللي
انتى بتقولى عليه .

الشحات : والترعة اللي موسخه البلد دى نردمها ..

فوزى : (بحدة) اخرس يا شحات .. (الى العمدة) انت عايزنى فى ايه يابا

العمدة .. بعث لى علشان اسمع الكلام ده ..

العمدة : هو انت مش فرحان للبلد ولا ايه يا فوزى .. مالك .. واخذ لك جنب ليه ..

محروس : بصراحة كده هو زعلان علشان وقفة حال البلد .. الناس همملت الأرض والحكومة حاطه ايدها فى مايه سائعه .. لحد دلوقتى محنش عارفين ايه الحكاية بالظبط ..

عبد العاطى : المندوب جاى فى السكة .. هو هيقولك بنفسه .. يمكن تتقنع.

فوزى : أنى فرحان لك يا عبد العاطى .. بس الكلام اللي انتوا بتقولوه ده يخوف ..

سليمان : عايزين نئب على وش الدنيا يا أخی .. عايزين نعيش بقية حياتنا .. انت عاجبك القرف اللي احنا فيه ده .. ابوه لازم نعيش .. ولا هما بتوع السعودية أحسن منا .. كل واحد لازم يعيش فى بيت نضيف .. وياكل لقمه نضيفه .. ويتنزّه شويه بدل عيشة البهايم اللي احنا عايشينها دى ..

عبد النبى : أنى بصراحة زهقت من الفلاحة .. والدار فى أى ساعة ها تقع ع العيال وان مكنتش هاشتغل فى الجاز بتاعك يا عبد العاطى أنى هاسافر أبو ظبى ..

الشحات : تكونش خايف أحسن الجاز يولع فى البلد ياسى فوزى ..

عبد العاطي : هو محموق علشان الترة .. زى ما يكون وارثها عن ابوه ..
ايوه هانرمها .. ولعلمك بأه أنى هاشترىها من الحكومة .. وذا
كان لك ورث فيها روح طالبهم به ..

عبد الرحيم : يا عبد العاطي الراجل مقصدوش كده .. هو صعبان عليه
الترعة .. هي مش كانت روح البلد .. (الى فوزى) بس احنا
ماعدناش عايزينها فى حاجه .. مهو عبد العاطي هايعمل
مكانها حاجات للبلد .. عبد العاطي بيدور ع المصلحة ولازم
نقف معاه مش نقف فى وشه .

خضرة : والله العظيم عبد العاطي بيجبك يا فوزى .. دامن شويه كان
بيقول .. كان بيقول هو فوزى الوحيد اللي يعرف يتعامل مع
الأمريكان .

العمدة : هاتشغل ترجمان .. ايوه .. إنت اللي هاتعامل مع ولاد الأبالسـه
دول .

فوزى : (يضحك عالياً) انتم خلاص قسمتموها !!... عملتوا لكل واحد
وظيفة ! (يستمر فى الضحك)

عبد النبى : ايوه .. عبد العاطى مش هاجيب من بره .. كل واحد فينا يمـسك
شغلانة .. بس أنى هأخذ كام ريال يا عبد العاطى .. الواد مسعد
بياخذ ألفين ريال .. و يكون فى علمك أنى مش هأخذ أقل منه

(يضحك فوزى ضحكات عالية تنم عن سخرية)

فوزى : (الى جميل) و انت اشتغلت إيه يا حاج .

سليمان : الحاج جميل شريك يا فوزى .. شركة بترولكم الحاج جميل شريك فيها بالربع .. هو اللي عليه المكن .. و المواتير كلها .

(يضحك فوزى عالياً)

فوزى : (وهو يشير فى باتجاه العمدة) ويا ترى العمدة عمدة برضه .. ولا له شغلانة تانيه فى شركة بترولكم يا سليمان ..

العمدة : أنى عمدة البلد دى يا فوزى .. أنى المسئول هنا .. شغلتى أن المعوج أعدلته .. واللى لسانه طويل أقطعهوله ..

فوزى : معلوم يا عمدة .. (يستدير) تعرف يا عبد العاطى لو البترول ده طلع فى دارنا .. لو كان ده حصل كنت عملت إيه .

عبد العاطى : كنت زلتنا .

فوزى : مش هاتفهم .. و انا مفيش فى ايدى حاجه أعملها حتى لو طلع تحت سربرى اللي بنام عليه .. مش فى ايدى .. لكن لو بايدى كنت هاكفى على الخبر ماجور .. ايوه أكفى على الخبر ماجور .. لو كان البترول ده طلع تحت راسى كنت سديته براسى

الخضرى : والله تعملها .. ما انت ما بتحبش الخير لحد ..

فوزى : لأ يا خضرى .. بس ياريتك تفهمنى .. يارتكم تفهمونى .

العمدة : أنى فاهمك كويس .

سليمان : انت يا جدع عاجبك الحاله اللي احنا فيها .. انت مش حاسس بالفقر اللي احنا فيه .. صعبان عليك نعيش شوية زي البنى آدمين .. مرة تقول هاسده بدماغى .. ومرة تقول خايف .. هو البترول ده يا جدع انت خمرة خايف علينا أحسن نشربه و ندور فى البلد سكرانين .. ماتحس شوية يا بنى آدم .. انه...

فوزى : (مقاطعا) حاسس .. ويارتنى ما بحس كان زمانى مرتاح .. يابا سليمان احنا عايزين الزفت ده .. أحنا أول ناس محتاجينه .. ده كلام صحيح يابا عبد الرحيم واللى يقول غيره يبقى ما بيعبش الخير لأهله وناسه .. بس أحنا عايزينه بيه ؟ .. علشان نردم الترعه !! .. علشان نعمل الفندق ونبيت فيه الأجانب !! .. علشان نشترى بتمنه معلبات وسجاير مارلبورو !! .. علشان نبطل شغل و نبور الأرض و نرحرح .. علشان نقضى على الشغلانه الوحيدة اللي نعرفها .. لو ها نعمل زى اخوانا هناك .. لو ها نبيعه زى ما يبيعه وما نعملش حاجه غير اننا نصرف فلوسه زيههم فى الفاضى يبقى بلاشه ... البترول ده اذا ها يخضر الزرع .. و اذا ما كانش هايحافظ على الأرض .. و اذا ما كانش هيوسع الترعه و يجرى المية فيها يبقى يروح فى داهية ... البترول ده يا خالة خضرة اذا ما كانش ها يحرك كل حاجه هناة ينفخ فيها روح قوية يبقى الله لا يجعله يجى .. يا عبد المعطى انت اتحرمت كثير .. كلنا اتحرمتنا و اتظلمنا كثير

.. عايشين عيشه كلها ذل ووساخة .. بنتعب على قد ما بنتعب
 وكله ضايع .. احنا نقدر نعمل كل حاجة .. حتى من غير
 جاز نقدر نعمل كل حاجة .. بس القسمه مش مضبوطه .. فى
 ناس يههما ان الميزان يفضل مايل علشان تفضل انت و
 محروس و عبد النبى تدوروا فى الساقية زى البهايم .. و علشان
 كده بقولك عايزين نفتح .. صحيح البلد وسخه و بيوتنا وشخه
 واللقمه وسخه و حاجات كتير عايزه تتصلح .. بس نص العمى
 ولا العمى كله .. الضرورى قوى نعمله .. و النص نص نستنى
 عليه .. ايوه احنا لازم ناكل كويس بس مش الكويس فى الأكل
 هو المعلبات اللى جايه من أمريكا .. نلبس كويس بس مش
 الكويس فى اللبس هو بس الحرير اللى بيعرونا بيه .. فلوسنا
 مش لازم تضيع .. فلوسنا لازم نقف بيها على رجلينا علشان
 لو الجاز خلص مره واحده نلاقى فى كل واحد فين بير جديد ..
 الأمركان مايبروحوش السعودية يا عم مصطفى علشان البترول
 .. مش ها يجوا هنا زى النمل الا علشان الفلوس .. لان لو
 سابوها فى ايدك ها تبقى انت حاجة حاجة تانيه .. ها تقدر
 تحمى نفسك بنفسك .. ها تطلع لفوق وهما عايزينك تفضل
 تحت .. ها تمشى لقدام وهما عايزينك ترجع دايماً لورا .. ها
 تبقى قوه وهما عايزينك ضعيف .. ها يجى اليوم اللى تقدر
 تعتمد فيه على نفسك ودى بالذات بيعملوا المستحيل علشان ما
 تتحقق.

عبد المعطي : احنا هنشغلهم بفلوسنا زى الحمير .. جه الوقت اللى لازم

نرتاح فيه .. هو احنا تعبنا شوية؟! .. خلاص .. دلوقتي لازم
 نجعصن على كراسينا زى البهوات .. زى الملوك اللي احنا
 عايزينه يجي لحد عندنا .. أنى ياما شقيت أنى و امى .. عايزنا
 لما ربنا يفرجها علينا نقول يا شقا مره تانيه .. دا احنا نيقى
 مجانيين .. بيقى عندنا بترول و ارواح افلح .. أمال فايده الفلوس
 ايه .. الناس تيجي تشتغل و تاخذ أجرة ..

الخضرى : هات الفيزة يا عبد العاط .. حاكم سى فوزى ده فاضى و باله
 رايق .. وانى ارواح اشحنك

طيارة خدامين

سليمان : يسلم فمك يا خضرى .. (الى فوزى) ده المثل بيقول هين قرشك
 ولا تهين نفسك .. ولا ايه يا بتاع القرايه و الكتب ..

العمدة : مهى ملغبطه مخه .. مخلياه شايف كا حاجه بالمقلوب ..

سليمان : هو كده .. كلامه كتير و على الفاضى .. خالف تعرف (الى
 فوزى) بالذمة اللي بنقوله ده كلام يقوله واحد عاقل .. الجماعة
 اللي ربنا رازقهم بنعمة البترول بيعملوا ايه غلط ؟؟ .. دا الواد
 ابن أبوك مصطفى بيقولك كل حاجه هناك بالزراير ... الشوارع
 تشوف وشك فيها .. النافورات .. الجنان .. حاجات تشرح القلب
 .. الأكل هناك بالكوم ومن كل صنف .. ناقصهم ايه هناك ؟
 .. بيلبسوا احسن لبس .. مريحين على الآخر .. تعرف تقولى

ده مش عاجبك فى ايه ..

فوزى : (بحدة) زيف .. دهان من بره على حيطه قديمه فى وقت تتهد .. بريق مفيش وراه غير الضلمة و ...

سليمان : (مقاطعا) يووه !! ... انت لسه ها تخطب .. يا جدع انت بوظلتلى مخى ..

مصطفى : يا فوزى يا بنى ده رزق .. ولما ربنا يرضى علينا برزق واسع كده لازم نبشرك على نفسنا بيه .. ولازم كمان الدنيا كلتها تعرف .. أمال ايه .. ما انت عارف وأما بنعمة ربك فحدث

صوت من الخارج : (عاليا) معلوم (يدخل الشيخ عشرينى صاحب الصوت ، وهو ضرير ، يسحبه خفير باتجاه العمدة ، يرتدى الزى الدينى لكن يلاحظ قصر الكاكولا و عدم انضباط العمامة ، و هو رجل خفيف الظل ، يتحدث بلغة عربية فصيحہ تتخللها ألفاظ عامية حسبما أمكن) معلوم (يردد الآيه مرتلة و يتمايل) " أما بنعمة ربك فحدث " .. انت هنا يا مصطفى .. منذ متى و أنت تتحدث هكذا .. كدت أموت حتى علمتك الفاتحة ..

(يضحك الشيخ عشرينى ساخرا من مصطفى ، يضحك بطريقة مثيرة مما يدفع الجميع الى الضحك غير أن ضحكة الشحات تكون عالية و ملحوظة و غير اعتيادية فيلاحظها الشيخ و يعلق عليها بطريقته المرحه) من هذا الذى يبقب وكأنه قلة خروقتها واسعة (يضحكون بما فيهم الشحات و ينصت الشيخ

جيذا حتى يحدد صاحب الضحكة) هو الشحات القهوجى العشاش ..
 عشرون قرشاً يا مفترى فى فنجان القهوة .. سوف تشحت باذن الله حين
 نتحول بفضل النفط الى شريبة للبيرة

الشيخ عشرى : الاسلامية الخالية من الكحول (يضحك الجميع) ازيك يا
 عمدة

العمدة : أهلا يا شيخ عشرى .. انت فين يا راجل.

الشيخ عشرى : أنا فى المعمة يا عمدة ... الدنيا مقلوبة بالخارج ..
 البترول أشعل البلد فرحا .. متى يبدأ الضخ يا عمدة .

العمدة : ضخ ... ضخ ايه يا مولانا

الشيخ عشرى : الذهب .. الذهب يا رجل .. الجاز .. متى بنسال عبر
 المحيط الى أمريكا ثم تنهمر الدولارات كا لمطر .

العمدة : (يضحك) المندوب على وصول يا مولانا .. والله بركاتك حلت يا
 شيخ عشرى .. أنى بقول من زمان انت راجل بركة

عبد الرحيم : انت يعنى قلوظت العمدة و ودورتها كده (ينصت الشيخ جيداً
 فى محاولة للتعرف على صاحب الصوت)

سليمان : (وهو يضحك) ايوه يا سيدى .. مراته كانت معلقاها ابارح ع
 السجرة هي و الكاكولا .. حنت عليه و نصفته

الشيخ عشرى : أيها الملاعين .. و كيف أستقبل أيام النفط اذن .. أليس هذا سليمان الألعبان يا عمدة (يشير بيده تجاه سليمان)

العمدة : هو بعينه يا شخنا

الشيخ عشرى : و ذاك عبد الرحيم صهر الجاز و نسيب الأنابيب

مصطفى : انت شاغل بالك بالحكاية دى ليه يا شيخ عشرى .. تكونش ناوي تشتغل فى الجاز يا مولانا

سليمان : والله صحيح .. ماتعملك بنزينة قدام الدار يا مولانا .. والله العظيم تكسب ذهب

الشيخ عشرى : (يحاول أن يناله بالعصا) خستت .. خستتم أجمعين ..لقد كنت أول من أعلن نبأ البترول فى هذه البلاد .. غير أنكم بغال لا تفقهون (يضحك العمدة فيما يحاول الشيخ أن يضرب سليمان بالعصا)

مصطفى : ايوه .. انى سامعه يوم الجمعة .. قبل ما يطلع البترول لعبد العاطى بيوم واحد .. بس ما كنتش فاهم هو بيقول ايه .. كان بيقول . (يحاول أن يتذكر)

عبد الرحيم :ايوه .. الشيخ عشرى ده أصله واصل .. م الأوليا

مصطفى : (فجأة) إيوه .. كان بيقول ها تهب ع البلد ريحة معفنة .. و
الواجب عليكم تستعد لها .. مش كده برضه يا شيخ عشى ؟

الشيخ عشى : لماذا لا يبيليك الله بمصيبة .. لقد أنفقت عليك سنتين حتى
تصير آدميا .. عفنة .. هل قلت أن رائحة النفط عفنة .. والله
لو قضيت شهر مع حمار لنطق .. وقال لك الآن أنت نصف
بغل يا مصطفى .. ان رائحة الجاز أروع من غبير المسك ..
(يتحرك محاولا الجلوس)

العمدة : تعالى يا شيخ عشى .. سيبك منهم .. تعال هنا جنبى .. (يهم
بالجلوس بينما يوجه العمدة حديثه الى عبد العاطى) وانت يا
عبد العاطى تعالى جنب الشيخ هنا (حين يسمع الشيخ اسم
عبد العاطى ينتفض مرة أخرى)

الشيخ عشى : الحبيب ابن الحبيبة هنا (يحاول الوصول الى عبد
العاطى) اهلاً بالأمير ابن الأميرة .. الشيخ عشى رؤيته لا
تخيب ابدا .. هل تعرف يا سيد عبد العا ..

عبد العاطى : دا ايه الاحترام اللي نزل مرة واحدة ده .. أنت مش كنت كل
ماتشوفنى تقولى كتك خيبة فى امك

الشيخ عشى : أضحك معك يا رجل .. (يصل اليه و يكاد يلتصق به)
أداعبك .. أما الأميرة خضرة فلها فى قلبى كل الود .. والله
أحبها (يضحك الجميع) نعم أحبها .. أحبها فى الله .. ثم أنت

.. أتعلم.. أنا الذى سميتك يوم ولاتك .. اسأل خضرة .. أقصد
السيدة خضرة .. قلت لها قبل ولادتك بيومين ، الخير كل الخير
تحت هذه القبة .. كانت بطنها المباركة و هى حامل فيك تشبه
القبو تماما .. كان وجهها كالبدر فى تمامه .. و كانت عيناها
فى خضرة البرسيم و ..

سليمان : طيب انت شفت عينيها ازاى ؟

الشيخ عشرينى : خسئت أيها الملعون .. اسكت هذا النطع يا عمدة (الى
عبد العاطى) قلت لها سمه عبد العاطى (يتمايل) هو العاطى
الوهاب .. هو الغنى .. هو القادر على كل شئ .. نعم .. كنت
يومها قد رأيت رؤية عجيبة .. رأيت أمك و ق...

خضرة : (فى خجل) كتك ايه يا شيخ عشرينى .. شوف الرجل .. زى
ما يكون بصحيح ..

الشيخ عشرينى : (فجأة و هو يترك عبد العاطى و يتجه اليها) هى .. هى
الأميرة .. قلبى كان حاسس .. لولا خوفى من تهمة الجنون
لقلت الشمس هنا .. و الله أقوى من نور الكهرباء .. سأجهز
لكى حجابا يصد عنك شر الحساد والحقة .. (يشير الى
الموجودين)

سليمان : وعى تاكلى من كلامه .. دا راجل مهلبية .. قال ايه عاملك انه
مكشوف عنه الحجاب ...

(فجأة يصيح الشيخ بأعلى صوته و يدور فى أرجاء المسرح مما يثير الرعب فى نفوس الجميع عدا فوزى و شكرى اللذان ينظران اليه باستخفاف بينما لا يبدو على جميل أى اهتمام)

الشيخ عشرى : مدد .. مدد (يطيل فيها كما لمكاذيب) مدد .. مدد يا شيخ سلامه مدد

العمدة : هو بين الشك و الخوف (مين الشيخ سلامه ده يا شيخ عشرى .. هو احنا عندنا شيخ بالأسم ده

الشيخ عشرى : (بحدة) جهلة ..

مصطفى : طيب ما تتورنا

الشيخ عشرى : مدد يا خبير الفحم مدد .. مدد يا بتاع البترول مدد

سليمان : (بحدة لا تخلو من المرح) انت هاتسوق السوييا علينا

الشيخ عشرى : سامحهم .. انهم جهلة لا يعرفونك (يرهف سمعه اذ يبدو أنه يتلقى حديثاً من المجهول) نعم .. (كن احدا يحدثه) ماذا تقول

عبد الرحيم : ايوه .. ايوه .. انت فاكرك هات..

الشيخ عشرى : (ينهره بشده) اخرس .. اخرسوا جميعا (ينصت للمجهول الذى يسمعه وحده و يرد عليه) أى نعم .. أى نعم .. أنا .. أنا

الشيخ عشرين .. (ينصت) أشكرك يا سيدى .. أنت رجل كريم
من أصل كريم (ينصت و ينصتون جميعا معه فى محاولة
لسماع الطرف الآخر دون جدوى) نعم .. هذه أول دفعة ؟ ..
من اليمن ؟ .. رأسا الى هنا ؟ (الى الموجودين) هل تسمعون ؟
.. كان من المروض أن يفجر هذا البترول فى اليمن و لكنه
أكتشف أنهم أنذال .. أراهن أنه لا يعرف قدر ما فيكم من ندالة
.. فى امكانى أن أخبره الآن أيها الحمير و ليذهب بهذا البترول
الى الهند (بهم عبد المعطى بتقبيل يد الشيخ) آه يا ملاعين ..
(يستدير الى المجهول) طيب قولى يا شيخ سلامه .. كيف
سريت النفط من تحت البحر الى هنا ؟ .. (ينصت و يحاولون
معه) نعم ؟ .. أى نعم .. ليس لى دخل فى ذلك (يضحك)
أعلم .. هذا سر .. لكن .. لكن لماذا جئت به الى أرض عبد
المعطى بالذات فى حين أن دارى فى سكتك على اليمن و أنت
داخل البلد ؟ (يحاول الجميع سماع إجابة المجهول فيما يتاب
عبد المعطى خوف حقيقى بينما ينصت الشيخ) ليس لى دخل
أيضا ؟ .. أعذرني يا سيدى (ينصت) لا لا .. ثق أعدك بأننى
سأقوم برعايته .. إطمئن .. هو فى عهدتى من الآن .. فهو
ولد طيب و أمه حبيبتى .. (ينصت) سأبلغك اذا لم يعطنى
حقى (الشيخ عشرين مازال يخاطب المجهول) سأبلغك اذا قصر
.. لكن لا تقسو عليه .. اذا قصر معى اسحب البترول من
أرضه .. هل تعرف ؟ .. عندك أرض زوجتى .. لها نصف
قيراط فى أطراف البلدة .. اذا استلوح عبد المعطى معى اسحب

البتروى الى أرض زوجتى .. انها امرأة صالحة .. (يخلع
العمامة) لقد غسلت العمامة بالأمس لى و الكاكولا أيضاً

العمدة : (بعد نفاذ صبره) انت بتكلم مين يا شيخ عشرى ؟

الشيخ عشرى : انه شيخ المعادن يا عمدة

العمدة : طيب اسأله كده أنى أرضى فيها بتروى ولا لأ

مصطفى : و انى يا شيخ عشرى .. قبل ما ابيع .. و لك الحلوة

سليمان : شوف كدة يا مولانا الجاز بتاع عبد العاطى موصل لأرضى

فوزى : (يقترب من الشيخ ثم بهدوء وود حقيقى) ازيك يا عم الشيخ
عشرى (يمد الشيخ رقبته ، و يكفهر وجهه و ينتابه صمت
مفاجئ و تتم حركات وجهه و رأسه أنه قد وقع فى مأزق حين
سماعه صوت فوزى و لذلك فنه لا يرد) انت مخاصمنى يا
سيدنا ولايه .. دا انى ماشفتكش من زمان (الشيخ ايضا لا يرد
، و يبدو هذه المرة كأنه مذهول ، يمد يده بحثاً عن المقعد و
يتجه إليه فى هدوء ، يحاول محروس مساعدته و تمكينه من
الجلوس)

محروس : (وهو يساعده) هو انت مش عارف مين اللى بيكلمك يا شيخ
عشرى ؟

الشيخ عشري : (يفأئ محروس بضربة على وجهه و يسبه بعصبية)
عارفه ... عارفه يا اعور يابن الاعور

محروس : (وهو يهرب من الشيخ) الحق على ... والله العظيم لو شفتك
بعد كده فى أى حتة مش واخذ ايدك

الشيخ عشري : معتش الا انت يا اعمى ؟ .. (الى فوزى بعصبية) الله
يسلمك يا سى فوزى .. إنت هنا من زمان !

العمدة : من قبل ما تيجى بزمان .. و اهو زى عوايده يا سيدي مش
عاجبه أى حاجة

الشيخ عشري : (بخبث) سي فوزى فيه البركة يا عمدة .. واهو برضه
هاينوله من الحب جانب

فوزى : (بتحد) يعنى ايه يا شيخ عشري ؟

(ينكمش الشيخ عشري و يعجز عن الرد)

العمدة : (الى فوزى و بحدة) انت ها تبلع الرجل كده ليه يا واد انت ؟....

فوزى : يوضح كلامه .. اشمعنى دلوقتى كلامه بأه متغطى .. مهو من
شوية كان كاشف نفسه على الآخر ... كان ناقص يبوس
رجليكم واحد ورا التانى

الشيخ عشري : (مقاطعا و بحدة كأنه يلقي خطبة) عندك ... أنا لا ألعق

حذاء أحد ... رزقى عليه وحده .. هو المانح و المانع

فوزى : طيب كلمة الحق تايهه فى حلقك ليه !! لما انت عارف ان الرزق عليه مفيش غيره الحق عندك له ألف وش ليه !!

سليمان : (بحدة) الراجل قال حاجة يا جدع انت !!

فوزى : ابوه قال .. لما هو بالذات يسكت يبقى قال .. لما هو ينسى ولاّ تعديه الحكاية يبقى قال .. لما يعمل ودن من طينن و الثانية من عجبن تبقى مصيبة (يهدأ) و الداهية الكبيرة انه يتكلم زى ما كان بيتكلم من شوية .. (يتجه اليه) ما تقولى يا شيخ عشرى قبل ما يفوت الآون .. اللى بيتعمل بالبترول ده دلوقتى صح

(يبدو على الشيخ أنه يغوص فى لحظة تأمل و تفكير ومعاناة أيضاً ، و حين يبدأ الكلام يبدو وكأنه يتحدث من أعماق سحيقة لذلك فان جواً من الرهبة و الخشوع و السكون و الخوف يسيطر على الجميع)

الشيخ عشرى : (وهو يتقدم الى مقدمة المسرح) الله الذى لا يعجزه شئ يقول لكم ما دتم على دين الاسلام فأنتم الغالبون (تتردد كلمة الغالبون عدة مرات و كأنها تتصادم بصدور الجميع) اتق الله يجعل لك مخرجا .. و يرزقك من حيث لا تحتسب .. أما الكفرة فقد كتب الله عليهم الشقاء فى الدنيا .. فهم وحدهم يعملون ... يحفرون و يشقون .. يشيدون و يخترعون ... يكونون و

يعرقون .. لأن الله سبحانه و تعالى قد سخرهم لنا نحن المؤمنين
فيا معشر المخلصين .. من اليوم لا عمل ولا نصب ..
 تمتعوا برزق الله الذى يفجره لكم من تحت أقدامكم الطاهرة ..
 أنتم خير أمه أخرجت للناس .. تطيعون الله ورسوله و أولى
 الأمر منكم ...

(قيل أن ينتهى الشيخ من كلامه يكون عبد العاطى قد اتخذ مكانا له
 بجانب الشيخ بينما يصطف الجميع خلفهما عدا خضرة التى تظل وحيدة فى
 ركن فى المسرح بينما يقف فوزى وحده فى المواجهه .. و حين ينتهى
 الشيخ من كلامه يبدأ كل منهم فى التحدث معبرا عن تداع خاص ، لذلك
 يجب ملاحظة أن ما يجرى ليس حوارا بين أفراد المجموعة الموجودة على
 المسرح فى هذا المشهد)

عبد العاطى : (وهو يسير يبطئ فى اتجاه الشيخ) إيوه .. جه اليوم اللى
 نرتاح فيه .

فوزى : (لنفسه) كدابين ... غشاشين ...

سليمان : (يبدو أنه يحدث المجموعة) كل الناس هاترتاح ..

فوزى : (يجب ملاحظة أنه لايرد على وإنما يعبر عن معاناته هو) كل
 اللي ياعو نفسهم .. يعنى ايه ؟ نبطل ندق ؟ .. نبطل نشق !!!

الشيخ عشرين : (الى المجموعة) سوف يرتفع مستوى المعيشة أضعافاً
 مضاعفة ..

فوزى : لكن مستوى الانسان فى الحضيض ..

سليمان : هانقدر نشترى كل حاجة ...

فوزى : (يجب ملاحظة أنه يحدث نفسه مايزال) المهم تقدر تعمل إيه ..

الشيخ عسرى : بأمر الله ستتحول قريتنا بفضل النفط الى جنة .

فوزى : اجنة فوق .. الجنة مش ع الأرض .. الناس هنا علشان تبقى ناس لازم تشتغل .. تنتج وتبدع .. تتألم وتفرح .. يبقى ليها بكرة وتشتغل علشانه ويبقى ليها ماضى تتعلم منه .. الناس لازم تتأمل وتتعبد ..

عبد العاطى : هانملا البلد جوامع .

فوزى : مدافن معدناش بنعرف نبني غير المدافن ..

مصطفى : دا احنا هانعيش عيشة قللى ..

فوزى : (بيأس) عيشة بزميط .. شعب من غير بلد .. بلد من غير ناس .. محدش عارف الناس عايشة ع الجاز ولا محروقة بيه .. مفيش أثر .. مش هيبقى فى الأيام الجاية أى أثر .. لا للناس ولا حتى للجاز .

عبد العاطى : (بفرح) احنا هانبقى اغنى م الحكومة ياشيخ عشرين .. احنا هانبقى الحكومة .. هاعملك وزير الجوامع .. وانت وزير (يشير اليهم)

عبد العاطى : وانت وزير .. وانت ... وانت ..(يفرح الجميع ويعبرون عن فرحهم بالرقص وتنتاب الجميع عموماً حالة من المرح فيما تظل خضرة وحيدة مهملة ويظل فوزى وحده فى المواجهة واجعاً)

بس اوعى حد يلعب بديله أحسن والله العظيم أوقف حاله وحال اللي جايينه .. مهو انى طبعاً اللي هاديلكم المهية .. لأن انى طبعاً صاحب الجاز .. يعنى انى الملك ..(يهتف الجميع له)

الجميع : يحي الملك .. يحي الملك .

عبد العاطى : أنى بحبكم خالص .. والله العظيم انى مش عارف أقولكم ايه ... عموماً بكرة الفلوس هاتبقى من غير حساب . وانى هاديلكم من غير حساب .. (يحاول إسماع فوزى) واللى يسمع كلامى هازودله المعلوم .. واللى يعنى دماغه تميل كده ولا كده .. هو حر .. لانه إنشالله هایشحت .

(يرقص الجميع ويهتفون بحياة عبد العاطى ويلاحظ أنه أثناء حديث عبد العاطى وفى غمار فرحة الجميع أن الاضائة بدأت تخفت تدريجياً الى ان تنطفئ تماماً حيث تعلو أثناء فترة الاظلام ضحكات وقورة لنفس الاشخاص ويعلو ايضاً لغط غير واضح .. يستمر ذلك لفترة قصيرة ثم يضاء المسرح

مرة أخرى فاذا نحن فى القصر الملكى أو فى مبنى حكومى مهيب نفس الاشخاص فى المشهد السابق غير أنهم فى هذا وزراء ، وهو يتبادلون الاحاديث الجانبية انتظاراً لوصول الملك اذ يبدو أن اليوم احتفال أو عيد (رسمى)

عبد الرحيم : (الى سليمان) انت فىن يا معالى الوزير .. هو الواحد مايشوفكش كده الا من السنة للسنة ؟

سليمان : (يضحك بوقار) يعنى هو انت عدت بتسأل يا عبد الرحيم .. قصدى يا معالى الوزير عبد الرحيم ؟

العمدة : (فى حديث جانبي الى جميل) الوزارة الللى انى ماسكها وزارة غم فى غم والله العظيم يا حضرة الوزير جميل .

جميل : دا الداخلية وزارة سهلة خالص يا عمدة .. قصدى يا وزير .

العمدة : أنى فاهم .. هى وزارة سهلة وكل حاجة بس موقرفة .. بالك .. أنى كل يوم أخنق واحد من الشعب .

الخضرى : (الى مصطفى فى حديث جانبي ايضا) جلالة الملك هايلبس العباية الجديدة النهاردة .

مصطفى : (بإندهاش) والله العظيم !! هى وصلت من أمريكا ؟

الخضرى : هو انت مش عايش فى المملكة ولا إيه يا جناب الوزير .. دا

الوزير الأمريكانى بذات نفسه هو اللي جه سلمها لصاحب
الجلالة .

مصطفى : (كأنه يهمس فى أذن الخضرى) هى صحيح العباية دى بتمشى
لوحدھا ؟

الخضرى : هى بتمشى لوحدھا وبس .. دى فيها مخ كومبيوتر .. الكترونى
.. صاحب العزة عبد المعطى المعظم وهو لابسها يقدر يعرف
انت بتفكر فى ايه من غير ما تتكلم .. وغير كده كمان ..
صاحب الجلالة وهو لابس العباية دى يقدر يعرف اذا كان اللي
بيكلمه بيكذب عليه ولا بيتكلم بصدق .

سليمان : (الى عبد الرحيم ويجب ملاحظة أنه كما يحدث فى الحفلات
عادة فان الأحاديث كلها جانبية بين الموجودين انتظاراً لوصول
الملك) مهى دى تالت مرة أروح فيها نيبورك .. بس المرة دى
الزيارة مكنتش رسمية .. كانت زيارة كده ودية .. حاكم انى يا
جناب الوزير أموت فى نيبورك دى ..

عبد الرحيم : (وهو يضحك) ايوه .. ايوه .. أنى عارف .. طيب دا انت يوم
ما رحنا هناك فى الزيارة الرسمية مع جلالة الملك كنت
هاتجنن ..

سليمان : مهى حاجة تطير المخ .. ايه العالم ده يا عبد الرحيم ياخويا ..
ايه اللحمة البيضاء دى .. دا احنا كنا مدفونين بالحيا يا راجل ..

عبد الرحيم : (وهو يضحك) المهم عرفتكم إحنا مين ..

سليمان : وحياتك إنت أكبر شارع فى نيويورك سموه بإسمى ..

عبد الرحيم : اسمه دلوقتى شارع سليمان ..

سليمان : إيوه ... الحريم كله كان عامل اضراب .. وراسهم والف جزمه لازم يكرموني (يضحكان)

عبد الرحيم: إنت وزير داهية .. كل زيارة وانت طيب (يضحكان) ..

سليمان : هو جلالة الملك إتأخر كده ليه ؟

عبد الرحيم : عقبال عندك .. أصله استلم العباية الجديدة من أمريكا النهاردة .. وطبعاً لازم يلبسها علشان الحفلة ..

سليمان : إيوه صحيح .. داني سامع إن العباية دى فيها تكييف .. الكلام ده صحيح؟؟

عبد الرحيم : اللي اني سامعته إن فيها جهاز بيكشف الكذابين والحرامية للملك ، وعموما هى مدفوع فيها للأمريكان ثلاثين مليون دولار ..

الشيخ عشري : (الي العمدة) طيب واللى زى حالاتى .. أعمى ربانى يعنى.. يعمل ايه ؟..

العمدة : ليس على الأعمرى حرج يا مولانا .. المهم ان العباية دى هاتكشف الكذاب والحرامى قدام الملك ..

الشيخ عشرى : طيب بس ازى ..

العمدة : جلالة هايدخل كمان شويه وهو لابسها ..كل الشرفا هايشوفوها .. أما الضلالية كلتهم هايتهايلهم ان الملك عريان ..

الشيخ عشرى : هايشوفوه بلبوص ؟..

العمدة : تمام كده .. الملك هايسأل واحد واحد عن رأيه فى العباية .. وياويله اللى مش هيعرف يجاوب

الشيخ عشرى : اللى مش هايجاوب بيقى ضلالى .. (يضحك) طيب وانت هاتعمل ايه فى الحوسة دى يا جناب الوزير ..

العمدة : قصدك ايه يا شيخ عشرى ؟

الشيخ عشرى : لا .. أبداً .. أصل انا شايف ان الحكاية يعنى بقول يعن...

العمدة : (بحدة) انت تحمد ربنا انك مابتشوفش .. والا .. كانت وقعتك هاتبقى للركب (يغتم الشيخ)

محروس : (الى زميله عبد النبى وهما فى هذا المشهد بمثابة حارسين يقفان حول المقعدين الملكيين) كلتهم حرامية ولاد كلب .

عبد النبي : يعنى الملك هايسأل الوزرا دول عن رأيهم فى العباية الجديدة ؟

محروس : ايوه ... دلوقتى تشوف .

عبد النبي : الله !!! وهما هايعملوا ايه ؟ .. هايصارحوه بالحقيقة ؟

محروس : حقيقة ايه يابن الهبله انت ... انت عايزة تقطع رقابهم !!

عبد النبي : يعنى ها يكذبوا عليه ويقولوا له إنه لابس عباية فعلاً !!

محروس : مهو هو اللى ملك اهل ابن اهل ... يا لزمة فى ملك فى الدنيا
ياكل الخازوق ده !!

عبد النبي : وطى صوتك يابن الأعور أحسن تودينا فى داهية ..

محروس : كلتهم عارفين .. عارفين إن حكاية العباية دى مقلب شريره
صاحب الجلالة .. بس زى مانت شايف كده .. بيستعبطوا
على بعض .. قال ايه .. كل واحد فيهم عامل إنه أول مره يسمع
عن حكاية العباية دى ..

عبد النبي : طيب وانت عرفت ازاي؟؟

محروس : أنى كنت واقف خدمة على باب الملك ساعة ماكان الأمريكان
بيبيعوا له الخازوق .

عبد النبي : طيب مادخلتش دببت صوابك فى عنيم ليه يا محروس ؟

محروس : ياعم وأنى مالى .. هيا فلوس أبويا ..

عبد النبي : يعنى هو دلوقت فاكّر إنه لابس عباية بحق وحقيق ؟

محروس : الانكت من كده إنك لو قلت له انه عريان ها يفكر انك حرامى
ويمكن يقطع رقبتك .

(بلاحظ أن الحوارات الجانبية هذه تجري أثناء الاستعداد الذى يتم بواسطة
مجموعة من الخدم والعمال لاستقبال الملك عند وصوله ثم البدء بعد ذلك فى
الحفل الكبير لمناسبة قومية)

سليمان : وزير الداخلية ده مش نازلى من زور ..

عبد الرحيم : الراجل شغال كويس .. هو حصل منه حاجه زعلتك ؟

سليمان : طالع فيها كده وكأنه يعنى مولود من بطن أمه وزير .

عبد الرحيم : (يضحك) هو صحيح مناخيره عالية شوية ..بس شغال .. مادام
بيخنق كل يوم واحد بيقى شغال

الشيخ عشرينى : (الى الخضرى) هل صحيح أننا سنخفض من انتاجنا للنفط
يا جناب الوزير؟

الخضرى : (يضحك) نخفض !! .. احنا هانزود (يضحك ملياً) احنا زودنا
فعلا ..

الشيخ عشرين : ألم نوافق رسمياً على قرارات الأوبك بالأمس ؟

الخضري : الالوبك دول شوية مساطيل .. احنا وافقنا صحيح بس عمرنا ما هانزعل الزباين بتوعنا .. احنا مابنقولش لأ لحد .. بس اوعى الكلام ده يطلع يا مولانا .. المسألة دي من الأسرار القومية .

الشيخ عشرين : (يصيح) أستغفر الله .. لا يفشى سراً كهذا الا خائن .. (بهدهو وفي أذن الخضري) هل تعلم ..

الخضري : إيه يا مولانا ؟

الشيخ عشرين : أنا أعرف أن جميعكم لصوص ..

الخضري : (بحدة) انت بتقول ايه يا فضيلة الشيخ ؟

الشيخ عشرين : لا تخف .. هذا أيضاً سر .. لكنه فى بئر .. لأنه أيضاً من الأسرار القومية ..

(تضطرب الحركة بعض الشئ ايذاناً بحدوث شئ ثم يعلن الحارس وصول الملك)

الحارس : (بصوت عال جداً) مولانا المعظم .. صاحب العزة والسعادة .. صاحب الفخامة والجلالة ... صاحب السلطان العظيم .. مملك الملوك .. عبد العاطي ابن خضرة ..

(يدخل عبد العاطي وسط هالة من الترحيب .. ويلاحظ أنه لا يرتدى سوى

سرّوَال قصير بحيث يبدو شبه عارٍ .. تصحبه زوجته عزيزة
ويحيط به جمع من الاتباع .. يتجه عبد العاطي وزوجته الى
المقعدين ويجلسا وبعد تقديم التحية وفروض الولاء له يعلن
أحدهم عن ابتداء الحفل بعد التقديم المناسب .. وليكن هذا
الشخص شكري

شكري : باسم ملكنا الجبار نبداً احتفالنا الساهر بعيد النصر المجيد
ذلك العيد الذي يذكرنا بإنصاراتنا على الجيش المجوسى
الانجليزى ويذكرنا أيضاً بما فعله الملك المغوار .. عبد العاطي
الجبار فى هذه المعركة .. فلقد رأيتهم جميعاً كيف التقط جلالته
بيديه الكريمتين .. القنبلة الذرية قبل أن تسقط على مدينتنا
الآمنة (تصفيق وهتافات بحياة الملك)

أحدهم : (يهتف) ماتقوليش .. ماتقوليش .

الجميع : (يردون على الهتاف) عبد العاطي غيره مافيش .

شكري : (يكمل الخطبة) لقد شأط الملك الجبار القنبلة الذرية رغم انها
متعاصّة إشعاع .. ثم خبأها فى عبائته الكريمة .. حتى لا
يتلوث أحد من شعبه الطيب بالاشعاع .. أيها المواطنون ..
هكذا هرب..

شكري : العدو الجبان أمام ملكنا عبد العاطي ابن خضرة .. بعد أن
أنزهرهم اما أن يخرجوا أو يقذفهم بالقنبلة الذرية نفسها .. أيها

المواطنون .. كل سنة وأنتم في صحة وسعادة .. والآن يبدأ
الحفل ..

(يمكن أن يكون هناك غناء ورقص يستمر لفترة وحين يبلغ الحفل ذروته
يندفع أحد الحراس من الخارج مما يؤدي الى توقف الغناء والرقص وإصابة
الجميع بالوجوم وينتفض الملك واقفاً)

الجندي : (مستجداً) مولاي .

عبد المعاطي : حصل ايه يا عسكري ؟

الجندي : الاعداء في الطريق للقصر يا مولاي ..

(تحدث حالة من الفزع والهياج تلعب الاضائة فيها دوراً كبيراً الي أن تنطفئ
تماماً ويستمر الفزع لفترة ثم يضاء المسرح مرة أخرى فاذا بنا في دوتار العمدة
حيث المشهد السابق حين كان الجميع في انتظار المندوب واذاك يندفع شيخ
الخفر داخلاً)

شيخ الخفر : (وهو يصيح فرحاً) يا جناب العمدة .. ياسى عبد المعاطي .. يا
جناب العمدة ..

العمدة : ايه يا شيخ الغفر ؟ .. حصل ايه يا شيخ الغفر ؟؟ حد سرق
البهايم م الزريبة ؟؟

عبد المعاطي : البير جرى له حاجه .. البترول حصل فيه ايه ؟؟

شيخ الخفر :المندوب .. المندوب جه . البلد كلتها بتزفه بره ..

(تحدث جلبه هائلة ويقبل بعضهم بعضاً وتنطلق الزغاريد)

العمدة : (وهو يروح ويجئ) افتحوا المضييفة .. الغدا .. الغدا يا ولاد ..

(يدخل المندوب وهو موظف بسيط كما يبدو من مظهره اذ يرتدى ملابس تدل على تواضعه ، لونه مخطوف وعلى وجهه ترتسم ابتسامة باهته)

المندوب : مين فيكم العمدة ؟

العمدة : (يتصافد وجود العمدة بجواره تماماً) أنى .. أنى العمدة هنا .

المندوب : مين فيكم عبد العاطى ؟

عبد العاطى : أنى .. أنى عبد العاطى يا حكومة .. أنى بتاع الجاز .. أنى اللى الأرض انشقت من تحت رجليه بالخير كله .. أنى عبد العاطى يا مندوب الهنا .. على النعمة لعملك وزير .

المندوب : (ينظر الى عبد العاطى بإحتقار شديد ثم يخرج ورقة من جيبه ويقرأ) بناءً على برقيتكم بخصوص البترول فى أرض المدعو عبد العاطى ...

عبد العاطى : (وهو يضحك) إيوه .. أنى .. مهو انى عبد العاطى .. عبد العاطى ابن خضرة .. خضرة اللى واقفه هناك دى (ينظر المندوب الى خضرة باشمئزاز فينهره عبد العاطى بحده)

ماتلويش بوزك كده .. بكره تشوفها لما تستحمى (يضحك
الجميع)

سليمان : له حق يتقرف يا عبد العاطى .. أمك دى عايزه سنفره جامده ..
مهما استحمت القشف لبد فى جنتها خلاص ..

الشحات : أنى عندى فكرة .. إحنا نطلع من البير النهاردة جردلين جاز
وننقع امك يا عبد العاطى يومين يمكن تنتصف .. (يضحك
الجميع)

خضرة : (تركض خلف الشحات الذى يهرب أمامها وهى تحاول ضربه)
بس يا جريان يابن الجريانه .

المندوب : (وهو ينظر اليهم جميعا بإحتقار وقرق) وبعد أخذ العينات التى
تتكون من خليط الجاز والجلو إت.....

عبد الرحيم : (مقاطعاً وبعصبية) فصلتوا الجلة عن الجاز اتضح ان الجاز ..
جاز .. متقصر وتجبب م الآخر وبلاش اللكاعة بتاعتكو دى .

المندوب : بعد فصل الجلة عن الجاز .. إتضح أن الجاز (يصفق الجميع
لعبد الرحيم) اتضح أن الجاز الموجود بالجلة .. هو .. من
مخلفات زيت السولار المستخدم فى ماكينة الرى (يصاب
الجميع بالذهول)

وبناءً عليه .. فانه لا يوجد أى احتمال لوجود البترول فى هذه القرية ..

والحكومة تحمل عبد المعطي مصاريف الفحص والتحليل .

(يصاب الجميع بما فهم فوزى بحالة احباط شديدة .. ويعود الشباب بانكسار الي الخضرى مشهرين له جوازات سفرهم كما كان الحال فى بداية الفصل الأول .. نلاحظ أن العمدة تغلب بسرعة على هذه المفاجأة ويتضح ذلك من البشاشة التى عاودت وجهه وهو يحاول إفساح المكان للمندوب حتى يجلس..

أما عبد المعطي فيقف مشدوهاً لفترة ، اذ تتسع عيناه جداً ، ويبدو أنه يعانى عذاباً داخلياً ، وتتسمر

خضرة وهى تنظر الى ابنها نظرة مفعمة بالرعب والأسى ،

اذ تشعر وحدها بما يعانىه ابنها فتحاول الاقتراب منه لتخفف عنه ، وفجأة ينفجر عبد المعطي فيما تتجمد مشهد الشباب مع الخضرى وهم يشهرون له جواز سفرهم)

عبد المعطي : لأ .. لأ يا حكومة .. لأ يا ناس .. حد يقولى اللى انى سمعته دلوقتى ده مش صحيح .. حد يقولى حاجه تانيه غير انى هارجع اعيش عيشة العبيد .. حد يقولى حاجه تانيه غير انى هاتعلق من تانى فى الساقية زى البهيمة حد يقولى انى ماعتش هادور الف زى الكلب الحس جزم الخلق علشان اسافر .. ابوس الآيدى علشان اسيب أمى .. علشان اسيب أرضى تشقق م العطش .. اعمل ايه .. اعمل ايه .. مهو انى ضهرى انكسر من كتر ما انحنيت وياريت كان بفايدة ..(الى المندوب) انى

منعت عنكم الرز مرة .. انتم مش بتأخدو القطن كل مرة .. أنى
جيت فى مرة وفتحت بقى بكلمة واحده .. عمرى ما قلت لأ ..
مع انى والغلبانة دى (يشير الى أمه) خلاص تعبنا .. ورغم كده
فى الموسم الجديد برضه بزرع لكم رز .. وبزرع لكم برضه
قطن .. حد يقولى بأه مايفضلأيش انى وامى غير السريس
والطماطم .. وبين الزرعة والزرعة اروح اشتغل عند الناس ..
مش كده يا محروس .. مش كنت بتيجى معايا نفلح فى أرض
العمدة م الفجر لغاية ما تروح الشمس وآخر الليل انام
مهودو علشان أقوم م الفجر أتهد من تانى .. وانام واقوم .. وانام
واقوم .. واللى انى فيه هو هو .. هو هو (بيكى) .

خضرة : (بالتلاعب شديد على ابنها) كفاية بأه يا عبد العاطى .

عبد العاطى : (يتجه اليها ويأخذ وجهها بين يديه) كنت قلت خلاص .. كان
فكرى انك هاترتاحى خلاص م الشقا .. كنت عايزك تاكلى مرة
واحدة فى حياتك لقمة وانتى ايدك نضيفة .. كان نففسى البسك
فستان وجزمة زى بتوع البندر ولو حتى لساعة واحدة .. علشان
يشوفوكى على حقيقتك .. علشان يعرفوا مين اجمل من الثانية
.. انتى صاحبة الجته الشقيانه .. ولا اللى مفيش فى حياتها فى
البندر غير المراية والأحمر والأخضر ..

خضرة : (بنفس اللوع) كفاية يا عبد العاطى .

عبد العاطى : (الى الجميع) خضرة اللى انتوا بتتقرفوا تبوصولها دى .. اللى ريحتها حلبة وطين وجلة دى .. كان نفسى تشوفوها لما تغسل وشها .. لما تسرح شعرها زى بتوع البندر .. خضرة أحلى من القمر نفسه يابا عبد الرحيم بس الشقا واكلها .. خضرة جنتها زى لبن الحليب يابا سليمان بس قولى كان ممكن أمتى تستحمى .. زهران ابويا يا عم مصطفى مات من كتر حسرته ..

عبد العاطى : من كتر حسرته عليها .. مات لما شافها بتتطفى قدامه يوم ورا الثانى وهو مش قادر يعملها أى حاجة ..

فوزى : (وهو يكاد يبكى من تأثره بحال عبد العاطى) اسكت يا عبد العاطى.. احنا لازم دلوقتى نطلع نروح ..

عبد العاطى : بيقولوا مفيش بترول يا فوزى .. بيقولوا ان الأرض ناشفه .. بيقولوا ان خلاص معتش احلم .. بس اوعى تفكر ان انى كنت طمعان .. انى كنت فاهم كويس .. كنت فاهم .. فاهم وعارف انك الوحيد اللى قلبه بيدق بالخير للبلد دى .. بس يفيد بايه وانى تعبى وشقا أمتى مش عارف لهم سكة .. أوعى تفكر انى كنت غيران ولا باصص لحد .. أنى تعبت م اللف والدوران زى الهيمة ع الساقية وياريت كان بفايدة ..

خضرة : (بلوعة أشد) كفاية يا عبد العاطى ..

عبد العاطى : حد يسأل نفسه مره يا خلق هو .. عبد العاطى كان بيسيب

الأرض وعاي يسافر ليه .. عبد النبي ومحروس هالين عليهم
 البعد عن عيالهم ليه .. محدش سألنى .. محدش قال انت
 طهقان م العيشة ليه .. (يدور فى المسرح) وامى .. وامك يا
 عبد النبي .. وامك يا محروس .. لامتى هايفضلوا شالين حسرة
 عيالهم وهما شايفنا بنعج واحنا لسه عيال .. بنعجز واحنا لسه
 عيال (بيكى ويرقد من الاعياء)

خضرة : (تصرخ بعد أن انكسر قلبها على ابنها) احنا كان مالنا ومال
 الجاز .. أنى لانى كنت عايزة فستان ولا جزمة .. انى خلاص
 يا عبد العاطى .. الأرض خدت كل حاجه .. احنا مكتوب علينا
 الشقا .. ابوك الحزن خطفه مش عايزاك تتخطف منى يا عبد
 العاطى .. (تبكى) حتى ياابنى لو كان فى الأرض جاز .. هما
 يعنى كانوا هايسبوه .. لو كان هايسبولك الجاز تجيبلى منه
 جزمة كانوا سابولك قبل كده القطن تعملك منه هدمة تانية ..
 احنا مكتوب علينا نتعب ونشقى ياابنى .. احنا مكتوب علينا
 نموت واحنا بنبدر الأرض زى ما أبوك مات يا عبد العاطى ..
 نموت زى ما أبوك مات .. نموت زى ما أبوك مات (تبكى
 بحرقة بينما نلاحظ أن عبد العاطى وهو يرفع زجه قد اعتراه
 نوع من الذهول وفجأة يصرخ فى جنون)

عبد العاطى : لأ .. أنى بتاع البترول .. أرضى عايمة جاز .. أنى هابيع
 لأمرىكا .. تعالى يا أمريكا .. الجاز فى أرضى يا أمريكان ..
 أنى الملك يا أمريكا ..

(تصرخ الأم وحتضن أبنها ويجرى نحوه فوزى ويحتضنه بينما يتحرك مشهد
الشباب مع الخضرى فيما ينصرف الباقون فى انكسار)

ستار